

中國方志叢書·華南地方·第二五七號


據

清·祝宏等纂修  
清雍正九年修，民國廿二年重刊本

影印

雲南省

# 建水縣志



成文出版社有限公司印行



中華民國六十四年 月壹一版

# 建水縣志

全二冊

發行人：黃 成 助

出版者：成文出版社有限公司

台北市郵政信箱二二六〇五號  
台北市羅斯福路三段二四〇巷五號

印刷者：成文出版社有限公司

內政部登記證內版台業字第一一四七號



勳業列傳

馮立

字士勳父登湖廣黃陂人有才識由百戶歷陞指揮使立鸞之習弓馬讀書工文以千戶中嘉靖乙酉科京闈武舉陞指揮又陞都指揮使掌印七年人咸重其操守

羅

珦

字用誠臨安衛人成化丙戌進士爲刑部郎中出知廣西桂林府時西陽延洞諸蠻出劫輿全珦檄州縣簡練民兵潛扼山口躡殺幾盡蠻跡自是不敢窺輿全也

鄔

福

洪武初以戰功授雲南前衛前所千戶會緬告急委充都指揮往凡往者難必生還福深入其阻宣朝廷德威臣其不臣之士官普刺良永樂二年調撥臨安衛左所正千戶

萬文彩

賢 詳鄉

魏忠

字蓋臣直隸灤州人臨安衛右所千戶以征安鳳功陞指揮僉事又推陞貴州都勻守備以都指揮體統行事

馮冕

字繼周中所千戶性純厚掌所事軫念軍貧呈請當道減免差役軍士甚感子豫孫恩俱中鄉科人以爲德報云

蕭崇業

賢 詳鄉

王儼

江西廬陵人任前所百戶家貧有志精武事苦讀書嘉靖十七年中京闈武舉陞千戶

包見捷

賢 詳鄉

胡平表

字不波建水人萬曆丙午科舉人初任忠州司李奢酋叛全蜀騷然平表縋城而出說石柱女土官秦良玉起兵又集川東少年練

爲士卒凡舟車葛糧營壘矢石一手幹辦屢戰屢捷保川東復西北解成都下重慶功績懋著擢監軍道廕一子錦衣衛又陞貴州叅政安禽亂黔閣部張鶴鳴特薦加太僕卿右布政督師貴州綜核將領遂直爲搗巢之舉率兵六千破安賊十萬餘衆取永寧掃蘭州畢節而還其薦牘云平表精忠貫日義膽摩空幹轉而立變風雲呼吸而莫測神武歷冒萬險身經百戰煉金煉鋼已成神物崇禎癸酉特起公征流寇至夔峽舟覆歿

## 馬一荀

字景淑建水舉人在陝西慶陽府推官廉介有大略崇禎三年慶道府二縣缺員公兼篆郡縣時苦飢寇乃固守城池賑流困開渠田建義倉教紡織理刑獄練土詰奸振勵文教數月善政修舉次年春以計典被內誣察降調當去官慶人率爲泣訴得留會保安流賊神一魁等突寇慶陽圍攻其危公以孤城誓死獨支策勵紳士兵民百計捍守劫焚賊壘擊燬梯閣計殺其從賊及內應者晝

夜嚴巡日散米錢鑿泉救渴加賞有功至十日得援圍解復乘殺賊衆保全數萬生命護持全陝咽喉士民立祠祀之督撫按院交章理薦得復官論敘而公尋以病告休矣文武亮節詳各奏章

### 溫如珍

字燦明阿迷人幼隨父征苗父歿於陣奮力鏖戰擒殺父賊崇禎四年普名聲寇臨時珍官守備統兵三百名解餉入臨名聲攻城北其急門緊閉城外居民阻不得入珍執刀坐城門令百姓入至活數千生命賊復圍城急珍帥卒力戰不勝退嚴守備置礮石炮木斃賊甚衆賊造旱船珍以火焚之賊掘地道珍立百虎樓力戰賊凡攻城十五晝夜珍衣不解甲同鄉紳總兵劉安國把總冷興泰協力固守賊退城始得完以功授臨元參將廕一子百戶是役也賊勢兇勇人心畏懼非公救則臨爲墟矣全城保民功豈在馬一苟守慶陽時下哉大節流風二公並垂不朽

劉安國

字康侯建水人少與萬文彩同學文名不相下學使范允臨善風鑑謂安國當以武功顯改武庠中武進士任臨元守備普會叛與溫如珍分守南城全城之功居多奉賞餉入川以靖邊功陞松潘總兵致仕兩賜存問

黃朝宣

建水人有韜略多膂力崇禎間大司馬傅宗龍拔出獄中援剿湖南湖北屢立戰功傳卒從監軍御史陳蓋征討流寇績著中原

湯執中

建水人崇禎間從監軍御史陳蓋征計流寇屢建奇功歷陞總兵後

皇清收服湖南執中投

誠仍授總兵鎮廣東

新館藏刀少三

蘇子如學  
PDG

文學列傳

明

羅

鏞

字孟宣治書經嘗從王景常韓五雲遊能詩文隱居不仕教子晟與孫珣俱登第贈給事中所著有納軒集復齋集

郭

鏞

字希聲治易經通醫學能詩著有桂林集

馬

質

字彥文能詩有松鶴軒集子盛亦善詩畫

藍

和

字景中通春秋能詩隱東莊草堂與縉紳爲社有野庵集

邢

奎

字文正號樂天通禮記能古詩文

朱

紳

字孟端嗜學工詩文著有竹溪集

江

濬

字彥通隱居煥山  
能詩文有退庵集

凌

廣

字仲傑號煇雪能詩  
工篆書有煇雪稿

葉

舟

字濟川治易經能詩文著有順齋集性樂  
施沙壩路及浣衣等橋皆其捐貲營構者

劉

瞰

字景寅治易經能詩  
文有易亭著八卷

羅

昊

字彥廣能詩  
有桓齋集

劉

崧

字彥高通書史善吟咏每有奇句得唐人  
韻度知府陳晟工詩於人少許可獨稱之

劉

容

字孟儀能詩與劉崧齊名時稱容  
爲東劉崧爲西劉所著有豫齋集



柴 俸

字宗濂明經領鄉薦博學工詩文  
尚氣節任思南府推官著政聲

馮 豫

字以和治易經蒙自庠巳酉鄉薦博學能文  
首修郡志居家教子及鄉後進多有成就

濮宗迪

字推吉隱居自守讀書循理言動不苟  
恂恂儒雅結詩社兄弟子孫同居友愛

楊 僎

詳鄉賢

葉 瑞

字應期號桐岡嘉靖癸未進士少嚴正敦節操博覽羣書以孝友  
聞任石門令政尚寬簡愛民如子擢戶部主事權稅一清商民稱  
便以終養乞歸累薦不起與新都楊升庵同郡王鈍庵楊肅庵交  
厚時與唱和詩篇著有崇節錄河洛解律苦書評點左圖文選尤

精嚴

吳廷秀

詳鄉賢

楊德培

字拙庵天啓辛酉舉人初任池州府推官改西華縣知縣兩任皆有名乞休歸養詩酒自適著述頗多爲鄉大賓

鄒印啓

字密庵崇禎丙子舉人初任永平府推官陞兵部主事秉性忠貞歸里詩酒自娛徜徉山水精楷書多著作

馬之騶

字存微天啓丁卯舉人初任桐鄉縣知縣旋棄官歸常以書史自娛有小學註解刊行於浙爲鄉大賓

蕭 琯

字五雲崇禎乙亥拔貢中北直丙子鄉試歷任楊州知府著有遯庵集西湖草行世

楊應桂

字薇郎號金粟子工詩能文天啓辛酉鄉薦泌水知縣歸里閉門纂集著有書滌六卷文變二卷大易點易集玉壺冰一卷俱行世

鄒印昌

善屬文  
工楷法

戴

祚

讀書能文  
精字法

高逢吉

工文精  
易學

李希靖

工  
文

王元震

通五  
經

鄔士瓌

工詩  
文

張孔昌

有詩集  
時藝稿

廖楚良

年少敏悟能詩文著  
有觀草詩集行于世

常中惺

教授  
工文

包其偉

字平修博學擅詩文得意疾書萬言立就尤工書法嘗元坐  
斗室忘饑寒肆力於書著作甚富以家貧未能刊傳於世

國朝

鄒印揚

字季鷹貢生性孝友工詩文丁亥後鄒氏兄弟並號老成  
府州舊志多出手裁著有儉德考寧儉錄瑞島吟二卷

康允晉

字叔昭歲貢生剛方博雅設教郡中多所成就兵燹  
後幫貢田爲佃戶隱占公毅然清釐享年八十有一

楊中原

字詡庵康熙癸卯科舉人博  
學善詩工書法著有詩文集

葉涑

字兆穎號舫邨康熙辛酉科副榜任南寧縣教諭少穎慧淹貫經  
史聞有藏書必借覽歸背錄無遺同人舉列朝典故事蹟應答如

嚮討論六經子史及百家言解說不少休其聰明蓋天授也性孝友父卒葬祖塋每風雨晴晦必泣省事兄敬謹無懈與人恂謹雅度雍容興會所至百里內外名山佳水翛然獨往遇殘碑斷簡悉登記載詩文擅諸家長舉筆洋洋灑灑數千百言考訂郡國舊志爲臨陽文獻之寄詩文集四十卷未刊于世

### 嚴誌信

字司直郡學生中康熙辛酉科副榜性孝友恂謹自修冲然有道之氣詩文純粹字法工二水九試棘闈志不輟授徒講學成材者衆一夕大風忽拔庭木踰日無疾卒

### 萬璠

詳孝義

### 薛正昇

字東曦州學生篤學敦行屢試不售精研百家子史授教生徒著有易解

陳執桓

字佩公己卯副榜純謹有文名

尤有爲

字亦若工詩賦能文

任宣

英偉不羣雄於詩酒時藝高古力追成弘開文氣先

譚璜

字公元任武定蒙化教授少孤善事母博洽有詩文集

曾嵩

字西白副榜性敏嗜學詩文警策著有文集

儒林列傳

明

曹洵

孝友文學重於閭里隆慶初恩例廩生有學行者遙授教職郡守以洵應詔

王璣

廣東惠州府教授優德行鄉飲三次

曹光祚

生員萬曆間修學有功給冠帶

許世德

強學力行爲鄉大賓

戎定國

通五經

萬民重

生員端嚴造士淹貫百家

劉

鼎

增生好  
善樂施

張人紀

廩生性篤孝生平勵行喜爲善助人喪葬乙巳普會亂曲境乏食出粟賑飢全活甚衆其遠祖源造木橋歷七代又香木橋及中營

石橋皆其

所經營

谷印德

郡學生丁亥後賊帥據文廟作火藥局德率生員羅見昌王瑾等力陳不可賊意感動移他處學宮得全

周耀文

庠生舉善行壽百歲鄉飲一次

黃祚昌

苦學多  
士從遊

國朝



侯

晉

貢生字錫九  
有學行善教

段捷昌

貢生詳  
孝義

糸白及フナ

建  
女  
二)

新  
年  
賀  
PDG

耆德列傳

明

雷學臯

徐增

李琇

唐國重

龍文彩

楊玄谷

王家楨

李逢陽

陳應忠

周詩

趙應朝

馬一驥

姜周師

任僖

劉世鳳

王元會

洪其仁

經一貫

張樂耕

趙玄

壽九十五表  
盛朝人瑞

王以謙

壽百歲

楊子成

壽百歲鄉  
飲二次

李元實

壽九十

胡山人

樂善好施

曹潤

恭儉孝義



賈天德

質實  
好義

張聯極

樂善  
不倦

董衢策

施藥  
濟人

楊德培

公門  
修德

王廷弼

壽八十七有善  
行府州旌表

馬成龍

曲江人  
壽百歲

陳世昂

壽百有五歲鄉飲三次奉  
旨旌表匾曰五朝人瑞

鄔俊

置義田義屯祀先  
膽族鄉飲三次

賈世魁

壽百歲有隱  
德舉鄉飲賓

趙維榮

性孝友好善樂施和易近人勸善規過爲鄉黨矜式  
丁亥後克自振拔教子撫姪不墮舊業享年八十二

楊時興

損貲修南山寺石橋又修西門  
大橋前兵備道給冠帶榮身

湯紹武

忠厚謹篤壽百  
一歲爲鄉飲賓

國朝

邱蔭恆

孝友醇謹樂善嗜學常  
以嘉言懿行教家訓俗

顧其義

醇謹老成喜於  
爲善有功義倉

江朝宗

忠厚篤實  
每周人急

沈士仁

字惠伯丁亥失業孤貧嗜學事  
母孝教子嚴生平謙謹無失德

王體陞

幼失母事伯母克孝友愛諸兄弟與人  
誠敬樂易善化誨治家教子尤謹嚴

楊 璟

醇厚謙謹生平蔬食無疾言厲聲力行善事樂於  
誨人頑梗亦化爲良咸曰是事勿令揚善人知也

何之官

性坦白正言莊  
論化導鄉里

周維新

忠質有逸德  
舉鄉飲賓



胡偉

古樸樂善壽登九  
十有七舉鄉飲賓

李良貴

孝事母品行端方教子有家法  
八十八歲舉耆老給八品頂帶

陳聖德

誠實恭謹  
功著義田

蘇達

監生樂施濟  
垂老不忘

張聯奎

恬澹寡營  
有功義倉

王瀨

純謹自修  
不再娶

李標枝

忠厚樸誠樂爲  
善有功津梁

張文蔚

年高有逸德

王天應

丁亥遺孤謙和謹厚撫兩孤姪無異所生

曾守

幼孤貧事母孝清白自持年逾八旬謙謹不衰

范學文

端重誠實樂善不倦

劉崇富

孝母利人善事悉樂爲之治家教子尤勤謹

胡載鰲

謹厚樂善教家有法

高維岱

敦重謙和齒德並懋

任光聚



逸德  
足型

姜世官

清白自守  
樂善好施

潘龍鱗

坦易公平修利  
涉橋施貧病藥



恩賜肉帛老人

盛洪先

秦裕賜

以上九  
十三歲

包瑚

金一驥

以上康熙四十二年

李起明

任光聚

倪作昌

尙新安

孫枝秀

黃文燦

劉國正

以上九  
十歲

李順

黃甲第

吳登明

虎見龍

晏鳳岐

楊國勳

黃祚增

毛玉林  
何大學  
姚德富  
盧有興  
楊萬春  
許富  
王體義  
鄧賓  
黃元鼎  
李浩明

劉章義

王一吁

張文蔚

楊遇春

王 俊

楊春秀

陳希尹

王體陞

龍 啓

丁聯甲



馬福廣  
盤偉  
王天成  
白彩文  
濮其吉  
尙起龍  
王起鳳  
方天祿  
自信中  
胡中元

曾 綵

張 正 明

熊 高 升

鍾 士 傑

仇 士 榮

馬 成 龍

張 應 祖

鄧 有 本

許 應 瑞

李 昌

高榮  
王國昌  
吳景環  
張美昌  
梁廷棟  
余耀龍  
李中麓  
趙永清  
顧覲宸  
許鼎台

卷之八

肉帛

十八 漢口道新印書館印

孫謀

丘岱

吳元寧

郭林

李梓

李朝陽

楊天爵

龐永生

胡鳴鳳

張佑

楊 珣  
宗之華  
李良貴  
梁顯祖  
馬聯雲  
王世夔  
張性蘊  
陳富有  
李御龍  
徐伯麟

丁太

楊繼

李延

向王

王遇賢


王在師

湯建中

周繼孔

李揚

沈奇才



徐弼  
陳心正  
唐國正  
倪大麗  
倪奪先  
王建侯  
湯允中  
何登高  
馬上捷  
符鳳祥

張高選

張列宿

金汝佳

閔士廉

以上八十歲

以上雍正元年



文苑列傳 附方技

明

楊道明

舉人善大書所著  
有字法律要行世

蕭漢卿

善大書文廟匾  
額皆其所書

任 俶

字起莘舉人任戶部  
主事詩畫字稱三絕

任 仁

字居居貢生  
草書入神

鄧茂之

善畫工人  
物花鳥

吳瑞龍

字明卿廩  
生善詩畫

司馬頰

字耿光增  
生善詩畫

劉大寧

字六虛序  
生工山水

王允宜

習詞章工  
義獻書法

楊昱

精楷  
隸

高麟起

善楷書四配十哲諸  
賢神主皆其手筆

夏宗璜

精草  
書

周以忠

工時藝字  
法有品行

紀

璋

字廷貴，後所百戶舍人，三世醫藥活人甚多。


丁秀岳

善書

夏

紀

號小愚，善寫，照德重鄉閭，舉鄉飲賓辭不就。



蘇子瞻  
詩集  
PDG

流寓列傳

明

王

奎

字景常浙江松陽人山西叅政洪武初以事謫戍臨安博學宏才詩文高古滇人士多從之遊後詔還與修高廟實錄爲翰林院侍

讀陞學士有南詔藥玉堂藥

行世流風餘韻至今不泯

韓宜可

字伯時號五雲浙江山陰人洪武間任山西右布政與景常同謫戍心行純正詩文高老相聚唱和紳士尊禮之使子弟受學後詔陞都御史有雲南藥行世臨安

文風實二公倡之爲立祠祀

桂

慎

字敬宗浙江慈谿人洪武間以中書舍人謫臨安後取回京

郭

登

正統間出師寓城內指林等有碑文

常昇

懷遠人開平王遇春次子襲封開國公永樂間以抗靖難師安置臨安尋以憂奪爵嘉靖中念其功更封其後爲懷遠侯

常繼祖

開平王孫永樂間安置臨安尋召至京賜鈔幣遣歸生子寧寧生復弘治五年詔錄太廟功臣後曰遇春佐皇祖定天下有大功令

其子孫彝於毗隸朕不忍其加恩承祀於是以後爲南京錦衣

衛指揮使嘉靖間續開國元功後封其裔孫元振爲懷遠侯

楊慎

號升庵蜀之新都人中正德辛未狀元嘉靖議大禮謫戍金齒衛在滇日久後與阿迷王廷表建水葉瑞文字交密常過臨寓城東

太史巷及燃燈寺巷有臨安四賢祠記

甲午臨安除久詩臨安月令漁家傲詞

李贄

號卓吾溫陵人官姚安太守辭官寓滇值巡按劉會疏題原兵部尙書劉儁死交趾事賜名表忠祠坊表志文廟聯悉出公手聯云

淚濕瀘煙今古誰非臣子魂來格廟春秋簡在

帝心公寓臨將累朝詔勅悉次第之碑在城西

閻

閻

山東臨清人吏科給事中嘉靖初以事謫蒙自縣丞寓建水探岩穴之奇遊巖洞遂以閻名後召還諫垣作正己堂記

黃河清

字澄之因流寇阻於滇遠易學精星算能詩字嘗市隱臨陽東門內恬靜安雅非其友不交非其義不取後僞蜀劉文秀屢聘之堅志不屈飲毒

死於石屏州

游席珍

號龍潭蜀人有道術精堪輿萬曆間遊臨安喜其山川明秀風氣完密著圖說

戴

謨

字明弼貴州人崇禎末父爲河西學博謨隨任遭丁亥之變孑然一身博學強記貧而工詩每遇佳山水則徘徊流覽有隱君子風

寓臨二載口不

言貧著三昧集

趙雪濤

江右人容止都雅多技能其先世宦滇因遇變流落臨安隱於市計足日費卽閉門賦詩作董書甚工清談雅謔冲虛善下嘗有句

云也知紫閣雙屏夢不換青溪半枕眠又云避俗偶然拋竹屐  
邀僧時一上花船其爲人約略見矣後遊雞足山莫知所終

周官

豫章人美丰儀能詩工草書性忠耿敢言明禾面斥僞  
晉棄職遊臨陽寓蕭公祠時以詩文自娛後終元江

吳鼎

字石峯江南人崇禎進士倜儻不羈胸無塵俗嗜  
飲敏於詩嘗往來臨陽嘯咏山水極清遊之致

葉文燦

字洞陽蜀南溪縣名士善古文詩詞多慷慨尤長  
史學遭亂被擄隱於臨陽舌耕營伍二年始歸

宋志和

陝西人天性沉靜恬淡寡營  
能詩古文流寓臨安數載歸



建水州志卷之九

古蹟

世之歷久不可磨滅者有幾哉事久則廢名久則湮陵谷變遷久亦非故然則歷數百年而可傳者其必有不可磨滅者矣奇詭之說君子不道惟山川勝景及名儒宿將遺踪故壘豐功駿烈表厥里居則列秀稱靈并朱文綠字之褒未可泯也彼忠良墳墓兆宅山阿耿耿精英與山河俱古皆不可磨者若琳宮貝闕佛派仙踪謹別傳之俾尙論者有所考云志古蹟

十景

學海文瀾

泮池汪洋澄澈廣十餘畝每朝曦乍啓翠點波心淨碧無痕煥山諸峯倒影入池中清風徐來溼洄蕩漾文瀾萬頃

瀘江煙柳

江自西而南繞郭東下十餘里兩岸密柳當春夏深綠蔽空濃陰匝地荷香淡遠煙幕浮游行人依依忘倦風度月臨倍

覺踈爽

煥峯擁翠

城南翠峯聳列縹緲天表疊嶂層巒蒼翠欲滴遇雨霽雪晴碧影連霄天然圖畫

珠噴龍湫

石池半畝滾滾噴出如綴珠篆雪應有靈物守之派出平田灌溉千頃上聯脣宇可恣登眺

東樓凌漢

東城樓高百尺千霄插天下瞰城市烟火萬家風光無際旭日初昇暉光遠映遙望層樓如黃鶴如岳陽南中大觀

巖洞雲深

洞口四時雲氣環繞三河之水匯入石鐘靈巖清音響答列炬而進石髓凝結倒垂神工巧鏤石柱孤撐獸蹲豹踞仙侶

對奕千態萬狀後連南明萬

象諸勝爲西南第一洞天

萬明遠眺

城西嶺寺宇雄麗石徑斜通東南諸峯拱翠列  
屏瀘水繞麓草海澄清俯村民漁樵瞭若指掌

雲龍毓秀

山秀而深高峻幽雅琳宮梵宇叢列隱顯之間竹松競茂冽  
泉注釜周圍十里許溪聲鳥語爽氣挹人踏澗穿林而上幽

秀絕  
塵

津鎖長虹

城東瀘江諸水至此匯爲巨津跨以石橋如臥長虹上起飛  
閣凌霄冲漢西望平疇城郭參差村樹迷離夕陽晚照尤多

佳  
景

石壁泉聲

自顏家坡至侯家箐幾二十里穿岩直上瀑布  
鳴湍孤松棧道行人車馬隱躍盤旋警心聳目

名蹟

曲江城遺址

在曲江有二一築於漢一築於蒙氏

段氏古城遺址

有二一在蓮花池一在南山寺

楊知州莊

在城南東五里元知州楊和居此俗呼楊時莊

讀書臺

在城內文廟左明洪武中學士王奎都御史韓宜可謫戍講學臺上訓導趙子禧建祠

撫蠻臺

在城西先是普名聲叛隨滅其妻萬氏尙據阿迷巡按姜思睿招撫萬氏降公有詩紀其事

劉氏體泉

在城東北隅合郡釀黃酒必須此泉今廢

將臺遺址

有二一在城西北五里左方伯駐兵處一在白鶴舖去城十里定遠伯沐昂駐兵處

觀音倉

在府治西門廣濟倉內不知創自何年有高閣中奉觀音大士像高二丈許座下傳有海眼座前拜石每清晨有水珠百餘點舊八

景楊枝

滴露

銅壺滴漏

在城東樓瓶自洪武甲戌年規制精巧星家測晷時刻節令絲粒不爽萬曆六年兵道許口鑑有重修記

顯靈坊

在城隍廟前相傳嘉靖初悍婦密爲不法隨以猪羊祭廟甫奠死猪羊突起直奔府堂知府拘訊得罪狀因建坊曰顯靈丁亥燬康

熙三十年總兵王洪仁知府王永義郡人曾旭捐募重建外額曰顯靈內曰赫濯郡人曾齡書

象鼻嶺

一名平山在城西北角相傳洪武初徐伯陽築城時言此嶺爲城過峽宜培不宜去後普名聲寇臨有司恐城低嶺高不利於守遂

令土兵掘斷深八尺餘得銅秤一銅尺一銅神像一城  
隨不保今宜禁其車馬廣培樹木自能隆起漸復矣

坊表

文獻名邦

迎恩  
寺前

迎暉坊

東城  
內

清遠坊

西城  
內

阜安坊

南城  
內

永貞坊

北城  
內

鎮遠坊

正  
衙

以上城寰今俱廢

肅僚

貞度

察院

內綏滇海

外控交彝

道前

內臺秉憲

一方綱紀

巡道前

天南鎖鑰



忠愛府堂

勉學天下長者

府川堂 國朝  
知府程應熊立

體國

保民

富教堂

州堂 國朝  
知州李瀕立

以上官衙

父子進士

爲羅晟  
羅珣建

滇南鎖鑰

爲王  
呆建

青鎖開先

世科衍盛

爲曾  
瑄建

都諫

爲劉  
洙建

禮樂苗裔

爲邢  
幹建

粉署青階

爲李文  
中建

都諫

爲楊  
僎建

柏臺錫命

文武齊芳

爲馮良  
知建

黃榜傳芳

青雲接武

爲萬文  
彩建

翰林坊

爲李遇  
元建

恩綸六錫

兩誥褒封

聖朝特寵

太微法象

都憲綱維

龍章六錫

誥榮十二代二品

勅封開國三元勳

褒綸寵命

勅賜忠勳

以上爲王  
恩民建

叅藩川北

秉憲湖南

黔省專藩

三省藩臬

西土保釐

以上爲王  
來賢建

內臺都憲

統均名宰

父子堂鄉

麟袍玉帶

金馬黃門

賜一品服

以上爲蕭  
崇業建

榆城鎖鑰

爲鄒印  
啓立

甲榜同登

中州秉憲

爲向  
僕立

中原大夫

爲葉祖  
堯建

名世天鄉

綸命頻頒

節鉞上鄉

問璽近臣

南宮首選

詞林獨步

玉堂青鎖

金馬黃門

以上爲包  
見捷立

鸞坡驄馬

石坊  
今存

恩褒執法

憲肅巡方

諫垣清秩

方岳崇階

玉署蘭臺

以上爲  
佾祺建

龍門三躍

中丞開府

父子兄弟恩榮

以上爲慶  
大亨建

七進士坊

爲龔廷璧朱道南段上錦夏啓  
昌萬永康朱國昌台汝礪建

地官坊

爲王  
璟立

地官坊

爲葉  
瑞建

世薦賢書

爲鄒星鄒  
學孔立

玉堂重望

爲鄔高  
明立

兵憲 地官坊

地官大夫

爲任之  
良建

司徒大夫



父子登科

爲雷學尹  
雷整建

玉堂偉望

爲鄒魯  
源建

瑞擁韓雲

爲鄒魯  
沂立

御誥恩榮

天官秉憲

秩宗品典

以上爲李  
思份建

科貢濟美

爲馮良  
能建

績懋翼黃

爲鄒躍  
龍立

清節名臣

東川秉憲

浩然正氣

凌雪喬松

以上爲  
劉彪立

三鳳齊鳴

三老承寵

四科賢俊

萬里登庸

共一  
坊

總兵坊

爲萬  
鰲建

江孝子墓

在城北一里孝子不知何里人任本府通判有孝行天順庚申卒葬於此上題臨安別駕孝子江惠墓

王孝子墓

在西莊馬坊

龔孝子墓

在城東北廠

節烈薛女六姐墓

在城西

烈女樊氏墓

在迎恩寺

義

塚

一在北廠一在老鸚樹一在碗窰一在表忠祠旁乃丁亥罹流寇之難以死者也二十萬餘尸橫遍野兵道熊啓宇燬而壘之

國朝定鼎庠生鄒應泰等呈請申詳督撫疏 題

旌表曰義塚郡人劉彪捐置祭田春秋致祭

周禮邦墓有制命官掌之建於兵燹後塚壘草綠牧臥牛  
眠悲天然有葬緣恩遇祀由義舉例應特書以昭奕禩

外傳

寺觀

玉皇閣

在城內東萬曆年間少宰包見捷建丁亥焚燬僧養元募叅將楊祿重修雍正八年正殿圯蘇達周朝偉等倡衆修補

東嶽廟

在城內東總兵王洪仁重修

天王寺

在城內東南元時建成化間萬城重修明末守將改遷

指林寺

在城內府治西相傳宋末人見一鹿因率衆迹之俄一異人出指其林曰鹿處此山久矣無庸追捕言畢不見衆驚以爲神因立祠祀之歷元何昌明及明溫成殿宇始弘廠壯麗遂以指

林爲名有第一山匾額書法精妙傳爲建文帝遺筆

接待寺

在城東元百戶趙益辭職爲僧以其居室爲庵竝施田以贍僧故名明崇禎四年焚燬康熙十一年僧清虛募衆重修

地藏寺

在城東明正德十一年郡人王環建

香林寺

在城東北三十里元時建環山帶溪有溫泉焉萬曆中郡人曾倬重修

迎恩寺

在城東明萬曆三十一年少宰包見捷倡建僧淨極重修

桂香閣

在迎恩寺前形家言聚風氣宜有所鎮郡人蕭崇業建

東林寺

在城東北原名諸天寺元時建明正統中周彥修嘉靖三十二年知府章士元易今名康熙二十六年知府黃明僧淨壽真乳真培

重建

半閒亭

在東林寺知府章士元建有因過竹院逢僧話又得浮生半日閒倡和詩

圓淨庵

在城東僧  
海鶴重修

無遮庵

在城  
東

彌陀庵

在城  
南

海會寺

在城東二里  
僧道光重修

巖溪寺

在城東十里明萬曆中建舊名  
淨光寺知府栗爾璋易今名

蓮池寺

在城東三里郡紳馬一荀地康熙四十  
五年僧眞演居民李先聲杜聯登等建

東山寺

在城東巖洞山康熙五十  
一年鄉民李一山同衆募建

延福寺

在城東

南林寺

在城南

華嚴寺

在城北五里明知府賴璞重修舊志八景曰北岡華刹

普庵寺

在城北明正統僧悟空創建崇禎年間燬僧大任募衆重修

興化寺

在城北永樂間建

三元宮

在城內西

馬王廟

在城內北



火神廟

在城中

聖母祠

在城北二里鄉  
人祈嗣之所

五顯廟

在城北碗窰相傳其  
地多虎立廟鎮之

晏公廟

在城東  
元時建

蕭公廟

在城東明崇禎間江右臨瑞二府  
府人建年久圯今豫省人重修

九靈廟

在城東  
小石橋

燃燈寺

在城東北明嘉靖建  
兵火燬僧海義募修

法雲寺

在城西  
十五里

月印寺

在城西  
十五里

三教寺

在城西  
五里

天華山

在城西南  
二十里

老李洞

在城西南  
二十里

乾離洞

在城南二十里乾離  
道人修煉處故名

萬明寺

在城西醫官  
王用賓重修

西山寺

在城西舊名西天寺

大乘寺

在城西團山知微創普勻立泉甘林茂別有幽致

西林寺

在城西明崇禎中建

無垢寺

在城南明嘉靖中建

青蓮寺

在城南瓶自宋元古刹也明重修郡人包繼肅有記清幽絕塵遊人忘倦

觀音閣

在城西南

三清觀

在曲江沙壩知府黃明鄉人祝檜建

系有委乃司司

紹和山

在曲江  
侯家營

集雲庵

在城東四十  
里冷水溝

興聖寺

僧圓相創業雲  
龍諸刹自此闢

準提閣

開化寺

一佛殿

草庵

觀音閣

紫極宮舊址知  
州陳肇全建



三元宮

靜室

紫極宮

在雲龍山頂康熙三十年知府黃明因形家言謂舊址於府城不利遂改建 以上雲龍山

千佛寺

在城北三十里

金華寺

在城西十里僧海灝建

龍泉寺

曲江有二一在東山一在右所

白雲庵

在曲江六龍山

西竺寺

在曲江二十里僧慧心建

寶嚴寺

在曲江十里  
僧慧心修建

三寶寺

在曲江十五  
里僧慧心建

法華寺

在曲江十五  
里僧慧心建

仙釋

僧溫成

號大機香林指林兩寺住持  
悟心性參禪理壽一百二十

衍成

號鐵航接待寺住持通曉佛法專精戒律嘗作偈曰鐵航  
渡苦海蝦蟆上樹枝若能悟此理便是出塵時壽八十二

廣度

號卓然子姓曾名倬嘉靖甲子舉人任瀘溪教諭陞本縣令三任  
瀘溪有政教聲掛冠遊南海歸隱香林寺祝髮建玉皇閣開石屏

鏡湖洞建水月寺與侍御許鑑詩酒往

來靜坐斗室有詩文行世尤精書法

洪 度

姓李名宗望建水人萬曆戊午舉人任原武縣令後遊昆明於高嶢太史祠祝髮住天目山精戒律載鷄足志

楊道泰

郡人生而愚有至性惟採樵供父母有香林寺止二僧本實本貴道泰往削髮名真誠三人不輕出山門耕田無牛則本貴真誠曳犁本實掌犁而耕下山放水嘗遇虎誠以手推去若驅牛然後實年八十餘真誠六十餘相繼化去貴入峩嶺山不知所終

姚 成

郡人少孤磊落不羈嘗慕神仙冲舉之術人勸之娶笑不應俄遇異人飲以酒香氣馥郁仰窺天表若有所見遂能言風雨陰晴及休咎狀往往奇中居北門濠下土橋中手拏一芭蕉葉四時長青一日晨起戲爲宦家致書燕邸比暮果索手筆以歸人咸異之延以供養不受嘗戲翻壺等器後不知所終相傳郡紳蕭公崇業奉使琉球遇之海上又或有於衡山桂林見之者

楊善哉

明末廣西府唐仙高弟也寓雲龍山一佛殿傍恆裸體或數日一食或一日數食喜看書每冬寒浴澗水中夏暖圍爐人問以道輒云善哉善哉故名居三載遊府城普庵寺先日云吾將歸去矣次早沐浴而終

李金階

字建白修癯八尺餘方瞳爛爛清光射人吐音洪亮性篤孝嗜學爲諸生精治易從遊者衆親歿蕭然有出塵志散生徒鋤園汲水口咄咄自語若有所遇避跡荒山頽然長卧經月不食不飢一餐斗粟不飽飲酒數石不醉親戚叩之不答數年忽起坐怡然嘯咏飲酒賦詩求詩者絡繹頃刻揮洒以去言多奇中奉爲藥石嘗嘆酒潑墨紙上成山水雲物鳥獸狀城南有石洞中伏巨蟒傷人李住居害遂絕坐卧惟片石隆冬盛雪赤身僵卧石上乙亥除夕題詩有明年辭別舊家鄉誰道前途無知己句逾歲不飲食一日命具湯浴晨起整衣冠危坐曰日出當去矣遂逝



## 把善士

建水人天啓初年夜夢神云汝師在寺內何不訪次晨過燃燈古刹見一鶉衣百結者叩懇至月餘乃教之曰予宋時人今已五百歲矣黑夜看細字不差遂密傳其道於把而去  
後把養父母終卽辭家飄然往終南山不出

## 空元女釋

本王氏自幼喜禪靜坐不華飾聞有議婚者泣卧不食父異之不相強年十四祝髮家居不見外人父母歿依其兄兄歿依姊五十餘年獨坐一室氣清神朗若有所得  
尤善化誨人聽者感悟一夕瞑目坐逝年七十七

## 清集

本名家子幼習詩書遇異人曰汝出家乃可免難遂往雞足爲僧歸於雲龍興聖寺果脫了亥難靜持幾六十年不履城市博極典奧年九十而逝

新修本草卷之八

建  
7K  
二)

新修本草  
卷之八  
PDG

祥異

易占吉凶書徵休咎由來尚矣人事乖而天譴見政令修而瑞物臻董子曰善言天者必有驗於人善言古者必有驗於今此不易之理也建之先荒遠無聞故志祥異斷自明始志祥異

祥

嘉禾

正統九年城南產嘉禾一莖三穗者一畝

瑞蓮

嘉靖辛酉年城北書屋產瑞蓮是科鄉薦十人九登科

芝草

萬曆十一年芝草生

鄉雲

二十四年  
五色雲見

祥雲

康熙二十九年正月初一  
日祥雲見於東自卯至辰

日月合於營室五星連如貫珠

雍正三年二  
月初一日

嘉穀

雍正五年城南產嘉穀有  
一莖四穗五穗者數畝

異

水旱

永樂十二年水  
旱米價騰湧

大風雨

弘治十一年夏六月朔五日風雨寒劇  
樵蘇死於道者數十人鳥雀僵死無計

地震

十八年地震自北而南  
晝夜常震半年始寧

旱蝗

二十六年自春越夏不雨有蟲  
如螟傷苗翠鴉食之爲雷擊死

地震

正德八年地震有  
聲如雷三月乃止

熒惑

二十年三月十六日熒惑入鬼宿土禽四出四月十四日夕  
有大星自西而東光燭民屋其年征元江布政使徐樾死之

雷震

隆慶五年雷震城東碎其  
旗竿木屑飛洒官民店舍

不雨

萬曆五年春夏不雨  
斗米三錢民多殍

雞異

九年秋北關有雞雛正中一  
目冠巨羽毛皆具遂能司晨

地震鳴

十六年閏六月十八日建水曲江同日  
地震有聲如雷山水摧烈河水溢流

大風

十九年二月大風  
拔木揚沙翻屋瓦

豹異

二十一年有  
豹入南門

雨雹

二十八年冬大  
雨雹瀘江堤決

大水

三十年冬大  
水決河堤

不雨

三十一年正月  
不雨至六月

豬異

三十一年三月東關產一  
豬兩首二身八足一尾

霖雨

三十一年七月  
雨六十餘日

不雨

三十二年三月  
不雨至六月

地震變

三十四年十一月丙寅朔地震日晡時起殷殷如雷聲以漸而盛  
傾城垣梵宇官府及民舍殆盡民皆露處哀痛之聲日夜不絕死

者數千人每一動時人皆昂首號天萬犬齊

吠月中震時如有一人搖白扇者數月乃止

風暴

順治三年丙戌三月暴風大作吹落  
東城內迎暉坊次年五月流寇陷城

獸異

順治四年東山原有里猪甚巨入於寨  
堡內五月十八日流寇至慘殺無算

星隕

順治十八年有大星墜  
於西方小星從者如雨

蝶翼

順治十八年有小白蝶日每數萬逐隊奔飛自東南過西北月餘方止

大水

康熙二十四年大水濶江堤決沖沒田地房屋

雷震

二十七年五月十六日雷震州署擊碎屋脊獸頭

夏旱

二十八年不雨是歲無秋

大雨水

三十二年六月大雨河決淹西南一帶民田廬舍



建水州志卷之十

歷代

宸翰

易曰天風垢后以施命誥四方記曰王言如絲王言如  
綸故典謨所垂天章聖藻千古維昭建自肄籍以來經  
元與明玉音接下普被邊徼惟我

朝文誥獨邁往古

列聖汗號緯地經天

皇上睿慮益周煌煌天語焜耀詳切帝典王謨於今爲盛  
凡我臣工士庶敢不肅承祇守歟至名臣請奏條議皆

關大典并彙之簡端以光志乘

御製

元成宗追封至聖詔

蓋聞先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也朕纂承不緒敬仰休風循治古之良規舉追封之盛典加號

大成至聖文宣王遣使闕里祀以大牢於戲父子之親君臣之義永惟聖教之尊天地之大日月之明奚罄名言之妙尙資神功助我皇元

明

太祖諭約

孝順父母

尊敬長上

和睦鄉里

教訓子孫

各安生理

勿作非爲

頒宋高宗戒石銘於州署

爾俸爾祿

民膏民脂

下民易虐

上蒼難欺

國朝

世祖章皇帝條教生員臥碑

順治九年頒

朝廷設立學校選取生員免其丁糧厚以廩膳設學院學

道學官以教之各衙門官以禮相待全要養成賢才以  
供

朝廷之用諸生各當上報

國恩下立人品所有條教開列於後

一生員之家父母賢智者子當受教父母愚魯或有非  
爲者子既讀書明理當再三懇告使父母不陷於危  
亡

一生員立志當學爲忠臣清官書史所載忠清事蹟務  
須互相講究凡利

國愛民之事更宜留心

一生員居心忠厚正直讀書方有實用出仕必作良吏  
若心術邪刻讀書必無成就爲官必取禍患行害人  
之事往往自殺其身常宜思省

一生員不可干求官長交結勢要希圖進身若果心善  
德全上天知之必加以福

一生員當愛身忍性凡有司官衙門不可輕入如有切  
己之事止許家人代告不許干與他人詞訟他人亦  
不許牽連生員作證

一生員當尊敬先生若講說皆須誠心聽受如有未明  
從容再問無妄行辨難爲師者亦當盡心教訓勿致

怠惰

一軍民一切利弊不許生員上書陳言如有一言建白以違制論黜革治罪

一生員不許糾黨立盟結社把持官府武斷鄉曲所作

文字不許妄行刊刻違者聽提調官治罪

祖仁皇帝諭

康熙十九年頒

第一條敦孝弟以重人倫

第二條篤宗族以昭雍睦

第三條和鄉黨以息爭訟

第四條重農桑以足衣食

- 第五條尙節儉以惜財用  
第六條隆學校以端士習  
第七條黜異端以崇正學  
第八條講法律以儆愚頑  
第九條明禮讓以厚風俗  
第十條務本業以定民志  
第十一條訓子弟以禁非爲  
第十二條息誣告以全良善  
第十三條戒窩逃以免株連  
第十四條完錢糧以省催科

第十五條聯保甲以弭盜賊

第十六條解讎忿以重身命

至聖先師孔子贊并序

康熙二十五年

蓋自三才建而天地不居其功一中傳而聖人代宣其蘊有行道之聖得位以綏猷有明道之聖立言以垂憲此正學所以常明人心所以不泯也粵稽往緒仰邇前徽堯舜禹湯文武達而在上兼君師之寄行道之聖人也孔子不得位窮而在下秉刪述之權明道之聖人也行道者勳業炳於一朝明道者教思周於百世堯舜禹湯文武之後不有孔子則學術紛淆仁義壅塞斯道失



傳也久矣後之人而欲探二帝三王之心法以爲治國  
平天下之準其奚所取衷焉然則孔子之爲萬古一人  
也審矣朕巡省東國謁祀闕里景企滋深敬摛筆而爲  
之贊曰

清濁有氣剛柔有質聖人參之人極以立行著習察舍  
道莫由惟皇建極惟后綏猷作君作師垂統萬古曰惟  
堯舜禹湯文武五百餘歲至聖挺生聲金振玉集厥大  
成序書刪詩定禮正樂既窮象繫亦嚴筆削上紹往緒  
下示來型道不終晦秩然大經百家紛紜殊途異趨日  
月無踰羹牆可晤孔子之道惟中與庸此心此理千聖

所同孔子之德仁義中正兼彝之好根本天性庶幾夙  
夜勗哉令圖遡源洙泗景躅唐虞載歷庭除式觀禮器  
摘毫仰贊心焉遐企百世而上以聖爲歸百世而下以  
聖爲師非師夫子惟師於道統天御世惟道爲寶泰山  
巖巖東海泱泱牆高萬仞夫子之堂孰窺其藩孰窺其  
徑道不遠人克念作聖

顏子贊

康熙二十八年

聖道早聞天資獨粹約禮博文不遷不貳一善服膺萬  
德來萃能化而齊其樂一致禮樂四代治法兼備用行  
舍藏王佐之器

曾子贊

洙泗之傳魯以得之一貫曰唯聖學在茲明德新民止善爲期格致誠正均平以推至德要道百行所基纂承統緒修明訓辭

子思子贊

於穆天命道之大原靜養動察庸德庸言以育萬物以贊乾坤九經三重大法是存篤恭慎獨成德之門卷之藏密擴之無垠

孟子贊

哲人既萎楊墨昌熾子輿闢之曰仁曰義性善獨闡知

言養氣道備臺舜學屏功利煌煌七篇並垂六藝孔學  
攸傳禹功作配

耕織圖序

康熙三十五年春二月頒

朕早夜勤懋研求治理念生民之本以衣食爲天管讀  
爾風無逸諸篇其言稼穡蠶桑織悉其備昔人以此被  
之管絃列於典誥有天下國家者洵不可不留連三復  
於其際也西漢詔令最爲近古其言曰農事傷則饑之  
本也女紅害則寒之源也又曰老者以壽終幼孤得遂  
長欲臻斯理者舍本務其何以哉朕每巡省風謠樂觀  
農事於南北土疆之性黍稷播種之宜節候蚤晚之殊

蝗蝻捕治之法素愛諮詢知此甚晰聽政時恆與諸臣  
工言之於豐澤園之側治田數畦環以溪水阡陌井然  
在目桔槔之聲盈耳歲收嘉禾數十鍾隴畔樹桑傍列  
蠶舍浴繭練絲恍然如茅簷蔀屋因構知稼軒秋雲亭  
以臨觀之古人有言衣帛當知織女之勞食粟當念農  
夫之苦朕惓惓於此至深且切也爰繪耕織圖各二十  
三幅朕於每幅製詩一章以吟咏其勤苦而書之於圖  
自始事迄終事農人胼手胝足之勞蠶女繭絲機杼之  
瘁咸備極其情狀復命鏤板流傳用以示子孫臣庶俾  
知粒食維艱授衣匪易書曰惟土物愛厥心臧庶於斯

圖有所感發焉且欲令寰宇之內皆敦崇本業勤以謀之儉以積之衣食豐饒以共躋於安和富壽之域斯則朕嘉惠元元之至意也夫

訓飭士子文

康熙四十年

國家建立學校原以興行教化作育人才典至渥也朕臨馭以來隆重師儒加意庠序近復慎簡學使釐剔弊端務期風教修明賢才蔚起庶幾樸棫作人之意乃比來士習未端儒效罕著雖因內外臣工奉行未能盡善亦由爾諸生積痼已久猝難改易之故也茲特親製訓言再加警飭爾諸生其敬聽之從來學者先立品行次

及文學學術事功源委有敘爾諸生幼聞庭訓長列宮  
牆朝夕誦讀寧無講究必也躬修實踐砥礪廉隅敦孝  
順以事親秉忠貞以立志窮經考義勿雜荒誕之談取  
友親師悉化憍盈之氣文章歸於醇雅母事浮華軌度  
式於規繩最防蕩軼子衿佻達自昔所譏苟行止有虧  
雖讀書何益若夫宅心弗淑行已多愆或蜚語流言脇  
制官長或隱糧包訟出入公門或唆撥姦猾欺孤凌弱  
或招呼朋類結社要盟乃如之人名教不容鄉黨弗齒  
縱倖脫褫朴濫竊章縫返之於衷能無愧乎况乎鄉會  
科名乃掄才大典關係尤鉅士子果有真才實學何患

因不逢年願標榜虛名暗通聲氣夤緣遇罔顧身家  
又或改竄鄉貫希圖進取嚮凌騰沸網利營私種種弊  
端深可痛恨且夫士子出身之始尤貴以正若茲厥初  
拜獻便已作姦犯科則異時敗檢踰閑何所不至又安  
望其秉公持正爲國家宣猷樹績膺後先疏附之選哉  
朕用加惠爾等故不禁反復惓惓茲訓言頒到爾等務  
共體朕心恪遵明訓一切痛加改省爭自濯磨積行勤  
學以圖上進國家三年登進東帛弓旌不特爾身有榮  
卽爾祖父亦增光寵矣逢時得志寧事他求哉若乃視  
爲具文玩愒勿做毀方躍冶暴棄自甘則是爾等冥頑



無知終不能率教也既負栽培復干咎戾王章具在朕  
不得爲爾寬矣自茲以往內而國學外而直省鄉校凡  
學臣師長皆有司鐸之責者並宜傳集諸生多方董勸  
以副朕懷否則職業弗修咎亦難逭勿謂朕言之不預  
也爾多士尙敬聽之哉

今

上聖諭廣訓序

雍正二年頒

書曰每歲孟春適人以木鐸徇於路記曰司徒修六  
禮以節民性明七教以興民德此皆以敦本崇實之  
道爲牖民覺世之模法莫良焉意莫厚焉我

聖祖仁皇帝久道化成德洋恩普仁育萬物義正萬民六十年來宵衣旰食祇期薄海內外興仁講讓革薄從忠共成親遜之風永享昇平之治故

特頒上諭十六條曉諭八旗及直省兵民人等自綱常名教之際以至於畊桑作息之間本末精粗公私鉅細凡民青之所習皆

睿慮之所周視爾編氓誠如赤子

聖有謨訓明徵定保萬世守之莫能易也朕纘承大統臨御

兆人以

聖祖之心爲心以

聖祖之政爲政夙夜黽勉率由舊章惟恐小民遵信奉行久而或怠用申誥誠以示提撕謹將

上諭十六條尋繹其義推衍其文共得萬言名曰

聖諭廣訓旁徵遠引往復周詳意取顯明語多直樸無非奉先志以啓後人使羣黎百姓家喻而戶曉也願爾兵民人等

仰體

聖祖正德厚生之至意勿視爲條教號令之虛文共勉爲謹身節用之庶人盡除夫浮薄囂凌之陋習則風俗醇厚家室和平在朝廷德化樂觀其成爾後嗣子孫並受其福積善之家必有餘慶其豈或爽哉

平定青海告成太學碑

雍正二年五月十七日頒

我

國家受

天眷命撫臨八極日月所照罔不臣順遐邇乂安兆人蒙福  
乃有羅卜藏丹津者其先世固始汗自國初稽首歸  
命當時使臣建議畀以駐牧之地其居雜番羗密近  
甘涼我

皇考聖祖仁皇帝睿慮深遠每廛於懷既

親御六師平定朔漠威靈所加胥海部落札什巴圖兒等震

誓承命

聖祖仁皇帝固沛殊恩封爲親王兄弟八人咸賜爵祿羈縻  
包容示以寬大而狼心梟性不可以德義化三十年  
來包藏異志朕紹登寶位優之錫賚榮其封號尙冀  
革心輯寧部衆而羅卜藏丹津昏謬狂悖同黨吹拉  
克諾木齊阿爾布坦溫布藏巴札布等實爲元惡謂  
國家方弘浩蕩之恩不設嚴密之備誕敢首造逆謀  
迫脅番羌侵犯邊城反狀彰露用不可釋於天誅遂  
命川陝總督太保公年羹堯爲撫遠大將軍聲罪致  
討以雍正元年十月師始出塞自冬涉春屢破其衆  
凡同叛之部落戈鋌所指應時摧敗招降數十萬衆

又降其貝勒貝子公台吉等二十餘人朕猶憫其蠢  
愚若悔過思愆束手來歸尚可全宥而怙惡不悛負  
險抗違乃決剪滅之計以方略密付大將軍羹堯調  
度軍謀簡稽將士用四川提督岳鍾琪爲奮威將軍  
於仲春初旬褫平徂征分道深入搗其窟穴電掃風  
驅搜剔巖阻賊徒倉皇糜潰窮蹙失據羅卜藏丹津  
之母及逆謀渠魁悉就俘執擒獲賊衆累萬牲畜軍  
械不可數計賊首逃遁我師踰險窮追獲其輜重人  
口殆盡羅卜藏丹津子身易服竄匿荒山殘喘待斃  
自二月八日至二十有二日僅旬有五日军士無久

役之勞內地無轉輸之費克奏膚功永清西徼二月  
之朔奏凱旋旅饒鼓喧轟士衆訢喜四月十有二日  
以倡逆之吹拉克諾木齊等三人獻俘

廟

社受俘臣民稱慶伏念

聖祖仁皇帝威靈震於遐方福慶流於奕葉用克彰皇六師  
殄滅狂賊行間將士亦由感激

湛恩厚澤爲朕踴躍用命斯役也芟夷凶悖綏靖番羗俾烽  
燧永息中外人民胥享安阜實成

先志以懋有不績廷臣上言稽古典禮出征而受成於學所

系  
以定兵謀也獻馘而釋奠於學所以告凱捷也宜刊  
諸珉石碣於太學用昭示於無極遂爲之銘曰

天有雷霆聖作弧矢輔仁而行威遠寧邇維此青海  
種類實繁錫之茅土列在藩垣被我龍光位崇祿富  
負其阻遐禍心潛搆恭惟

聖祖慮遠智周睠念荒服綏撫懷柔朔野旣清西陲攸震爵  
號洊加示之恩信如何凶狡造謀逆天鼓動昏憝寇  
侵於邊惟彼有罪自干天罰桓桓虎貔爰張九伐王  
師卽路冬雪初零日耀組練雷響鞞鉦蠢茲不順敢  
逆戎旅奮張螳臂以當齊斧止如山岳疾如雨風我



戰則克賊壘其空彼昏終迷曾不悔戾當翦而滅斯  
焉決計厲兵簡將往搗其巢踰歷嶽嶠坦若坳郊賊  
棄其家我繫而獲牛馬谷量器仗山積蹇兔失窟何  
所逋逃枯魚遊釜假息煎熬師以順動神明所服旬  
日凱歸不疾而速殪彼逆謀懸首藁街獻俘成禮金  
鼓調諧西域所瞻此惟雄特天討既申羣酋惕息橐  
戈偃革告成辟雍聲教遐暨萬國來同惟我

皇祖親平大漠巍功煥文邁桓軼酌流光攸久視此銘辭繼  
志述事念茲在茲

雍正元年三月十五日奉

上諭內閣禮部

至聖先師孔子道冠古今德參天地樹百王之模範立萬世之宗師其爲功於天下者至矣而水源木本積厚流光有開必先克昌厥後則聖人之祖考宜膺崇厚之褒封所以追溯前徽不忘所自也粵稽舊制孔子之父叔梁公於宋眞宗時追封啓聖自宋以後歷代遵循而叔梁公以上則向來未加封號亦未奉祀祠庭朕仰體

皇考崇儒重道之盛心修崇德報功之典禮意欲追封五代並享烝嘗用伸景仰之誠庶慰羹牆之慕內閣禮部

可會同確議具奏欽此該臣等謹議

至聖先師孔子秉生安之至德集金玉之大成道備一身教垂萬葉歷代雖有尊崇之禮而自啓聖公以上封號未加祀典未備我

皇上作君作師傳心傳道孝思不匱弘施錫類之恩慕德無窮推廣報功之典以孔子爲百代之師晉先世以尊榮之號

特頒諭旨追封五代並享烝嘗此誠曠古未有之異數也臣等謹遵典禮詳考世系

孔子之五世祖木金父公自宋遷魯始姓孔氏高祖祈

父公曾祖防叔公祖伯夏公父叔梁公凡五代除叔  
梁公應照舊封啓聖外木金父公至伯夏公四代皆  
應追封公爵臣等謹擬木金父公追封爲肇聖公祈  
父公追封爲裕聖公防叔公追封爲詒聖公伯夏公  
追封爲昌聖公卽於啓聖公祠內安設神牌按昭穆  
位次每年春秋致祭其牲牢酒醴籩豆簠簋每神位  
前各照啓聖公例陳設其啓聖祠向係專祀叔梁公  
故以啓聖公爲名今

聖廟異數合祀五代擬更名爲崇聖祠俟

命下之日將追封字樣通行國子監順天府直省府州縣

衛學及衍聖公一體遵行至欽奉

上諭一道應頒行國子監及闕里勒石廟庭以光

盛典其追封誥命交與內閣撰擬國子監之啓聖祠改造匾額添設神牌祭器等項交與工部俟造完之日交欽天監擇吉入廟其餘各省行令該地方官各行辦理可也等因於雍正元年三月二十七日題四月十八日大學士馬 等啓奏摺本奉

上諭五倫爲百行之本天地君親師人所宜重而天地君親之義又賴師教以彰明自古師道無過於孔子誠首出至聖也我

皇考崇儒重道超軼千古凡尊崇孔子典禮無不備至朕蒙  
考教育自幼讀書心切景仰欲再加尊崇更無可增之處  
故勅部追封孔子以上五代今部議封公上考前代  
帝王皆有推崇之典唐明皇封孔子爲文宣王宋眞  
宗加封至聖文宣王聖父叔梁紇爲齊國公元加封  
孔子爲大成至聖文宣王加封齊國公爲啓聖王至  
明嘉靖時猶以王係臣爵改稱爲至聖先師孔子改  
聖王爲聖公王公雖俱屬尊稱朕意以爲王爵較尊  
孔子爲五世應否封王之處着問諸大臣具奏欽此  
該臣等會議得明倫闡教治世之大經崇德報功右

文之盛典歷稽史冊紀載之文皆有推尊孔子之禮  
至

聖祖仁皇帝重道崇儒典章明備我

皇上因心仁孝好古敏求統道法之淵源以光大爲繼述  
謂倫常爲百行之本原至聖立萬世之師表

特諭追封五代典禮以極優隆猶以公爵之尊未若王爵  
復降

諭旨廣賜諮詢臣等欽承之下深服

聖裁允當衆議僉同請自叔梁公以上至木金父公凡五  
代并追封爲王爵謹擬追封木金父公爲肇聖王祈

父公爲裕聖王防叔公爲詒聖王伯夏公爲昌聖王  
叔梁公爲啓聖王入廟之日國子監及闕里各遣大  
臣一員讀文祭告祭文翰林院撰擬祭品照例備辦  
餘俱照原議仍將追封王爵

上諭一并頒發勒石可也

諭知州知縣朕惟國家首重吏治爾州牧縣令乃親民之  
官吏治之始基也貢賦訟獄爾實司之品秩雖卑職  
任綦重州縣官賢則民先受其利州縣官不肖則民  
先受其害膺茲任者當體朝廷惠養元元之至意以  
愛民爲先務周察葺屋綏輯鄉里治行果有其實循



卓自有其名非內聚賄而外干譽謂之名實兼收也  
全省吏治如作室然督撫其棟梁也司道其垣墉也  
州縣其基址也書云民惟邦本本固邦寧夫所以固  
邦本者在吏治而吏治之本在州縣苟州縣之品行  
不端猶基不立則室不固庸有濟乎

考臨御六十一年灼知州縣之重特行引見咨詢明試至  
詳至慎其有廉能之員每不次超擢以示鼓舞今海  
內羣黎皆

皇考所懷保朕膺

宗社重寄思繼

皇考之治功惟爾州縣具有父母斯民之責其爲朕立之基址以固邦本焉誠能潔己奉公實心盡職一州一縣之中興仁興讓教孝教忠物阜民安刑清訟簡朕將升之朝宁用作股肱如或罔念民瘼恣意貪婪或廢削肥家或濫刑逞虐或借刻以爲清或恃才而多事或諂媚上司以貪位或任縱胥吏以擾民或徇私逞欲以上虧國帑王章具在豈爾貸與更有任州縣時私肥己橐而漫云且俟顯要方立名節者其與初市清名晚而改操之人何以異哉至於錢糧關係尤重絲毫顆粒皆百姓之膏脂增一分則民受一分之累

減一分則民需一分之澤前有請暫加火耗抵補虧空帑項者

皇考示諭在廷不允其請爾諸臣共聞之矣今州縣火耗任意加增視爲成例民何以堪乎嗣後斷宜禁止或被上司察核或被科道糾叅必從重治罪決不寬貸夫欲清虧空之源莫如節儉正直節儉則用無不足正直則上官不可干以私若朘小民之生以飽上官之貪欲冒不測之罪以快一時之奢侈豈砥礪廉隅爲民父母之道乎爾州縣等官其恪共乃職毋貽罪戾勿謂地遠官卑朕不及察特諭

諭直省督撫等官朕惟撫養元元之道足用爲先朕自臨御以來無刻不廛念民依重農務本業已三令五申矣但我國家休養生息數十年來戶口日繁而田土止有此數非率天下農民竭力耕耘兼收倍穫欲家室盈寧必不可得周官所載巡稼之官不一而足又有保介田畷日在田間皆爲課農設也今課農雖無專官然自督撫以下誰不兼此任也其各督率有司悉心相勸并不時咨訪疾苦有絲毫妨於農業者必爲除去仍於每鄉中擇一二老農之勤勞作苦者優其獎賞以示鼓勵如此則農民知勸而惰者可化爲

勤矣在舍旁田畔以及荒山不可耕種之處度量土宜種植樹木桑柘可以飼蠶棗栗可以佐食梓桐可以資用卽榛楛雜木亦足以佐炊爨其令有司督率指畫課令種植仍嚴禁非時之斧斤牛羊之踐踏奸徒之竊盜亦爲民利不小至孳養牲畜如北方之羊南方之豕牧養如法乳字以時於生計不無裨益總之小民至愚經營衣食非不迫切而目前自然之利反多忽略所賴親民之官委曲周詳多方勸導庶使踴躍爭先人力無遺而地利始盡不惟民生可厚風俗亦可還淳爾督撫等官各體朕惓惓愛民之意實

心奉行倘視爲具文苟且塗飾或反以擾民則尤不可也特諭雍正二年二月初九日

耕藉田

上諭直省總督巡撫等自雍正二年以來朕躬耕藉田而藉田之中每歲必產嘉穀上年自雙穗至於九穗今歲則自雙穗至於十三穗在廷諸臣及京都耆庶皆驚訝以爲奇朕之宣示於衆者並非矜詡誇張以爲祥瑞蓋實有見於天人感召之理捷於影響而朕敬天之心至誠至切願與大小臣工共勉之也稼穡爲天地之寶實生民之命攸關我

聖祖仁皇帝臨御六十餘年無刻不以重農力穡爲先務仰觀天時俯察地理辯土性而課人功咨雨暘而防旱潦旰食宵衣偶遇雨澤愆期

聖心憂勞之切侍側臣子皆惶悚不寧所以爲萬民謀粒食者至矣盡矣朕瞻仰目覩者四十餘年今纘承大統竭誠效法念切民依每年虔祀

先農躬耕帝藉仰蒙

上天眷佑豐錫嘉禾信而可徵纖毫不爽是以特頒

諭旨令各省守土者舉耕藉之禮爲萬方百姓祈禱秋成今見各省督撫奉報前來處處風雨均調春麥秋禾

並登豐稔雖邊遠荒僻之地亦慶有秋惟直隸湖廣  
安徽數州縣近水最低之處常年被淹者略有浸注  
亦不爲災是今歲可稱大有年矣朕感

上天之垂慈慶下民之受福而推求其故良由今年各省初  
耕藉田各該有司自然小心敬慎齋祓虔誠是以感  
格

上蒼而獲此盈寧之錫倘從此益加敬謹不懈初心則歲歲  
屢豐可以預必爾督撫等可通曉諭所屬軍民當凜  
帝鑒之匪遙勿視耕田爲故事永矢敬恪以迓

天和天下臣民受福斯朕之福也思之慎之母忽朕言特諭



奏議

增解額奏疏

巡撫石文晟

爲遵方文教大開

盛代賓興宜廣乞恩題增解額以溥

皇仁以弘雅化事奉府道司 督撫部院憲檄准禮部等衙

門會議得 雲南巡撫石 疏稱滇居天末昔以士子

甫離兵燹不暇詩書文風未盛今蒙

皇上右文教養兼摯雲蒸豹變實繁有徒禮闈會試將四川

雲南分爲中左四川取中四十二名雲南取中二十七

名同一中左取額懸殊相應請照四川之額遴取四十

二名以勵邊地人才至文武並重自應並請

洪恩一例廣額等因具題前來查本年三月內貴州巡撫  
閻興邦爲同文之教澤已久遐方之人才漸盛等事一  
疏禮部以無庸議題覆奉

旨貴州取中舉人着照該撫所題增額欽遵在案今該撫所  
題雲南省文武鄉試增額之處亦應如其所請照四川  
例取中四十二名可也具題奉

旨依議

請減屯賦疏

石文晟

題爲密陳屯糧之重仰祈

睿裁以廣

皇仁事竊惟經國必先於裕課體野端在乎足民故正賦貴自充積而民瘼亦當痼瘵臣本庸陋世受國恩蒙

皇上曠典以郡守末吏不次優陞特簡滇撫叨此邊疆重任敢不竭盡駑鈍以報高厚故自蒞任以來咨詢地方利弊體察吏治民生其間之生聚殷繁安藝樂業熙熙皞皞如入時雍之世此皆

皇上聖德滂流所致惟是猶有重困於民者不敢不以上聞也查滇省屯政因明初沐英世鎮雲南將帶來官兵分作十分以三分差操七分屯種卽以七分屯種之租以

系作及...  
養三分操軍此卽古之寓兵於農原非上倉糧米可比  
迨我

朝定鼎順治十六年闢漠吳三桂遂將昔日之租改爲額  
徵之賦及後變亂之時罔恤民艱任意坐派致使各軍  
紛紛逃竄因而遺累存丁典鬻賠納苦難殫述幸賴

皇上天威殄逆民得安全但浮糧過重仍困輸將計恢復之  
後自康熙二十一年至二十七年屯糧米穀等項歷年  
拖欠此非軍戶敢於頑抗亦非各官不善催科總因糧  
額太重血比難完業於康熙二十八年內經前督臣范  
署巡撫石特疏

題請分年帶徵隨蒙

皇仁 特頒

上諭朕念雲南百姓前曾供億王師繼又遷移叛屬家口運送勞瘁本年正賦輸將尙屬艱難復令帶徵逋租必致益滋困累着將歷年所欠屯賦銀七萬二千二百餘兩米麥等項十萬七百餘石盡行蠲免以示朕軫念民生至意欽遵在案則彼時 題請帶徵早蒙

聖恩隆重悉荷蠲除是此項屯糧徒有重額之名並無清完之益歷歷可考久在

皇上睿鑒中矣况各衛所久經裁歸有司是在前日猶存軍

戶之名在今日則無軍民之別一切徭役自應一視同仁乃查通省民賦上則田糧最重者莫如河陽縣每畝八升一合八勺三抄其餘五六升以至四五合而止則地稅最重者亦莫如河陽縣每畝五升九合二勺一抄其餘三四升以至三四合而止及查屯田每畝則有七斗二升六斗八升五斗六升至四斗五六升不等屯地每畝亦有三斗八升至一斗五六升不等夫軍民田地阡陌相連肥磽相若天時人事耕鑿播種亦無不同以至輕之屯額比至重之民額尙有四五倍之數若較輕額則屯賦之與民額竟有十倍之重所以屯軍終歲勤

動種收之穀不遑瞻顧父母妻子惟事納糧而究竟不能以一畝之出全完一畝之額故康熙二十八年臣叔石撫滇時曾於奉

旨編輯全書案內將此屯糧重困敘入瀝陳未經部覆而已後督撫臣未敢復請者蓋以

國用浩繁豈容遽議輕徭况各省屯糧皆重尤不便獨爲請減是以前撫臣王不得已於康熙二十九年有顯恩減則貼墾之請也但江浙等省屯軍現今領運且有船隻行月漕米等項給膳滇省屯軍則無此項瞻養兼之衛所既裁軍卽是民則與別省迥異况此軍戶係沐

氏帶來官兵並非發遣有罪之軍所納正供似應與民一體矜恤臣於康熙二十二年守開化時早已深悉今撫茲土見烟竈相連林林總總生聚實繁大非昔日氣象此雖邇年以來前督撫臣撫綏之力實沐

皇上柔遠弘恩所致惟此一項因吳逆作亂時各軍多半逃竄殲逆之後前此逃丁或遭兵火或戀他鄉間未回里以致遺糧賠累本以最重之糧又復包賠逃戶日復一日重復更重故於康熙二十八年以來仍舊歲歲不清每遇

奏期各官俱愛功名謁蹶借墊者有之遇一陞遷事故便



束手無策百計哀求逢人募助洵不可悉數也臣自入境以來目覩荒蕪田地甚多百姓甚衆及抵任後披閱各屬詳驗報舉無幾隨行飭催旋據百姓紛紛具呈熟糧額重無力開墾懇請題減復批司道查詳所議僉同總欲爲民請命臣思減賦薄稅非臣子所敢輕議祇因多寡之數甚是不侔若樂之形異常各別今我皇上恩同天地德邁唐虞頻年蠲賦不惜數千萬金是恭逢聖明在上今此民隱若不據實上達負百姓卽負我皇上矣况滇省僻處遐方係外域觀瞻之地不得不冒昧陳情如荷

聖恩將此屯糧悉照河陽縣則例起科則不特現在軍餘易於輸納卽未墾荒產臣自鼓勵各地方官加意勸墾亦無不踴躍樂墾者也仍將墾過數目隨卽具報按年科徵是以減賦於今日安知不增賦於將來也理應恭疏題請但發政施仁端望

皇上特霽洪恩臣何人斯敢以瀆 奏謹具密本如果芻蕘可採伏乞

皇上特頒 上諭或令臣等會查或 勅部臣議覆則九州四海莫不頌

皇上端居深宮之中明見萬里之外共樂被深仁厚澤於靡

涯矣至此項額糧如邀 恩減而通省兵食或有不敷  
則現有本省折徵米麥等項可以仍徵本色撥給似可  
毋墮

睿懷也再查 題奏事件如不應密而密者有干定例但此  
邊疆減糧重務相應密請

皇上睿裁字多逾格貼黃難盡可否允行伏乞

聖明全覽立賜

乾斷施行爲此具本謹密題請

旨

康熙三十四年五月初一日具題奉

旨着該部議奏

呈爲密陳屯糧之重等事奉 內閣照會內開云云以折本啓奏奉

旨伊所奏本內止言屯田雲南省有官田公田馬場等項伊本內並未指明此等田地有無在所奏屯田之內又此等田賦若行減額照民田則例徵收雲南省應給兵餉可否足用爾等以此行文詢問石文晟令伊詳悉籌算明白具文回覆欽此照會巡撫作速查明具覆可也等因奉此該職查得滇省屯糧額重軍餘苦於輸將徒事血比終難清完以致有名鮮實是以仰體

皇上特具密本冒瀆 天聽今奉 聖旨行查官田公田馬  
場等項有無在所奏屯田之內又此等田賦 同前 具文  
回覆職跪讀之下仰見我

皇上廟算弘深無微不照務使民困甦而兵食足職隨遵

旨細查屯田官田公田公樣田公種田馬料田首正田  
租穀田官租田以及屯官各項地畝俱係沐氏自立名  
色另有一單其每年所徵米麥穀菽豆悉在所奏屯賦  
之內惟馬場草場軍舍丁差等項雖在屯賦之內仍將  
額徵項下另款徵輸銀兩原無頃畝數目均不在 請  
減之內以上各項田地前因款目叢雜故疏內止言屯

糧未將各項名色逐一指明至於滇省制營歲需兵糧年該一十五萬一千二百石遇閏加米一萬二千六百石係於每年徵收民屯稅秋等項米二十七萬一千八百餘石搭放尙有盈餘年復一年積貯甚多若再全徵本色難免陳朽之虞經前任督撫分別年分節次題請徵本徵折在案康熙三十五年至三十八年又屆核請之期俟容另疏題達外今以此折徵米麥等項仍照舊例徵收本色內有屯賦原徵稅糧等項折共米一十二萬九千九百六十石零折色銀四萬五千九百三十八兩零悉照河陽縣民賦上中下三則起科共議減去

屯米七萬九千三百三十一石九斗零減去銀一萬三千二百四十四兩零尙該徵正耗折共米五萬五百七十四石零徵銀三萬二千六百九十四兩零除此銀不計外將所徵屯米搭同民賦正耗米一十四萬一千九百三十八石零合算除足供本省兵糧一十五萬一千二百石遇閏加米一萬二千六百石由此計算是無閏每年該剩米四萬一千三百一十二石零遇閏剩米二萬八千七百一十二石零同截曠小建積至四年之餘又足供一歲之需統在

皇上格外施 恩俯念滇居天末係外域觀瞻之地將此屯

系作及ノリ  
賦 特賜減免俾軍餘咸霑

德澤倘若不以此上中下三則爲例或悉照河陽縣上則起科應於原徵數內約減去銀九千三百八十一兩零減去米七萬三千三百一十四石零尙應徵銀三萬六千五百五十七兩零米五萬六千五百九十一石零其米同民賦米搭放本省兵糧外每年約共剩米四萬七千三百二十餘石以上各則應以何則爲例此

天高地厚之恩出自

聖明非職所敢擅專也今奉前因遵將田地款目分則上中下三則同歲需兵糧各項數目理合造具約略清册呈



覆伏乞俯賜核明轉請俟奉

旨行滇之日卽欽遵

兪旨另造科則細冊送

部查考合併聲明爲此具呈須至呈者

康熙三十四年八月初四日呈

准戶部咨爲密陳屯糧之重等事雲南清吏司案呈查得雲南巡撫石疏稱滇省民賦上則田地稅糧最重者莫如河陽縣其軍衛之屯賦比至重之民額竟有十倍之重云云而通省兵食或有不敷則折徵米麥可以仍徵本色等因具題九月二十七日奉

旨雲南屯田錢糧較民田額重數倍民人苦累嗣後屯田賦額着照河陽縣民田上則徵收該部知道欽此相應行文該撫將屯田額徵應減應徵總撒數目逐一造冊報部查核至本年錢糧已徵若干應令一併造冊報部查核可也

耨田說

總督鄂爾泰

禮之有耨田也明仁也教孝也以天子之尊而必親耨則天下之爲農者孰不勤於耨此天子之仁愛天下而使之務本也所以明仁也以天子之尊而必親耨以供粢盛則天下之爲子者孰不勤於養此天子之孝先天

下而使之養親也所以教孝也月令有之曰孟春秋月天子乃以元日祈穀於上帝乃擇元辰天子親載耒耜措之於參保介之御間帥三公九卿諸侯大夫躬耕帝藉天子三推三公五推卿諸侯九推還反執爵於太廟三公九卿諸侯大夫皆御命曰勞酒謹按元日上辛也元辰郊後吉日也日以干言辰以支言互文也則是耕藉之典當行於祈穀之後而同在孟春之月也考之周禮天官甸師掌帥其屬而耕耨王藉以時入以供粢盛此卽天子之藉田而甸師掌之者也然藉田不獨天子有之諸侯亦然祭義田天子爲藉千畝冕青紱而朱紱

躬秉耒諸侯爲藉百畝冕而躬秉耒以事天地山川先古以爲醴酪粢盛於是乎取之敬之至也是以千畝百畝之數此天子諸侯之視爲等級而其躬藉以致敬則一也祭統曰天子親耕於南郊以供粢盛王后蠶於北郊以供純服諸侯耕於東郊亦以供粢盛夫人蠶於北郊以供冕服諸侯非莫耕也王后夫人非莫蠶也自致其誠信誠信之謂敬敬盡然後可以事神明此祭之道也是故南郊東郊之殊此天子諸侯之視爲分別而其親耕以致誠信則一也後世躬耕不行藉田漸廢周宣王不藉千畝虢文公曰不可夫民之大事在農上

帝之粢盛於是乎出民之蕃庶於是乎生事之共給於是乎在和協輯睦於是乎興財用繁殖於是乎始敦龐淳固於是乎成觀於此語而知藉田之義廣矣大矣漢文帝二年詔曰夫農天下之本也其開藉田朕親率躬以給宗廟粢盛夫文帝漢之賢君也此禮既舉後之明主亦猶能踵而行之然唯天子行之畿內天子而外無復有議及者幾比於繁纓大輅之不可請近代郡縣大者不惟比於古公侯之國而小者亦遠勝於子男之邦則藉田之禮皆所當行乃不惟郡縣不惟督撫卽天子亦不能歲舉此禮卽使歲舉此禮京畿而外公卿大夫

鮮有能講明其義者今

聖天子特舉躬耕以爲天下先自督撫以及郡縣州衛所等官凡任守土之司通行耕藉之禮此誠千古未有之曠典也臣身爲總制兩省封疆一身表率况滇黔在萬里之遠僻處蠻荒一旦躬逢盛舉不獨山農野叟實所未聞卽縉紳士夫亦無從考覈臣不揣庸陋用表彰其義著爲藉田先農二說宣示僚屬遍告農夫使知我

聖天子本此仁孝之至推廣誠敬之思而其所以爲天下臣民祈

天永命以同享夫萬邦屢豐之慶者其用意誠深且遠可不

共殫其仁孝誠敬之心以承

聖眷而答

天休哉至於耕藉儀注已詳於會典位有尊卑禮無二致可  
徧其意而行之無所容其末議也臣謹稽首而爲之說

先農說

總督鄂爾泰

藉田之禮宜祀先農夫先農何神也始於何時神位宜  
何如書壇設何所涓吉何日陳設何器祭享何品樂奏  
何章旣躬親其事敢不先考正其說試爲略言之古聖  
王之制祭祀也法施於民則祀之是故厲山氏之有天  
下也其子曰農能殖百穀周棄繼之故祀以爲稷此祀

稷之始也共工氏之霸九州也其子曰后土能平九州故祀以爲社此祀社之始也而郊特牲稱天子大蜡八先嗇一神農也司嗇二后稷之官也農三古之田畷有功於民者也郵表畷四郵亭之舍標表田畝田畷居之以督耕者也貓虎五貓食田鼠虎食田豕皆有功於稼者也防六水庸七防隄也以蓄水亦以障水庸溝也以受水亦以洩水皆農事之備也昆蟲八冥蝗之屬害稼者也是故蜡之祭有八皆以爲農而以先嗇爲主蓋以先農爲八神之主此祀農之始也班固食貨志又從而申其說曰關土殖穀曰農炎帝教民殖穀故號神農氏



謂神其農業也又厲山氏有子曰農能殖百穀後世因名耕甿曰農其言農之義甚著而先農之稱考之於經未有紀載惟劉向五經要義曰壇於田以祀先農如社衛宏漢儀春始東耕於藉田引詩先農則神農也魏秦靜議風伯雨師靈星先農社稷爲國六神晉太始四年耕於東郊以太牢祀先農周隋及唐所稱先農皆祭神農於帝社配以后稷卽貞觀初太宗親耕東郊仍藉田壇之名也垂拱中乃以藉田壇而爲先農壇開元十九年祀神農之壇上以后稷配二十三年親祀神農於東郊配以勾芒遂躬耕盡隴上乾元二年詔去耒耕雕刻

天子出通化門釋輅而入壇遂祭神農以后稷配冕而朱紱躬九推焉憲宗元和五年詔以來歲正月藉田太常修撰韋公肅言藉田禮廢久矣有司無可考乃據禮經參考開元乾元故事爲先農壇於藉田此先農壇之所由來也漢文帝紀二年春正月丁亥開藉田唐禮樂志春孟志亥享先農此春秋亥日祀先農之所由來也臣於是本之經佐之史核之

國朝會典而爲之參酌其制卽如今之於神位也則書曰先農之神蓋以神農后稷皆各有所專祀而於此則統而書之也然以

頒示天下使農夫皆能曉其義則必實指其名而數之曰  
某某教農之君某某勸農之官也使農夫皆得津津口  
頰轉相稱誦愛慕嚮往而後其用力益勤則是先農之  
位宜主神農而配以后稷神農居中后稷居右皆南嚮  
田畷以下依八蜡之祀皆東西嚮比於兩廡之祀而位  
次正矣諸侯親耕於東郊則督撫以下之耤田皆宜在  
東郊先農壇在耤田之北壇門南向中爲先農壇增高  
而方四面有階祭日奉神位以祀壇之後爲神庫如祭  
宗廟寢室之制以安神位壇之前旁爲瘞池以瘞毛血  
神庫之左爲神倉儲耤田之穀以供粢盛酒醴神庫之

右爲宰牲亭以供親割壇門外爲觀耕臺下爲藉田壇之旁別置齋室未祭而齋既祭而燕皆於其地而壇基立矣古之躬耕在孟春元辰後之躬耕在孟春吉亥宗乎古則宜用元辰法乎近則宜用吉亥而涓吉定矣其在祭器則三爵一尊酒盞三十登一鉶二簠二簋二籩十豆十筐一俎一毛血盤一爐一燭臺二香案一祝板一而祭器備矣其在祭品天子則用太牢今督撫以下惟用少牢餘無可減爵實以酒醴登實以太羹鉶實以和羹簠實以稷黍簋實以稻粱籩實以棗梨榛菱芡鹿脯白餅黑餅形鹽藻魚豆實以菁菹芹菹筍菹韭菹鹿

醴兔醴魚醴醴脾肝豚肺節實以青色量帛矧實以  
羊一豕一而品物齊矣若夫樂奏七章則以丁祭樂舞  
爲之舞佾如其數迎神奏永豐之章奠帛初獻奏時豐  
之章亞獻奏成豐之章終獻奏大豐之章徹饌奏慶豐  
之章送神奏報豐之章望瘞奏慶豐之章七闋既終而  
樂奏成矣未祭之先自齋宿以至於省牲省牲演禮演  
樂祭之日自迎神以至於初獻終獻送神望瘞悉如文  
廟之儀而大禮舉矣位次正而心不疑壇基立而地不  
遷涓吉定而時不忒祭器備而知其不可假易品物齊  
而知其不貴殊珍樂奏成而無有不和大禮舉而孰敢

不敬而先農說於是乎畢

丁祭嚴飭碑文

竊惟

總督鄂爾泰

至聖先師萬世之師表也冠帶集團橋

天子有臨雍之典春秋屆仲月上丁修釋菜之儀內則命夫  
胄子三公外則寄於有司羣牧典綦嚴也誰敢懈焉本  
部院前蒞南藩職司秉鬯恭逢丁祭親齋沐而宿黌宮  
先令儒官較簿書而正祭器乃知牲或已經宰殺既失  
告全致潔之心物豈盡屬肥鮮更乖博碩蕃滋之義且  
或常供不充夫額數任先後以那移珍品不給於豆籩

致范鹽之雙疊兼聞各學亦有同風罔知其竭精誠但  
解奉行故事甚或尊疊未備疇詳犧象之形琴瑟雖陳  
莫辨敲箎之狀觀者如牆如堵任彼咆哮祭者似醉似  
癡頽如薺馨一尊纔薦滿庭之燎火無光三獻未終兩  
廡之燈輝已滅於是登鋤與簠簋悉憑顛倒几筵鹿兔  
共榛菱似遇摩空鷓雀分甘奪腫半由承祭之家人拍  
地喧天遑問糾儀之齋長駿奔髦士霎時怒髮衝冠輿  
隸膳夫一片雄心染指凡此之類罪豈勝誅皆由約束  
之不嚴亦以躬行之未善不思主爵則身膺一命幸得  
窺聖人門牆分獻則職任半甕原以司泮宮俎豆平時

未知化導已蒙尸位之譏臨事不克恪恭難免曠官之咎於是飭郡守州牧縣令等職兼以誠教授學正訓導諸員各矢乃心以襄大典預期三日牲醴皆供乎籩牽先事一朝品物盡陳於類璧齋戒沐浴來觀習樂試歌舞於明倫堂前料量潔清退服寢衣斂精神於尊經閣卹庶幾必誠必信斯夙夜之惟寅無怠無愆知神人之感格是并申之條約用以頒諸學宮業經江南各學遵照奉行在案今本部院蒞任滇黔合行通飭爲此仰各府州縣等官并教授學正訓導諸員務須恪遵奉行今將條約開列於左



一既奉

肇聖五王不惟簠簋豆籩照數增設卽牲牲亦應各增其四有議共牲者其說不可從考之典禮惟配享有可以共牲者專主無共牲之禮書云文王騂牛一武王騂牛一其明徵也自三代至漢唐皆不聞有共牲之說惟後漢有青帝赤帝共一犢白帝黑帝共一犢者議者非之唐開元時五品以上室異牲六品以下共牲豈有王爵而可共牲者乎其各照數增一爲五可也

一祭牲祭品皆有定額一豆一籩罔可缺遺况牲取親割以告虔也取其毛血以告全也可既宰而入學門乎

豕曰剛鬣註謂其豕肥則鬣剛羊曰柔毛註謂其羊肥則毛細而柔弱此博碩肥腯之所由稱也可以瘦瘠不堪之豕羊而飲之灌之以充牲牲乎既宰且不可瘦瘠且不可况可缺其額數而肥吏胥之囊橐乎月令曰犧牲母用牝又曰命宰祝循行犧牲視全具按芻豢瞻肥瘠察物色必比類量大小視長短皆中度五者備當上帝其饗註曰上帝且欲享之况羣神乎嗣後各官俱須先三日親至學視牲牲如法然後稽其數使人牧之以待先一夕親割吏雖奸其所施乎

一丁祭先數日集樂舞生演習精熟先一日與祭官親

同往觀不得草率從事

一丁祭先一夕凡與祭官齊集學宮齋宿不得有一員私宿本署

一丁祭之日庭燎燈燭務須光明如晝以俟祭畢後已除神前燈燭之外卽官員不得各自張燈

一丁祭之日櫺星門內不得容一閒雜人所有事宜止許學書幹辦及小心謹慎門斗二人或四人照管燈燭其官員僕從人等一概於門外伺候萬無使僕從人持燈夾墊相隨上殿及上兩廡之禮君師一體幸勿自取罪戾以貽失禮之愆也

一丁祭之日既不許容一閒雜人自無有搶奪祭燭及祭品之人倘或仍有潛匿門內乘空搶奪者以盜賊論卽時擒獲解報以憑盡法重究

一學宮之地聖賢靈爽所依不惟丁祭宜修治肅清卽平日尤宜掃灑潔淨近每見黌宮以內栽瓜種菜學圃成澆灌之場曝被晒衣諸生絕往來之路甚至丹楹刻桷徒供蝙蝠棲遲烏革輦飛盡是魑魅巢穴蛛塵百斛廟貌埋埃垢之中齷糞千箕腥穢聞宮牆之外皆已安之若素久且習爲固然甚至先儒先賢兩廡之神牌倒置鄉賢名宦兩祠之神位傾頽非其子孫有誰咨問加

之朽蠹若罔聞知凡爾學官所司何職卽諸門斗多亦  
奚爲嗣後教官不時巡察務令門斗分班輪值逐月掃  
除學宮之內不得容一毫塵埃庶亦無忝厥司也慎哉  
毋忽

新刊

蘇  
平  
世  
婦  
學  
PDG

藝文

序

明

送五雲韓先生詩序

王奎

五雲韓先生居犇十五年立身高潔不以榮顯自期蘇文忠在海外深自晦匿從田夫野叟漸不爲人所知識俱可謂善處憂患者矣一朝用世都人額手願留皇上以材見賞是豈人力之所致哉惟天純佑默有相之開天下於至治也予與韓先生伯時桂慎同斥十有六年坎陷塞運自謂與世絕矣長與荷戈執戟者伍矣聖天子嗣寶歷日月

重熙萬方景從開洪龐而爲玉燭釋皇武而建眞符返澆  
漓而爲淳樸以納民於軌物不浹十辰首拔桂慎於拱稽  
中未幾復有伯時之命颺舉雲蒸乾開坤闔震盪萬彙四  
海彈冠而起不知其幾矣矧伯時素以德望稱貞元會合  
實惟其期伯時行矣不知都人亦有額手者否乎曾以材  
見賞否乎君子曰是行也不爲六卿卽爲三輔其果否乎  
予因之有感矣人每言治道有隆替古今人物不相逮今  
皇上初復風氣熙熙然皞然光彩不變一時表著將多  
於前日以是知治道不於常於其人古今不於常於其人  
蓋賢人治之具也伯時行矣天之生材非徒美其身也將



以濟斯民也伯時尙思朝廷萬里簡拔之恩廣其經濟敷  
其賢哲於以立天地心建生民極開億萬年太平之盛斯  
不負九重求賢之意且允愜士大夫顛顛之望伯時行矣  
其將何以處我哉系以詩曰勸君以仙家霞觴之清酒贈  
君以一唱三歎之朱絃人生聚散等萍梗劉祖駐鞭何後  
先憶昔同臨汾晉時薇垣劍佩相追隨祇今違離南海上  
聲名不減臯與夔聖皇恩澤被八極有詔掄材向南國南  
中逐客今幾人渠是前朝眞柱石北風吹沙水不流布帆  
夜下白鷺洲謝安聲名今在晉呂望事業行歸周磻溪東  
山舊遊處此時風氣知何似五雲蕩漾闔闔開咫尺天衢

多雨露明朝響珮趨鳳池金章紫綬光陸離調元有手會  
須展好揭元會還雍熙贈君以清廟一唱三歎之朱紱勸  
君以仙家霞觴九釀之清酒賈生志氣傾湘潭坡老文章  
動星斗東望蓬萊西弱水鵬翼扶搖幾千里攬衣終夜仰  
斗樞一道文光落南紀

董莊愍死節威楚序

王奎

龍亡虎逝而羣狐嗥風披雲靡而震霆作此可以觀大人  
之變明治化之迹也按元史龍溪集紀天曆初雲南中慶  
路鎮將敗狐叛遣兵攻威楚官吏或逃或屈獨知事董文  
彥義不從賊厲聲詬罵賊不忍聞截其耳以塞其口文彥

嚼血唾賊罵不絕聲賊怒裂而殉之明年敗狐伏誅憲司  
以事聞朝廷嘉之諡曰莊愍旌其門官其子時中子斥臨  
安時中爲文學掾一如集中言泣且請曰先父不幸死賊  
手雖褒嘉於朝時中懼其事之荒湮也先生以文章顯幸  
爲我序之嗚呼忠臣烈士何代無之求之葬服曾不多見  
昔安祿山以范陽反顏杲卿死河北張巡許遠死睢陽雖  
武夫健卒皆知盡節而伸大義唐史列之於傳表忠烈厲  
後世者至矣敗狐之叛中慶大藩也威楚大都也省府大  
臣不死之風紀執法不死之刺史不死之知事食九品秩  
乃凜凜乎仗大義樹大節寧死而不顧見理明而臨事不

眩也使天下之人皆若文彥則叛亂何繇而生哉予生也後仕不先人不獲與太史著作之列而元史不載莊愍死節事豈史闕歟抑在彝略歟抑述史時雲南未附不得聞歟以未附闕文君子固不能無憾以在彝而略則失之遠矣因爲述之於簡以補史氏之闕

國朝

重修尊經閣序

府同姚文燮

今天子崇尚文治臨辟雍設更老開經筵講幄修明傳註是上之尊經術莫盛於今日矣守若令宜日與士敦說詩書禮樂以明遵行之無後且余聞之上者下之倡也名者實之

表也則奉上與獲令名莫大乎此亦莫先乎此矣臨固演  
文章經術之區偏處東偏去

天子遠甚卽在盛時輜軒亦罕及當土酋狂逞再煩

王師救寧惟學宮處城北僻隅得不燬雖靈光巋然獨存而  
殘闕特甚頃余之官道經臨暫息於學宮之旁仰見宮牆  
殿廡榱角俎豆規模弘遠巍巍肅肅知鼎而新之者程君  
姜若之功甚大也博士捐余殿後登尊經閣輦飛霞起丹  
梯入雲表有臯比擁於上有凡數十列於左右几羅筆硯  
臥榻東西有舍數處閣下有井竈廚傳有役執事數人不  
少懈詢之爲姜若捐俸鳩工庀材獨力所急成者爲之收

羅舊籍日召九學博士弟子講習課藝於其中親爲之丹黃甲乙彙呈學使者請評以爲勸諸弟子遠在數百里者無不至期齊集風雨不間有留而執經問難者亦復濟濟况城闌悉居甲帳夕陽笳聲向之儒士望雉堞裹足不前者今且操觚弄鉛槧坐百尺樓上風晨月夕吟咏不輟咸不知其所以然而然也而姜若橐無餘錢廩無餘粟日爲弟子輩謀饗殮供膏火其樂不倦亦不知其所以然而然也上未嘗以此亟望於守而守乃汲汲如是且與予同寓溟久朝夕謁大臺晤僚友亦未嘗斤斤言及則其非以爲名可知也我知其性已有大過人者姜若爲伊川夫子之

後故其居黃堂無異於崇正殿說書之日而處萬里之名郡亦無異於遷龍門聚生徒之日也夫誠得於天者厚也姜若本不以爲名而臨千百年之冠蓋絃歌頌德於不衰以視今之逐逐於名者何如耶又奚論夫不好名者耶

臨陽試藝序

知府程應熊

臨安昔所稱滇南鄒魯者也庠序之士咸知誦法孔孟崇尚文雅人材輩出聯科發解一榜半屬臨陽甲科後先鵠起哀然出爲世用以建功立業接踵比肩彬彬稱盛赫赫若昨日事矣及疊遭兵燹經生學子工於謀食疎於謀道而文氣靡弱不能深自振拔究使論世者以庠序爲虐器

師弟子爲虛名甚激而有兔絲燕麥南箕北斗之喻豪傑之士長太息焉庚戌余奉

命來守是邦間關萬里跋涉經年方於辛亥三月望日得以蒞任視事之初詣學宮謁

宣聖顧瞻興歎卽有加意學校表正士風之志未幾檄傳多士而試之觀其文章想其志氣卽才大思深有典有則者固自不乏然多有以輕心掉之剽而不留者有以怠心易之弛而不嚴者有以昏氣出之昧沒而雜者有以矜氣作之偃蹇而驕者於是傳諭各學申嚴月課每課兩藝刻晷終篇每月再試屆期畢集時於睽茗談志尊酒論文之餘



進諸博士弟子員而示之曰論文必徵於聖勸學必崇於經若文成規矩思合符契爲本之書以求其質本之詩以求其恆本之禮以求其宜本之春秋以求其斷本之易以求其動此所以取道之原也叅之穀梁以勵其氣叅之孟荀以暢其支叅之莊老以肆其端叅之國語以博其趣叅之離騷以致其幽叅之太史以著其潔此所以旁推交通也是故致飾語言不若養其氣求工筆札不若勵於學氣完而學粹雖崇德廣業自此而進况其外之文乎柳州之論可用力而至也諸士從此聞風向慕極力揣摩苦心刻畫稟經以製式酌雅以建言其爲文也情深而不詭風清

而不雜事信而不誕義直而不回體約而不蕪詞麗而不淫豈猶向之靡弱不振者可同年而語耶隨於每課之中選取佳章彙成卷帙呈請學憲鑒定適子寅友姚君羹湖由臨之開化勉留數月細加評題爰付剞劂俾九庠多士有所矜式而文風煥乎不變將見道化翔洽人文蔚起文以行立行以文傳真不負所稱爲滇南鄒魯也哉爾諸士其益勉之

寧儉錄序

郡人劉彪

人事奢儉釀成風俗風俗美惡上應災祥欲迎祥而消災必去奢以從儉非獨節情寡過之源抑亦省費惜福之寶

也今

聖天子建中和之極躬行節儉以風天下民生其時如冠婚喪祭及尋常宴會人生不能廢缺凡事成禮而止奈何相沿日久遂至踵事增華幾於節外生枝以有盡之物力供無限之豪華豐厚之家尙難爲繼中人而下其何以堪小則負貸糾纏大則田舍蕩洗以至停婚滯柩種種堪憐回思吾鄉誇多鬪靡以驕奢鳴得意者後裔百無一存卽有存者皆寥落不振可弗戒哉敬邀同志輯爲是錄推一事以概事事期於今人可行亦不失古意爲善大抵去太去甚務俾風俗成敦簡樸人事力挽頽靡維桑與梓共深念


之

曾烈士傳

巡撫甘國璧

烈士有朋宋魯國公曾公亮之後明初其祖萬孫從黔國  
開滇世襲臨安衛千戶數傳至烈士慷慨有氣節歲丁亥  
流寇逼滇分兵臨安臨人曰賊我讐也誓守城已而城破  
寇怒甚驅城人而殲之先一日烈士見城將陷浩然曰天  
乎臣力盡矣命妻王氏同女登樓自縊烈士集薪焚之忽  
有烟一縷於王氏腋下裹幼子齡而之窓外是時齡纔八  
歲如夢中然嗚呼異矣其後齡生五子皆貴孫枝茂衍遂  
爲臨望族云立軒曰丁亥之變臨之赴義者衆矣而烈士

之死尤慘烈士之子齡其生尤奇雖然烈士之死烈士之志也齡之生暨後裔之昌大實天默相之而豈烈士之初念也哉



三  
4  
②

新刊 平家物語  
PDG

明

碑銘

中憲大夫南京都察院右僉都御史蕭公神道碑銘

黃洪憲

先是乙酉秋洪憲竣試事取道金陵中丞蕭公遣蒼頭持  
赫蹏來訊曰病弗能郊勞且乞骸矣泊余人都之二年從  
臨安李問中丞起居狀曰是闔門養威者然病目眚又踰  
年而中丞訃至余流涕長潛悲不能自止會其子漢卿遣  
僕持王叅政狀請余銘麗牲之石蓋遺命也余何敢辭中  
丞公諱崇業字允脩別號乾養世居秣陵應天府上元縣

人洪武初蕭九成之母募入宮乳太子與宦者郤成雲南  
臨安衛遂家焉四傳而爲頤庵公以中丞貴封太僕卿母  
戎太恭人中丞公生而早慧日誦千餘言屬對敏捷胡秀  
才啓仁大奇之曰吾有賤息願佐蕭郎湘藻是爲胡恭人  
公舞象遊庠學使者奇其才子之餼嘉靖辛酉舉於鄉隆  
慶辛未成進士選庶吉士公博學好古自爲諸生時業已  
蹇芳嗽溜及讀書中秘同館競逐詞賦公曰奈何以雕虫  
技坐消清晝乎乃究心理道深習國家典故同業者心遜  
公公有濟世才館師亦云癸酉授兵科給事中首疏五事  
曰崇正學以迪士核實政以稽吏斥飭辨以求言緝陰訐



以維風禁侈太以敦俗識者謂知治體皖軍譟嘩撫臣上  
狀失實公劾其欺蔽中外肅然轉工科右給事中會畿內  
侵公請舉遺賢簡循吏固邦本緝奸宄辨冤獄撫無告六  
事以弭災變河決淮陽或請開草灣洋麻石礎諸海口公  
上疏曰往者議開泃河事已構今復開草灣是兩病也矧  
歲侵民絀大司農無見錢不如專意泃河便已轉戶科左  
給事中時驛禁方嚴人揣當事指無敢緩頰一言者公上  
疏曰一命半通誰非王臣而膳宰不致餼司農不授館非  
以體羣臣也且立法峻則持久難請自今定職名填實數  
毋陽奪陰與使下掠美而上不見恩時雖報聞其後卒如

公議云琉球中山王請封公當往或曰海多颶風波臣不爲給事弭節也公嘆曰諸君欲我逃兩汗哉匪躬之謂何死諫死使等死耳且男子業懸矢弧而懼此芒芒者非夫也乃出上所賜麟玉服之叱馭去至閩與謝大行議減海艘費十之四五閩人德之往國王迎詔立龍亭不拜公讓之使拜自郊勞以至晏贈靡不成禮王亦驩然餽使者金公卻之及遣陪臣入謝復以請公曰臣無私交不宜受金褻天朝體上嘉之以金返使者公往來海上再更臙臘陽侯颶浪郎黃頭掉船多五色無主者公獨揮塵嘯歌自若比歸無幾微德色第曰賴主上神靈海不揚波臣何勞之

有特授兵科都給事中居有頃遷光祿寺少卿辛巳擢貳  
太僕先後賜金緋者二尋遷太常少卿典屬國再晉南太  
僕卿南問改冀北時以良田爲厩裏蹠爲駒僕臣擁虛名  
耳公條上四議嚴舉刺牧政大舉尋陞都察院右僉都御  
史提督操江公嚴譏察教水戰禁豔訟發御史侈用贖錢  
列其狀以聞上震怒下詔逮御史公曰蹊田而奪之牛得  
無過甚乎復上書政府申救甚力時論韙之會太夫人有  
微恙公亟疏求去甚切上憫其誠暫予告乃歲餘竟不起  
方疾革時猶北嚮稽首謝主上恩復南嚮謝戎太夫人曰  
兒不能謹身終菽水養惡用子矣顧漢卿曰若善視母異

曰隧而相見俾我融融也聞者莫不隕涕公卒某年月日  
距生某年月日享年若干公爲人魁岸睥目蟠腹飲人以  
和遇知己引滿浮白危言莊語雜以談謔而未嘗詭於正  
其大節凜然絕不爲脂韋詭隨而議論常依忠厚詩云柔  
亦不茹剛亦不吐中丞有焉使天假之以年其功業可勝  
道哉公著述有奏議使琉球錄南遊漫稿銘曰長庚降兮  
碧雞登天祿兮吹藜歷瑣園兮弼達遵輶軒兮象背蹈鱗  
穴兮如彝秉淵塞兮牧圉跨天塹兮總師惟南國兮是毗  
組薛荔兮懸車齒踰艾兮未耆望馬鬣兮歎歎


龔孝子碑銘

王 鯤

予聞臨之龔孝子者年十二齡卽割股療母次年母逝廬墓三年哀慕如一日及長而父歿復廬墓哀毀踰禮僅三月而殞嗚呼人生天壤閒五常百行惟孝最先龔之幼年割股廬墓誠奇矣孟子曰人少則慕父母有妻子則慕妻子龔當慕父母之年親疾療之親歿廬之宜也而未之奇且書曰克諧以孝傳曰曾子可謂養志而大舜曾子之孝庸德之行隨時隨事孝敬爾矣烏覩有所謂割股之行世嘗謂割股之孝孝而過者也及壯年有妻子矣慕父母易而慕妻子矣人情物態大都如是孰如龔也孩提之愛赤子之心不少替於壯齡之日丁酉年父以正告終龔貧無

以爲殮既葬構廬墓側一葉之茅爲棲身地四無壁扃無戶風悲日落滿目荆榛免駟鳥翔時與爲侶孝子之心神命脉已偕其親遊於泉壤下矣故彌月之間不理櫛不祛垢蓬首墮形饑寒不識親朋造其廬問所欲則嘿無一言對眼相看而已孝子豈無妻子耶一心在親則不知有妻與子矣專慕在親則無復有妻與子之慕矣哀毀骨立居廬三月而殞孝子其世所難哉然則幼年之割股廬墓亦非沽名激節其孝思之眞誠翕聚方發而未已者也尙未可以爲奇耶嗟夫光岳分而士鮮實行孝艱其人又安望其移孝爲忠而使社稷民彝賴之余於龔生無一面聞其

事而壯之且廉訪眞用是勒之石以風今世余豈輕許人  
哉余豈輕許人哉龔諱朝傑字德恆爲元庠生云



蘇  
氏  
學  
堂  
PDG



阡表

劉都諫阡表

楊慎

都諫阡表表皇明文林郎刑科都給事中三貞劉公也公諱洙字道源別號三貞先世爲閩縣人永樂中四世祖均寶卽戎行戍雲南臨安衛因家焉均寶生玉及玪玉積軍功級至千戶玪生容字孟儀文之而隱有豫齋集藏於家乘容生鉞配王氏生子六人長濟次濬次卽公次洵登鄉舉爲大足知縣季庶曰淞曰潤云公生性凝靜羣居危坐沉默不妄語笑長者知其異器也年十有一補郡文學弟子員及冠娶濮氏弘治戊午以雲南解中式下春官第留

學於京師受業太史內江五清劉公瑞五清之門擇可而授且不妄許可獨器公以遠大由是業與聲日進正德戊辰中禮部式大廷賜第爲進士筮仕受刑科給事中辛未遇恩綸貤封父如其官母與室皆孺人壬申以母喪去位制終北上補戶科給事中丁丑陞刑科右給事中戊寅陞戶科左給事中己卯陞刑科都給事中辛巳以公嘗疏雲南十八寨兵事奏功陞俸一級是歲六月以中同列飛語遂抗章乞休得旨命以原銜致其仕歸公有以自信無慍色居林下二十餘年嘉靖丁未夏五月六日壽終於家公之遺事子楷著年譜爲詳姻家四川僉憲鈍庵王公志而

銘之慎唯公以諫爲職當正德中雖恩倖孽卿迭用而言路猶闢如也是時居諫垣者多據其忠以禪乎大政雖言不盡用而具載於史錄以垂光於後主聖臣直未爲不遇矣公於壬申歲時安南賊酋那代伏鎖議建守禦所於冷水溝厥土維窪下厥壤維隘咎嵐且瘴未匝月而死者澤若蕉公家與此地近熟知其事乃上疏言城守非朝夕之寄惡地非營壘之所命下覆議改從聽今新安所是也居無何十八寨彝賊大起公疏劾兵備王昊乖剿之失而薦臨安知府朱公疏堪任兵備時議避之十八寨終奠厥居公之功也他如專久任以圖治效溥仁恩以救災荒兩疏

皆見嘉納又請回鑾輿以慰民望戒貪婪抑奔競以公考  
察得旨雖不盡俞於職無負矣給事中李長席劾總戎  
沐崑妄奏鈞制二司和買事繫獄公論救之得釋伶官臧  
賢輩交通逆藩宸濠公上疏暴其罪惡卒正典刑復有明  
大法以懲奸惡之疏除逆黨以正國典之疏陳例條以禁  
時弊之疏閉銀廠以安生民之疏嘉靖初復有七事之疏  
正君心講聖學親儒臣勤政事謹好尙戒嗜慾辨賢邪其  
目也遽數之不終其詳有奏議藏之鑿楹矣古人云不爲  
宰相必爲諫臣豈爲其崇高清華哉爲其得行與得言也  
公居得言之職且值受言之時位雖不久書之史錄亦英

英獨照矣上何負天子下何負所學乎節以一惠無大此者昔歐陽公表其親惟反覆言治獄一事豈其無他善夫其重且大者爲傳世計耳慎也衰痾筆退才盡姑書以俟志演耆舊有考於茲焉

參政萬公阡表

郡人包見捷

涪南先生者吾滇之端人君子也當嘉靖閒歷官中外二十餘年而以予告歸歸又三十餘年優游泉石以歿諸縉紳所爲誌銘狀傳碑述纏纏其言之矣一日先生季子鈞謁予潛然泣下曰先大夫之葬墓木已拱迄今尙未有以表也自惟不肖且老慮一旦先狗馬填溝壑無以見先人

地下敢徼惠子之一言以標麗牲之石予謝不敏則聞先生少朗慧有具質嘗借書繙閱一覽無遺十九校試於有司輒冠諸生廩學宮辛卯舉於鄉又六載成進士授富順令未幾丁母賈憂歸服除補成安令徵入爲南京戶科給事中考滿贈父懷雲公祚如其官封母賈太孺人七載出爲四川參議遷副使遂晉廣西參政甫三月卽上章乞骸骨歸歸里撫按五薦竟不起以壽終年八十有八神完不亂恬然坐逝卒未浹辰督學采士民輿議祀於學宮始先生之令富順也邑多豪肉視單微而簿書巔委猾吏舞文先生一切以嚴破之懲捕負之名姓裁冗費之里甲尤能

以片語平富湖累年爭田未決之囂訟於是貴勢有力咋舌無敢譁張者甚爲劉端簡公采叅蜀藩時所器重再補成安節操傲富順而才愈瑩練表冠桂之循令遷陳餘之遺祠興學置倉繕城浚濠築堤植柳其土人呼萬公柳政聲爲畿輔諸邑最至今二邑尸祝之其任晉垣也主管後湖魚鱗圖册籩餗已失公綜覈証今彝故援盈縮源而湖志成尤侃侃談天下事如官邪邊務科舉驛傳種種宏議會內外計則糾其卿貳昏庸之宜黜辨某方伯操履之宜留至劾秉臣子倩試一疏尤觸時忌而竟以一麾叅蜀議矣時巴渝歲累儉疫大作道殍相望先生檄守令多方賑

療所全活甚夥又楚施州蠻黃叛跳山東支羅坪固旁掠郡邑致勤楚蜀黔兵以討先生贊謀督追星火迫賊繫頸詣楚軍門降寇平部覆叙功拜白金文綺之賞明年白蓮妖賊蘇麻子朱國材等嘯聚攻刼大同閒人情洶洶議修城設邑紛如也則請無過張皇第大懸賞格購賊酋赦脅從而二賊卒就縛萑苻晏然播州流苗猖獗幕府議剿先生弗是也竟單車詣澹潭宣颺德意嘉與更始播苗始知生全之樂願自解散報聞叙功奉旨陞俸一級會威茂番釁時聞當事才先生擢治兵使者鎮之甫蒞任生番孟董果以三千衆攻保縣羽檄旁午先生慨然躬督將士往援




乘夜燃炬鳴礮聲言斫賊營兵氣大振已嘿禱於神天驟  
兩河流漲溢番彝弓甲膠解遂望風宵遁去其沉毅有略  
如此先生在蜀藩臬四見草錄諸所惠愛洽閭閻擘畫著  
關砦甚爲上下孚信洎粵西左叅政之命下蜀人泣送車  
軹不得發而後其思可知也抵粵振刷有聲以議宗室忤  
直指使龔某恐見中而遂初之志益決因具疏以病請詞  
甚懇切銓議予致仕歸年僅五十有一耳而又非實病也  
人咸以收身之早而不竟大用爲恨於是粵諸寮友屬石  
汀殷公正茂芳洲洪公朝選爲叙贈以鄭重其別比於長  
孺之戇不疑之厚康伯之信二疏之勇僉謂知言先生性

篤孝每念二親早棄養抵里首營阡兆松楸蔚然歲時治具集諸親黨展墓下依依孺慕也澹泊自甘不治生產乃睦族洽鄰周貧恤困令人人厭其意鍵門窮典故課諸子以學行訓諸青衿執經問字戶屢恆滿後多顯者治圃郭外蒔花灌竹吟咏蕭然而絕不與公府有司之事究心理學不屑屑雕虫而詩文皆匠心獨詣輒削其彙存者僅二卷至其仁心爲質陰行其德則經紀後事如吳別駕之在通灣李郎中之在白下皆心力畢竭與議尤以爲難云夫以先生再爲壯縣令循也績最也徵矣法不宜南卽南而廻翔夕郎者七載才局節概峻厲彌明竟出於外又西南

脊脊多事也無亦以極難極繁嘗先生乃癯然之軀歷試而靡不效彼豈無希柄臣之指者卒四跡之無所得纖毫過而交稱甚有耽耽於丘壑閒不惟不能瑕先生而薦剡再三也則先生出處心事生平不以語人而人罕有測其微者天下才華之士進以揮霍陟膺退以矯飾博名者不乏也則如先生之躬修篤行誠足光人倫而昭來禩者是  
可以無表乎哉予夙嚮往先生日者有演志之役推爲人物赤幟而又季飭迫欲得予言適奉命還朝戒裝匆匆姑撫其大者以令後之式隧道者得以覽焉先生諱文彩字國華號涪南別號慎齋以三子銑什麻哈州考績晉封中

新編 女ヲリ示

大夫妻何封淑人



國朝

重脩臨安府學宮碑記

知府黃

明

溫陵人

戡亂以武敷治以文二者政之用而道其本也道自堯舜開其統至

孔子集其成聖於是乎至道於是乎備大而君臣父子夫婦昆弟朋友小而飲食起居近而一時遠而終古舉不可違違之則悖脩之則治自秦漢以來可攷而知也我

國家定鼎四十餘年海內戢寧蠢爾滇藩吳三桂頓稱戈拒命六詔阻隔聲教仰藉

皇上神武布昭渠魁就殄滇南士庶始出湯火而登衽席

皇上乃假武脩文恭默思道特

勅天下郡邑脩

孔子廟余承

恩簡蒞臨陽早暮惟學宮頽缺是慮矧奉

明旨敢不黽勉以上承德意敬捐俸選材鳩工卜吉委教授  
熊兆鑑廩生台顏董其事更得學憲鄒公嶧與州刺史齊  
君象先等各捐俸贊襄爰自殿而廡而門次而周垣坊亭  
盡撤其腐而新之至名宦鄉賢兩祠燼於兵火皆不廢者  
乃更建焉以從祀兩翼功成向北稽首集僚屬多士展拜  
廟墀而告之曰諸生知夫

朝廷脩孔廟之意乎蓋脩廟實尊聖也世不知嚴事孔子因不知有道道不明則綱常味而悖逆生其爲人心世道憂者何限今

天子崇儒重道一準尼山殆曉然示人以王化之所在俾識所向背向背不愆而後子臣弟友各安其則顯以敦常陰以消乎反側進而不已雖以幾雍動無難尙有不循其分甘卽於辟以梗盛治者耶是

聖天子脩孔廟之旨所計及於天下者甚深且至况茲臨陽於演舊稱文獻爾多士覩茲廟貌聿新無一不滌其耳目奮其心志敦倫勵行以應風旨於以脩明聖道庶有賴焉

苟不知率由夫道但視爲脩廟已也則塗暨丹雘亦僅同  
乎琳宮梵宇碧耀金輝徒飾耳目而已於道何裨於世何  
補且瘡痍甫定

綸音遂汲汲於此奚爲也余與諸生所當仰體而深省焉勿  
忽

臨安府儒學新置

聖廟祭器碑記

知府丁 焯 晉江

禮稱上丁釋奠天子率公卿諸侯大夫親往視之夫以師  
道之尊一舉事至勤若此無亦慮有司之不虔假或器物  
敝壞牲酒瘠冷無以達誠將敬而稱尊師重道至意故必



盡物盡志而後誠敬之道備焉今之郡縣卽古侯國也郡大夫卽古諸侯也

至聖先師之祀業徧寰區而歲時二丁致祭有司循行故事脯醢粢盛取其成數求所謂犧象罇罍籩豆簠簋告備告潔者蓋戛戛其難哉

憲副黃公龍光初蒞臨郡謁

廟後卽啓聖像於廊廡沙礫閒崇奉尊經閣中繼復捐俸葺治學宮輪奐具在瞻仰及往見會城見

制府范公撫軍王公所倡置雲南郡學禮樂諸器諸生以時肄習每逢上丁陳獻輝煌雪煜儼然如見美富當年

因慨然曰雲南爲首善而人物之盛則首數臨陽今

制撫兩臺既倡於前而予不能踵而翔焉其無乃於崇

聖興賢事有未備會公遷川東憲副適際內艱遂寢其議  
庚午冬予謝攝臨篆奉調纂脩寓省公以書來問祭器度  
數予爲按滇乘所載吾鄉王慕蓼先生釐定三品考條悉  
以報公遂出橐囊鳩工庀材募諸冶氏匠氏漆人績人各  
以其職供事制爲祭器計若干事以迨

廟中所需罔不舉備費之以鏹計者凡八百九十有奇既  
竣事索予紀其事以示後予謂公可謂得禮之本矣夫禮  
以敬爲本能敬則祭非具文而器非徒設公之備物將志

敬也肩其費不以分人恕也遷其任而言必有終信也繼首善以爲諸郡倡義也一事而數善備焉夫敬德之聚也凡公之爲政設施視此矣是不可不書因紀其器另勒以示學宮昭敬守也

重脩臨安府廟學碑記

郡人劉彪

臨安學宮規制視他郡爲宏敞創之者無美弗增脩之者則難繼我

國家定鼎以來崇文之治無閒於遠賢大夫之蒞茲土者時能脩葺之但工繁弗緝閱時復敞求當年所謂美富宮牆難矣今

上御極之三十有一年鐘山王公來守是邦甫下車齋謁顧  
瞻興歎卽慨然以脩葺爲已任於是鳩工庀材不資於衆  
不役於民易材如其市籩工如其私費以鏹計者一千有  
奇悉輸之囊橐中去費缺而就礮固化黜黜爲絢麗圮者  
築之廢者增之卑者崇之隘者擴之自殿而廡而門坊池  
亭而魁閣由中及外罔弗飭也自啓聖宮而尊經閣而景  
賢祠由前及後罔弗繕也始工於癸酉之秋七月訖於是  
年之冬十二月比之當年創者亦無美弗增矣郡人士瞻  
仰其中咸頌公不置欲勒石以誌不朽屬余爲文以記之  
余維爲政莫先於風化而學宮實風化所自出之地豈特

春秋祀事講學請肄已哉以肅羣僚以撫四彝以勵民俗以消回遁先其大綱徐詳規畫政刑不先於德禮是故廟中者境內之象也人第見公蒞任來大法小廉以爲公之能正已也梯山負巖雕題鑿齒之倫駸駸慕義以爲公之能招徠也秀者敦詩書樸者安耕鑿城狐社鼠悉化良善以爲公之能鼓舞而振刷之也而不知公固有得乎風化之本者以故三年於茲學成而教亦成郡人士頌公之功尤當體公之意家敦詩書人尙實學出備

朝廷公輔之選處爲斯道先後之寄不徒逡巡膠庠爲取科名博文譽之徑是誠公意之所厚期也公名永義字維庵

鐘山人至於司出納則臨安府學教授楊君邠俊董工作則建水州學正陳君萬言府學訓導單君國瑾也

重脩學宮記

知州 陳肇奎

今薄海內外遐陬僻壤人知敬學凡以教化之行捷如桴鼓

皇上御極五十餘年親詣

闕里再舉臨雍釋奠之儀復

御書萬世師表匾額懸之學宮尊崇

聖道至矣箴以加矣而又諄切訓士增廣試額凡所以鼓舞而作興之者有加無已猗歟盛哉滇南雖僻處天末建又

滇之極邊然觀風被化不異中土邇來科甲雲起秋榜幾分雲省之半宴曲江者科不乏人雖曰山川效靈亦學校培養之力也考建水舊未設學學附於郡由元迄今歷數百年規模制度視他學爲宏備而歷歲既久棟宇傾圯丹堊剝落予謀所以新之而未果閱歲甲午年穀豐穰政成民悅捐薄俸謀更新之進紳士告以鼎新咸踴躍稱慶乃庀材鳩傭量功命日舉墜補敝復增所未有自甲午仲冬至乙未夏數閱月而厥功告成凡堂殿門廡坊亭垣階無不爽瑱絢繪以視當年宮墻數仞富美畢具者雖難希萬一而入其門升其堂固燦然改觀矣獨是脩舉廢墜以興

起斯文者牧守之責也殫志力行以上希聖賢者學者之事也諸士子果能厚自期待爲聖賢之徒學聖賢之學處爲眞儒出爲名臣以無負

聖天子作人至意予且爲

國家得人慶又豈區區丹艧之華金碧之采云乎哉是役也工費浩繁經理需人諸生武琮張席珍曾嵩等皆潛心問學老成諳練之士朝夕經營人不擾而事集自經始迄落成實藉其力因并記其姓名俾後之人覽焉

重脩文星閣記

知州李 瀕

學宮有泮魯僖以前無聞先儒以爲象泗水者近是惟臨



建之伴秀甲於濱汪漚里許煥影臥波歷春冬不竭昔當  
道環以桃柳亭榭其中曰釣鰲亭曰文星閣登眺於斯游  
藝於斯壯麗爲一時最郡之薦賢書者蟬聯接武僉謂微  
學之力不至此無何劫火西來舉所爲亭與閣者回爐收  
之閱今廿五載矣瀕蒞建水每周覽之慨然想見風來水  
清然力實不能振也方今

上臨雍御講凡興文之務咸與維新我 太尊程公甫下車  
敦名教重經濟一以齊魯待臨建之士如學宮尊經閣明  
倫堂觀水亭各以次第舉其文星閣瀕何敢多讓爰就圮  
址度材鳩工匝月而告成宮亭據勝柏柳連陰空濛激灑

閒復有此翹然拱秀翼然霞舉者何減鏡湖爽氣耶擬冠  
諸演信其不謬夫 盛世崇儒重道旣如此而郡守實意  
作人又如此卽奔走勞吏皆敬襄厥事無不如此則臨建  
之士蝌蚪出詞源蛟龍騰學海求繼美於前者意其在斯  
乎其在斯乎至於奎宿文曲離方天馬之麗閣仍其名庸  
何贅要之學如臨泮如臨尤不可少此一閣耳因率爾爲  
記

臨安府建水州兩庠歲貢士題名碑記

並載恩拔  
副榜寄學

郡人曾 昕

唐宋之世取士不一曰秀士曰異等曰進士曰經明行脩

皆拔諸士而進於朝統而名之曰貢士元明以來士以文進其途有三曰科貢甲薦於歲者曰歲貢士薦於鄉者曰鄉貢士天子臨軒而試之會於禮部者曰策試貢士凡統云進士也我

朝用人之法兼善前代而取士之途因之曰明經曰舉人曰進士其實皆貢士也建自元明迄今科甲皆有題名碑記而歲貢士無徵寧非缺典今州守陳侯編輯州志科甲兩途緣碑錄無遺而歲貢士備極搜羅尙多缺漏豈非紀載無徵以致久而莫考歟吾臨人才鶻起媲美中州而郡志人物之選首推張伯興伯興先生歲貢士也士期自振拔

耳科貢甲何有焉因約我同志豎題名碑遂以爲記

重建崇正書院碑記

知府董弘毅

臨之有崇正書院越有明嘉靖於茲幾二百餘年院之傾圮亦幾六十年考當日剏之者爲郡兵憲瀘洲王公忠記之者爲郡人黔兵憲東巖

其後續而增脩之者有黔右轄楊公森名義之正申教之切東巖之言旨哉備矣獨惜其記之所有若講堂若退省堂若鄉賢名宦燕居射圃諸規制皆以兵廢而今所遺惟大魁閣巖然獨存閣後主以周程張朱五夫子祠祠像古雅道範尊嚴又爲記之所未及說者謂閣爲楊公森之補創而五夫子祠爲某御

史之所特脩然與否不可考而知也惟是書院而顏以崇正其名義誠大矣其隱爲世道人心風俗關者匪微矣要豈有他哉實尊崇聖人之道淑人心而詔來學也嘗讀史宋著作郎李道傳請下詔崇正學取朱熹論語孟子集註大學中庸章句或問頒之太學仍請以周敦頤邵雍程灝程頤張載從祀淳祐元年理宗詔極褒崇有千載絕學始有所歸孔子之道益以大明於世之語然則斯書院也臨之正道所係正教所垂正學所歸也不得謂學校具備而此遂可因任其廢興而不振也予以庚辰年承乏至臨謁於祠下鄉士大夫揖予言廢興之故謂五夫子之祠郡司

馬鄭公功勳重建至院之觀成惟予是責予心惕惕以斯舉不侔於大凡土木之功請於

制府巴公 撫軍石公 佟公 藩憲佟公 臬憲劉公

學憲王公 孫公皆責予不可緩謂今

聖天子表章正學其於五子進先儒而稱先賢親灑

宸翰大書學達性天四字頒各祠院崇隆之意千古莫加爲下者不此之務何以稱厥職予乃得獨任其力凡攻金攻木攻石悉各以類從事稱其力而餼其廩以報不苦民也祠之左右翼以齋房曰主敬曰存誠祠前魁閣仍新其舊閣前建講堂三楹堂之前表以亭亭礪六鰲顏曰宣諭朔

望率官紳士民宣講於此明

今上之教化與聖賢之道竝廣遠也亭之前樹以門書崇正書院如其義明與凡書院不類也且夫黜異端以崇正學煌煌

天語炳若日星前古後今不若合符節哉師生有舍經書有備設義學於其中延貢士王子永譽爲之師分俸以餽經始於壬午年落成於甲申年其經營規畫則鄉貢進士蕭子大成貢生王子永譽生員拜子臣禹共協力焉斯役也予一日守土之責也若如朱子所云成人材而厚風俗濟世務而興太平請以公之同人望之將來也夫

重脩崇正書院五賢祠記

同知 鄭功勳

子以巳卯冬解粵西西隆之役來同知郡事甫下車卽躬謁

至聖廟其規制之宏爲他郡所無繼以叅軍江翔請詣城西謁

五賢祠五賢蓋宋濂溪明道伊川橫渠紫陽先生也衣冠嚴雅道範端肅合而祀之尤爲閱歷所不多覩夫教必示其所宗材必儲之有地臨安鄒魯文獻之稱厥有由矣及叩祠所從來名崇正書院而專奉五賢於中者肇自有明嘉靖迨兵燹後燬將無遺閱今七十餘年不能如古固鄉



士大夫之咎而實守土者之責也。亟商之郡守董公謀協志同，撤其舊者，新之舉所未備者，創建之始，工於庚辰秋。距今乙酉春，次第就理，適予有青州之

命，將拜辭奉道而東，請顏其額曰：斯文在茲，又舉夙所攜而仕者，有古板五經四書大全暨史鑑諸書，悉貯之祠，以惠後學同事者，復欲以石記予聞孔孟之道，至濂洛關閩而盡所闡明，先民黃幹之言曰：道之正統待人而傳，自周以來，任傳道之責者，不過數人，而能使斯道章章較著者，一二人而已。由孔子而後，曾子子思得其微，至孟子而始著，由孟子而後，周程張子繼其統，至朱子而始著，是故歷代

推崇已極其至而總莫逾於

聖朝學達性天之褒頒之

宸翰懸之白鹿南嶽是

皇上重道之至於古罕觀也在下者尙不知所適從自棄孰甚然則五賢之祠卽五賢之道之所在也予於茲土得脩之寧非厚幸哉獨是劉因之言曰邵至大也周至精也程至正也朱極其大盡其精而貫之以正也茲舉也於安樂先生勿乃缺典歟抑亦祠一賢祠羣賢之心祠羣賢何莫非祠

先聖之心歟不然廟庭兩廡之享千古爲昭矣何可得而

疑之彼前之人祠之正也所以興教化明禮樂育人材維世道者有其心未嘗不實力於學以收其效後之人果能凜此意守其教以倡明其道而不敢視爲泛舉吾知人文之盛古今相望非獨一人一世之奉也是爲記

重建東嶽廟碑記

丁焯

五嶽爲域中巨鎮歷代載在祀典顧中南西北自嵩華恆衡而外不聞別爲立廟惟東嶽廟郡縣所在多有其爲制類於西方象教之說

天齊聖帝袞冕居中而十殿森羅臚列兩廡地獄變相種種咸具於前予嘗訝其恠誕不經且揆以諸侯祭封內名

山之禮疑爲越祀及覽傳記稱泰山之神主召人魂魄以東方物之始生故能知人命脩短而天齊王之封則始於唐開元十二年按月令五行之祀皆配以帝易曰帝出乎震震東方也則天齊聖帝之稱洵非無據後世祀典寢失古義惟福善禍淫之說差可警頑矧愚故雖西方象教亦所不廢况東嶽巨鎮煌煌載在祀典哉則郡縣之徧爲立廟也亦宜臨郡城門之右舊有東嶽廟爲一郡祈禳攝福者香火所輻輳廟創自甲午乙未之閒至丁未而重脩歲壬申正月二十二日廟正殿災相傳是夜漏甫一刻神座前懸燈忽墮案上燄倏騰起俄而殿焚翊日總戎王公臨

視瞻依聖容愀然久之顧謂將吏曰夫一燈之火甚微而數楹之榱礎頓盡可不慎哉爰集營標叅佐諸君謀再建而更新之公出俸橐以倡郡中諸文武在位暨鄉之大夫士下及軍民咸樂贊以襄盛舉鳩工庀材蠲及締構經始於仲春上巳以是歲仲秋之吉告成廟貌聿新聖容鼎煥因命予一言記事予謂王公之倡斯舉也意念深哉夫東方於時爲春於行則爲木西方於時爲秋於行則爲金木主生而金主殺生可過而殺不可過故上自

朝廷以逮文武百官莫不共體

上帝好生之德以子惠元元而惟上有所好則下必有甚焉

者故大道之成至於親不獨親子不獨子盜竊亂賊不作外戶不閉是謂大同公之倡新嶽廟隱然一以好生之治風勵有位而其誥誡將吏諸言又若示以不戢自焚之戒此其用意甚深而關於象指者甚大豈獨以神道設教導民以祈禳攝福而已哉夫禮有其舉之莫敢廢也敬其神明以保我黎民者郡大夫之職予既獲贊王公以其觀厥成因正東嶽祀典而推廣言之如此予固非迂而語恠者也樂偕斯民於好生之治者也是爲記

重建表忠祠記

丁 焯

臨陽地鄰交阯郡城西半里許舊有表忠祠祀故明永樂

時征簡定之變前後死事諸公歲以春秋二仲上辛致祭  
載在祀典明季沙逆倡亂祠毀於燹迄今未有脩復者歲  
時有司臨祭率拜謁於荒碑蔓草閒廟貌之不脩非所以  
妥忠魂肅祀典也歲庚午太守黃公遷蜀東憲副適際內  
艱賦歸有日焯以攝篆受代居有頃黃公謂焯曰不穀之  
謀脩表忠祠也屢矣屬以簿書期會之不遑因循以迄於  
茲今行矣設復委之後人安知頽廢之不仍此日也今將  
重建以畢斯願榱桷瓦甍暨茨之費具矣君其樂觀厥成  
乎焯心避之諷日既合工作用興乃卽祠舊址構堂三楹  
以妥諸公神位外戟門一懸以祠額周圍翼以牆垣納諸

舊碑而堵之經始於七月告成於十月黃公趣煒言記事以文麗牲之石煒則謂自有天地以來日月有時而薄蝕陵谷有時而震崩惟此忠義之氣歷億千萬禩而不可磨滅上以是風勵則四維張下以是自命則大節立諸公之死也事在永樂初年而祠祀之興則萬曆八年巡按劉公維始奏立焉我

興朝百度維新惟祀典之載在舊章者因而不革夫非風勵之旨千聖同揆乎今黃公於去臨之日亟以祠爲事既上以體

天子作忠之旨而下以嘉勵臨人士之心者義至弘鉅今而



後謁斯祠者爲封疆臣則思其所守薦紳衿裾則思其所立感祀事之不廢則思朝廷之激勸而謀所以報觀諸公之死在三百餘年之前歷昭代而其氣若新則思所以不朽祠祀之脩豈特無廢典禮云爾哉諸公爲兵部尙書諡愍節劉公儁諡節愍陳公治掌交陞布按二司事戶部尙書諡忠宣黃公福叅政劉公昱都司呂公毅叅政馮公貴侯公保都督黃公中知府劉公子輔易公先知州忠節何公忠死其事及崇祀始末具載舊碑茲不具論今建祠黃公諱明字龍光以武功蒙

今上特恩改授臨安府知府陞四川分巡川東道按察司副

使與燁同爲閩之晉江人燁既記其事復爲樂章以迎送  
神爰刻之石其辭曰

昔在明初撻伐張日南稽首歸版章諸公奉命綏遠荒  
文則旬宣武則揚蠢爾服叛不可常狼奔豨突茲陸梁  
積屍晝見天無光諸公仗節殉封疆後先騎龍遊帝鄉  
亦越中葉祀典彰惟茲臨陽控交岡廟寢奕奕神乃康  
妖氛煽虐榱桷靡妥靡侑慙烝嘗赫赫昭代崇忠良  
守臣祇事再肯堂神其來格歆裸將荔枝爲籩桂爲糗  
苾芬在御醕盈觴靈既降兮翩翱翔福我人民壽而臧  
金支翠葆且徜徉莫漫迴車兮使我心愴

重脩義倉碑記

劉彪

臨安義倉之設始於先輩薦紳樂善好施者捐置義田建舍五所以備凶荒以濟鰥寡法至善也自流寇之亂世變滄桑五倉沒爲灰燼義田半屬蒿萊義倉之名遂不復存矣康熙丁未淮南李公來守建水普惠施仁郡稱大治一時百廢俱興善政必舉凡有裨民生者公皆振作而行焉於是疆理義田定其租額清其四至照畝繪圖列之印册期垂永久仍捐金營倉於燃燈寺之側以貯租穀歲以紳士四五人司其出入完其賦稅將本田租穀除納秋糧條銀二項外所餘租穀年終舂米悉以濟貧且捐俸數金買

備鹽炭并給貧民又恐貧民衆多爲惠不均責令鄉耆每歲開列郡中鰥寡孤獨之數俾照數給米得以均平且無私弊其用意甚周其爲惠甚溥也說者謂社倉常平之設原以備荒茲獨歲歲賑貧者無乃與古殊乎不知吾臨風土平和無大豐歉且貯穀於倉出陳易新未免久而生弊公神明於古法之中其卓識更遠可謂留心民瘼者矣夫窮民莫告王政所哀義倉之設使熒熒無依者不致委身溝壑則豐亨豫泰由此漸致此爲政之本務要非具經世偉略者不能行也郡之人恐公之盛名久而弗傳乃命予碑而銘之并紀其田畝之數俾後來者可考焉公諱瀨字

來紫吳之興化人治州數載慈愛而廉凜凜有懸魚操教  
士養民德政自有民之口碑頌之後之史冊紀之茲碑以  
記義倉不能備書也銘曰卓哉刺史惠政孔多飲冰茹蘖  
剔弊除苛義倉復設德尤不磨鑄之片石泰山峩峩

新建北義倉碑記

知州祝 宏

皇上御極初 詔天下郡邑各置社倉悉遵朱子舊有司咸  
奉行弗怠建水先設有義倉於東林寺散賑予蒞任始紳  
士卽以監賑請詢得所由往見老幼紛如各受所與以去  
竊羨此邦盛事誠足上佐

朝廷愛養之仁而得朱子社倉之遺意也自是每冬夏輒一

出郭監視以爲常今庚戌春郡紳捷公沈君等復以北義倉請記於予予曰義一而已何東與北之分乎沈君曰臨舊有義倉五所前明鄉先達所置各貯田租備賑貧乏因丁亥兵燹田籍湮沒無查今在東關燃燈者賴故紳劉公請復於前牧李公餘田無考後於古壁得斷碑載有北義倉名而其事久廢今與鄒君之松及其兄龍門因里中舊積公田數畝各量捐已資倣前輩遺意更得同志轉相勸助合爲置田若干畝建倉於普庵堂歲儲田租亦冬夏二季出以散賑里中之衣食不給竝婚喪難舉者已三載於茲矣雖爲惠弗廣願邀一言俾後有作者踵而擴行之予

曰此仁人長者之行予固樂得而道之蓋士君子學古乘時靡不欲功施當世澤被羣生况隣里鄉黨之人爲我父老子弟其視斯世斯民不尤親且切耶有志者皆存此意以神明朱子社倉廣

皇上如天之仁豈不偉然盛事哉願與諸君共勉焉

重脩土主廟碑記

李 瀨

廟在州西南碑因丁亥損失創無可考重建於明正統二年有太常寺少卿晉文淵閣黃養正扁存予以承乏來守是邦兢兢焉念建戈鋌蹂躪後百廢未舉於是詢耆訪故將錢穀兵刑次第釐剔之而獨於祀典未遑脩復神得無

有恫乎今因建立文星閣暇復脩土主廟而考其地核其原惜創始名目僅於殘榱朽棟閒掃窺歲月若當日之穹碑題字化爲荒煙蔓草久矣不復覩矣及今不圖又何以詔示來茲爰命匠石梓人爲之堂爲之廡爲之戶爲之牖使神或有知則捍患禦災默而相使神或有靈則奠邦寧土祈而報建之河山不改卽神之赫濯無疆其祐我子孫黎民又豈可以歲月紀耶且得并與前之哲人同垂不朽云遂作詞三章以代建人迎送之意其詞曰 后德昇兮后澤凝保我陵兮粒我蒸祝有應兮依有憑貌稜稜兮氣騰騰建祠仍兮建土澄又爲之歌曰雲車駕兮風馬下同



岱華兮輔造化刑牲炙兮桂醕學神來假兮靈無射恆代  
謝兮歷冬夏再爲之歌曰棟嚴莊兮貌肅將時椒漿兮歲  
烝嘗相陽陽兮祐善良壽而康兮熾而臧

義塚碑記

李 瀕

義塚者萬人塚也何以義稱嘉死難也一夫守正一人靖  
節皆得以義歸之况億萬生靈抗賊不屈慷慨赴死哉此  
與聖賢所稱舍生取義者豈有異也予承乏是邦有化民  
之責凡事關忠義類宜表章以勵風俗謹詢父老詳其始  
末書之於石以示將來明季流賊猖獗入寇滇疆所至莫  
敢與敵臨安官紳士民協心拒賊預備矢石爲禦守計未

幾賊至時丁亥五月二十日天甚晴明賊至而風雨大作  
內外若晦賊疑城中無備突闖攻城城上炮石如雨傷賊  
千餘賊畏而退詰朝復攻復被傷凡三日賊用地雷衝  
震傾東北城遂陷一時人心憤怒各家引火自焚登守者  
且戰且死終不受屈賊恨其抗且恨其被傷者多大肆屠  
戮殺幾無遺留鄉宦數人欲予之以官諸宦不屈賊復殺  
之其時肝腦塗地橫屍遍野計二十萬人兵憲熊啓宇焚  
而痊之題其碑曰義塚謂臨之士人皆守正而死也嗚呼  
人生百年亦死耳丁亥去今二十有六載使當日順從苟  
免則老者至今已死壯者至今已老數十年後未必不盡

歸北邙與其泯泯而死何若烈烈而死乎二十萬人正氣  
常流天際高風猶在墳頭可以正人心可以扶大義其有  
關於風化豈淺鮮耶我

皇清定鼎崇獎忠義凡諸節烈皆得表揚若茲抗賊死難數  
十萬人倘採風者上之

天子自得異寵褒嘉但茲日之忠魂寥落嗷嗷缺祀此亦仁  
人君子所共傷也縉紳劉公彪以監司裁缺歸里捐貲置  
田永爲祭需三庠諸生以狀聞予予白之 院司皆嘉其  
義舉且免其田糧之差徭以豐祭祀郡中人士又捐貲買  
石復脩其塚旌善之舉人有同心也故予亦樂得而記之

總鎮張公惠義碑記

曾 昕

國家承平日久吾臨軍士蕃衍幾數千戶羣仰給於二千  
四百年之貲糧以數口之家食一人之食至益以冠婚重  
以喪祭倉皇無告一或值雨暘愆期之時市肆缺糧患豈  
獨在兵哉戊子歲都督張公以

天子心膺出鎮臨元恩威并著文武兼資下車以來勤求疾  
苦爰分清俸俾三營將弁每秋成平價糴穀各備五百石  
貯公所名曰義穀市偶告匱按兵發還倉期以歲年而兵  
大悅夫兵得食則不復爭之市市因得舒此數日之食以  
專市之民則民不復與兵爭而閉糴之家無從施其射利

之計於是穀價平人心安而民又大悅至其所爲義銀則尤有關於風化之大者謂婚姻者人倫之始喪祭者人道之終復每營捐二百金著爲例凡遇婚嫁及喪葬之家各給四兩源源接濟償仍經年綢繆至矣調劑周矣兵與民何幸而得我公哉昔晦翁出守以常平之制上之朝章臯鎮蜀婚嫁給綿衣喪葬者與榷痊天下後世仰其休若我公者其亦可謂兼之也予故樂得而記之

公築何灣石隄碑記

郡人王立憲

郡諸水匯於東南以閩洞爲歸東南田皆膏腴近河者先收其利年來山蠱水渙沙土填實河身日高河咽日塞膏

腴者漸變爲澤鹵衆河皆然而瀘江之患爲尤大蓋河之腹旣無寬廣淳蓄之處以消融其暴戾而舉驟盛之勢一往衝射兩岸更低任其狂瀾肆溢則未得就水之利而先受水之患矣河灣有隄名曰倉田大河之水至此正當馳急而隄皆浮沙不足以當其狂勢前之決者累矣田成沙礫租賦不收動勤文武執事之憂勘踏指授謂非易土而石必不能勝規畫誠善矣然豈附近河隄十數家能辦此哉今冬農人張如玉輩合衆力伐木伐石以速堅此隄而請予爲記予謂水之關於治大矣周禮遂人掌邦之野遂溝洫澮井然有條又稻人掌稼下地其爲瀦防諸法尤詳

且備顧欲得上流之消洩必先下流之疏通是謂疏分之以殺其洶湧之勢復合之以一其奔放之衝是謂濬至若塞之者砂土之力不敵木石則石隄尤要矣然先在疏之濬之而後塞者功可成是必有起而任其責者康熙四十年孟冬朔日也

新建中河石橋碑記

郡人曾旭

河自西南來左掖瀘江小河爲遠近山民及諸司甸往來之會舊架以木橋山水驟集輒擁去又必更置丁丑冬郡紳士惻然感之爲久遠計謂非礱以石不可一時雜哀釀會畚插齊興伐山作礎煑石爲堊雁齒橫施歷歷可指天

光雨霽有長虹欲飲之狀往來者方軌竝駕如砥如矢極  
利涉歡嗟乎其功鉅其事可謂久遠矣其在書曰政在養  
民水火金木土穀惟脩夏令曰九月除道十月成梁是故  
清溝洫葺橋梁所以備旱澇免牽濡也郡南河一帶村落  
相望疆場溝塍綺分繡錯灌溉蔬植居民尤便頻年瀘水  
沙壅堤隕每夏秋霖雨溟漲無端凌跨茲河交相爲害渡  
者以航災狀屢告爲之計者寧獨茲橋云爾哉會當事留  
心民瘼導壅疏滯固金堤培柳埂而瀘水之患一除是河  
亦與有利焉乃茲橋適於是乎告成且鎮以樓竦峙高瞰  
瀘江竹樹參差煙光迷離蒲菰菱藻鳧鷖飛鳴上下遠眺



城廓歌鍾隱如相接太平風致洵足樂也予因慶  
聖天子德被八埏河清海晏政脩人和百廢具舉故民有餘  
閒得以共襄厥成同樂康衢因記之如此

糸竹多ヲリニ



鄂少保開巖洞碑記

少保大司馬西林鄂公之來總制斯土也視三省如其家  
心民心務民務雖邊徼異域苟有濟於民間於公者罔  
不切肌膚聳骨髓不爲不已爲之不底於成以不朽於  
後世不已矧其託宇下者乎臨安去會城不五百里古  
响町國也崇山大澤宅其中長江巨河環其外每夏秋  
溪水漲溢望如海故以建水名水大而能利民亦能害  
民者莫甚於瀘江其發源也則始於石屏之異龍湖合  
塌冲象冲暨六河九湫諸水皆會於瀘以奔赴巖洞巖  
洞者所稱石巖山之水雲門也洞前虛廠可坐數百人

登巖以望洋洋乎浩浩乎利田疇資灌溉地肥饒民殷  
富者不恃有此川哉然當其水勢汎渙決圩防沒田廬  
又往往爲民患揆厥所由則巖洞實障之瀘水從衆流  
來合東至於巖洞伏流十餘里出阿迷入盤江以爲歸  
宿此其性也而巖洞之前石磴嶙峋縱橫洞口細流則  
峽道曲入洪濤則湍波四潰復多石埂橫截中流者十  
有三重唯伐石鑿埂使無壅遏順流而下則水利興水  
患息矣自

少保公至召我郡縣告之曰瀘水之患溢臨境巖洞之障  
厥宜屏刊乃石斷乃埂民害除農力省功惟速志惟猛

我憂以紓而汝是做屬吏聞命者咸唯而退故老相傳  
洞口有神物憑其上動一拳石者輒大風驟起煙霧迷  
離咫尺不相見所擊砂礫飛數十步外能中傷人以故  
鮮有過問者

雍正八年正月十七日郡守東萊張公無咎與總鎮張  
公應宗州牧祝公宏既奉

少保公命往疏河甫至令伐巨石錐鑿不能入強入之獲  
未寸許忽風起砂飛石擊工人手落其一指衆皆驚散  
諸君子相顧錯愕聞於

少保公公曰神庇吾民者也吾惠吾民而神不許謂神何

唯子之誠不足以感神故神弗靈吾其祭以文通以誠  
神必許我汝敬往哉太守乃賈文以祭祭畢雲開煙斂  
天大晴霽光色照耀於是督工鑿石而向之剛者柔堅  
者脆應手而伐輒得大塊或數尺或數十尺不一月而  
十三重堦盡拔而去自此水湧沙流河身丈餘無復避  
礙巖洞遂不爲患下流既疏然後上流得肆其力於是  
溯衆水所經按一江所入凡河之淺者深之滯者通之  
岸之低者崇之薄者厚之壘浮沙者易以茅塊堆淤淖  
者運於遠邱又復伐木爲椿編竹爲簣以爲兩岸之障  
聳如壁平如削堅如石滑如漆風雨不能摧波濤不能

入魚鼈不能損功成之日計程不二百里計地不三萬丈策數千椿數萬工數億官勤勞役奔走上無懈心下無惰志而後得以有水利無水患雖積雨經旬連陰累月而沿流循渚堤以永固禾以永豐歲書大有矣於是郡人士咸相尙慶曰此

少保公生我也願記一言以貽我子孫使後之飲若水者知源服若疇者識德爰歌以記之詞曰

雲門鑿瀘川濬龍湖來阿迷進達盤江往而迅水安流穀豐潤恬河伯熙田峻困倉盈鱗介牝億姓歡百神順官弁康吏治振古禹稷翼堯舜理水土欽且慎今其誰

維

公僅

雍正九年八月朔日

州人公立

瀘江橋碑記

郡人趙節

滇南臨郡之瀘江河發原石屏州異龍湖至西屯而諸水會合復有象冲塌冲歸其右窰溝南莊歸其左綿延浩瀚闔郡灌溉實攸賴焉然古橋噎隔於中流巖洞紆紉於去路河水泛溢每爲臨城之憂歲在己酉我

郡守張公

諱無咎山東萊州府掖縣人陞驛鹽副使

來守是邦凡興利除弊修廢

舉墜諸大政無不畢舉復遵



少保鄂公指授窮源迴流遍履津要分委賢員督修瀘江  
諸河厚築堤岸宏開巖洞向之浸淫者悉資灌溉矣願  
瀘江一橋逼近城郭舊制卑狹山水驟發每致壅阻堤  
岸崩決田廬淹沒實爲瀘江上流之害此橋不廣此患  
終無已時

張公洞悉其情復委員監修捐俸首倡屬員紳士忻然  
樂助以封君傳諱大美者董其事解囊好義會同委員  
庀財鳩工卑者高之狹者廣之自庚戌莫春迨辛亥仲  
春而橋工告竣自茲田無淹沒廬無漂泊車無濡軌人  
無蹇裳昔有許公堤

諱宗鑑福建泉州府晉江縣人臨元兵備副使

今有

張公橋後先輝映均足千古哉維時分修堤工開鑿巖洞者則有署石屏州牧祖諱承祐教授夏諱冕學正關諱繩武經歷詹諱在亨司獄朱諱國瓚吏目黃諱環通海典史金諱祿基臨澂鎮把總姜諱志廣陳諱士俊外委把總李諱忠董諱其復邢諱騰蛟王諱永甲胡諱永成羅諱萬有曾諱世榮百總毛見采曾朝相農官唐詩是皆實力奉行有事河工者至監修瀘江橋則石屏州吏目葉諱世芳耑其任也宜並勒諸石以示後來焉是爲記

義穀會記

知州

夏治源

漢陽人

從來王道始於養生送死無憾而養生送死由於穀與材木不可勝用但送死視養生爲急送死需穀視養生更急蓋素封者得之爲有財煢獨者顛連而無告此造化所不及仁政所必先者也余刺建後修橋梁築堤埂理義倉瘞骼骨其爲臨謀養生送者亦漸舉矣時有訐訟來庭據生員盛運新馬雄等僉供墾種右所軍田地一分租十五石先年捐入晏公祠義會助買材木後義會不需此租更名義穀每送一棺助穀一斗以爲埋葬之費檢查舊簿歷有實據仍斷入廟隨棺施送鈐印於簿以杜侵蝕諸生轉慮日久弊生請文勒石余思吾建有社倉

以養生義會以送死今又濟之義穀人心風俗猶爲近古是不可不記也粵稽先王孟春有教掩骼埋胔周禮蜡氏有令路死埋揭是以三喪不舉郭元振傾囊以濟百棺久停曹校尉置地以葬偉哉仁人君子之用心不謀而合斯舉也雖其數無多然能體先王王政之端而補造化所不及人人踵而行之庶亦無不得所之憾矣是爲記

俱氏先塋表義碑記

郡人楊德浦

順治四年丁亥五月二十二日流賊李定國陷臨安全城  
官紳士民抗節不屈而死者二十餘萬人其首先就義原  
任光祿寺掌醢庶監事俱公諱夢斗闔室自焚死爲尤烈  
云公字知衡號九台翰林中丞諱祺之姪弟諱祥之子也  
公少秀穎英發讀書通大義聞人談忠孝事喟然曰爲男  
子不當如是耶與表兄王公繼遐勵學砥行以例入太學  
遵中丞公家誠治家嚴而和友愛兄弟無間性豪俠喜交  
遊座客常滿議論關名教汲引後進如不及於聲色貨利  
泊如也連歲飢公約諸同人竭力以濟有不足登公堂如

意而去曰俱公子活我桑梓利弊白之當事動中機宜鄉  
曲剖直一言輒解尤有至性兄夢鯤卒於京奔走萬里外  
扶柩南還祭葬如禮人益高其行其持躬制行類如是三  
月間流賊李定國屠曲靖攻楚雄以援黔府爲名沿肆殺  
擄昆陽呈貢留寧江川河西被屠公集官紳士民盟神誓  
衆曰賊且暮至矣將奈何諸生包奇偉進曰亟遣叅府領  
衛兵一千直抵喉結箐設伏用砲石賊不能入速調廣南  
儂氏勁兵及各土司兵入援城可保也公是其說而卒尼  
不行是月迎暉坊不風而倒天雨血有星如錐象小星隨  
走公遣人至五月坡問蒙自江天水江曰此天狗犯月貴


鄉不利宜預爲計公曰天變如此其兆之矣遂與王公約曰城亡與亡除一死更無別法相對淒絕五月十九日辰時賊李定國逼郡城以王家巷爲大營表忠祠爲前營白虎口爲中營包家園爲老營砲石如雨時承平日久不知兵城內惶恐莫敢挫鋒旣而寂然賊用放迸法以火藥貫城遠遠一線通中人莫能知二十二日辰時城崩破賊從東南隅一擁而上賊入城王公踉蹌而入謂公曰城破矣公自爲計公曰而欲捨我而去耶前約之謂何王公曰未也亟遣幼子天貞出以延王氏後公登樓設纒數十積薪樓下曰爲臣死忠爲子死孝正此時也我家世受

國恩豈可向鼠賊求活耶衆曰諾亟命約甥廖公楚良良未  
至而賊滿城中公曰不能待矣命收誥軸神影圖册令家  
人馳去又令家人負子姪懷絨懷綬等出以存俱氏一綫  
家人報王府曾府火起公曰二公竟先我而死耶遂率衆  
投繯焚樓以死王公同室死焉踐前約也同室死者俱公  
諱夢龍夢驄夢夢鼎夢斗夢冠懷清懷恩懷慎懷動懷直懷  
蘭懷積懷生懷荃懷袖懷葵懷敏懷溱懷節懷蓮懷明洪  
緒闔室死者男婦僕妾共七十餘人嗚呼流寇之禍烈矣  
哉定國以張獻忠僞黨乙酉仲冬

王師入川獻忠授首定國與孫可望劉文秀艾能奇潰奔滇



黔定國尤強悍先入滇性嗜殺下堅城如破竹蔓延至臨安公等申以大義不惜以一死而堅與之持其義氣已高千古矣卒之孤城失陷億萬人水火蹈之而不辭威武加之而不懼脛可斷肢可解百折而不回殺身成仁至今凜凜猶有生氣也雍正庚戌歲余與萬君調元州守祝公請修建志採輯舊聞得丁亥死義者若干人備著於志難免遺漏之譏及聞致仕王公立憲爲余道及夢斗公及伊祖繼遐公義烈狀甚悉憾志之未詳也茲以俾君溥仁孝立心勒石表義於祖山之陽問記於余余悲其志不獲辭爲次第序其始末如此以俟後之人有考焉是爲記



三  
44  
②

蘇子瞻  
PDG

臨安紀事

丁焯

內屬會聞紀漢年响町風物甲全濱地經戰伐仍千戶人沐

詩書憶二賢

明王景常韓宜可  
謫此文教始開

赤仄舊通交趾賦

交人所用亦  
皆中國制錢

烏

蠻新能保頭錢

魯魁野彛橫索村民名保頭錢

清和氣候鄉關似

早愛荔枝鶴頂鮮

臨安懷古次吳克庵先生韻

丁焯

晴窗向曉署樓開城市蒼涼入望哀懷遠侯歸存舊裔讀書  
人去剩荒臺雲蒸交嶺驅寒去雨過元江挾瘴來十萬同時  
埋義骨傷心廢壘謾徘徊

雲龍山眞武宮

馬蹄蹀躞遶青郊，傑構新看闢草郊。  
絳闕平臨天北極，丹樓高瞰日南郊。  
山深地隱龍蛇氣，松老雲封鶴鵲巢。  
安得栖真同羽客，簑瓢長此桂林梢。

訪雲峯周居士於南山絕頂

張愚安

花落花開歲次頻，襟懷常蘊太和春。  
心存出世非隱士，志在高山慕古人。  
月挂巖頭行可掬，雲鋪足底座堪親。  
幽栖自是塵踪少，笑我癡頑亦開。

其二

羣山環繞勢如奔，絕頂遙看紫翠翻。  
呼吸可能通帝座，憑虛直欲問真源。  
安心常在那伽定，遇境隨離幻妄根。  
除却采薪

兼汲水更無一事可相論

過舊諸葛廟感懷

葉 涑

萬古天威凜不移  
行人指點認荒祠  
寒泉尙集轆轤轉  
舊額猶深父老思  
革面諸蠻空恃險  
攻心一語自堪師  
巍峩劍佩今仍在  
香水年年溷紙帷

武侯祠

有淚長揮兩出師  
今來新拜武侯祠  
溪同瀘水長駢日  
地接龍山穩臥時  
舊壘荒蕪雲日護  
神威擒縱草何知  
風流千古思名士  
酌酒須吟梁父詞

登指林寺準提閣

誰指荒林見一燈  
宋元住蹟此堪凭  
香花佛國無今古  
烟火人家感廢興  
曲磴草深忘逐鹿  
垂簷雲起過飛鷹  
相傳更有靈禽異  
幻跡無從問任僧

登萬明寺

本集不載

市塵吹不上禪關  
近數河流遠數山  
天外飛鴻真散漫  
寰中鬧蟻劇躡難  
漁樵歌答欣相和  
晚近思侵卽痛刪  
好景爭酬無點俗  
未逢僧話也閒閒

塲後遊雲龍諸寺

尤有爲

杏係譚  
璜作

數載名心愧未忘  
一從蘭若卽空王  
泉聲靜聽清如磬  
山色晴看錦入囊  
採藥人歸黃葉路  
習禪僧住白雲房  
能如惠遠

真相得卽許淵明醉不妨

將臺遺址

蕭大成

百蠻烽火靖高臺二伯芳名望轉灰  
碧草春郊埋舊蹟青燐夜雨照城隈  
南人自昔知不反漢土何勞再築堆  
應是太平緣有道翻從剩壘弔雄才

金剛嶺道中

長江一線走迷蒙曲磴削巖宛轉通  
旭日纔高天傍午石田春杵樹燒空  
饑寒道路偏成瘴血汗棉茶盡屬公  
南望交州勞顧指亂峯如薺隱叢叢

遊李仙洞

張端亮

鶴飛何處杳難求爲訪遺踪半日留石室無端封紫蘚柴門  
依舊枕寒流林梢果熟柑三寸竹裏茶香雪一甌悵望獨將  
鷄犬去路人空指是丹邱

巖洞

黃肇曾

蒼崖碧嶠鬱氤氳賸有山靈護洞門露滴天漿晴亦雨炬傳  
星牖晝常昏汨流暗咽魚龍懶怪石斜支虎豹蹲幾欲摩巖  
留姓字墨蹤常恐沅雲痕

武侯祠

四壁丹青列陣圖分明王佐大規模相依魚水三千里肯戀  
耕桑八百株畫棟不雕留淡泊遺容宛在識眞儒吳宮魏寢



皆榛莽得似祠前古柏無

表忠祠

誓師南去瘴雲屯，恨不生還報至尊。  
望祀蘋蘩憐異代，陳情烏鳥託孤孫。  
風吹碧瓦歌殘月，草點流螢亂夕昏。  
維有煥山青眼在，相看華表慰征魂。

古甸龍潭

刑世瞻

千山曲抱小亭幽，萬斛明珠落井疇。  
竹窓應邀丹鳳宿，潭深自有老龍遊。  
風回綠野香生稻，人坐青林月滿樓。  
幾許塵囂都不染，心清欲共水清流。

郡學泮池

拔貢 許書屏 石屏人

活潑源頭一鑑泓分來洙泗煥文明影垂遠岫層層翠紋皺  
澄波細細生曉日光騰芹藻潤春風嘯拂李桃榮漫云觀海  
難爲水無數蛟龍奮太清

五言排律

冬仲十五夜泛月泮池

廖大亨

靜池澄素練夜魄發寒光子月泉心動葭灰春意藏晚烟飛  
市細淡影墮山蒼印渚珠啣蚌文星唇吐居空中樓上下水  
面樹低昂艤駕比魚目箏擲落鴈行燈螢紅趁月觴雀碧欺  
霜香霧沾衣濕波星逐掉忙仙槎探宿海赤壁醉江黃抱兒  
壺中轉騎鯨天上狂曲仍彈水調聲亦繞河梁欲訪支機石

來維青省舫子猷乘夜興元禮竝仙航醉逐魚龍舞纜牽荇  
藻香宿飛鳥烏鵲睡起錦鴛鴦閣擁青嫵女屏倚粉面朗天  
山晴雪曉仙客羽衣涼沆瀣金盤露崑崙白水漿劇談星欲  
落刻燭夜偏長漱澗人如玉淋漓醉是鄉

過虎谿十韻

曾旭

信屬臨陽塹蠶叢一徑懸銅牛不到處金馬未通前樹密晴  
猶雨谷深霧似烟鳥啼山寂寂鶻落草芊芊捫蘿難尋路扶  
雲易上天空巖傳客響枯木人僧禪遇石頻呼丈逢人疑是  
仙仰看猿共怒翻與僕爲憐畏險忘幽興登峯得舊緣何須  
嗟九折好着祖生鞭

五言絕句

箐口關

巡按何梯

啼鳥藏葉底流水出花間石亂人行路雲深馬度關

白鶴舖

白鶴何年去猶存白鶴名夜深風露下彷彿九臯聲

翠屏館

曹安

曙色山城迴溪聲草木催停鞭何處好侯館翠屏開

七言絕句

南牀舖

蒲已生芽柳已花杜鵑聲裏怨無家東風馬上歸來客芳草

平川望眼賒

納樓司

李璧

壑雲擁馬欲迷途鳥語辛酸四面呼  
寨長踰山遠相訝諸蠻負弩作前驅

溪處司

青山疊疊總無名鳥韻花容繫客情  
路入白雲盤一線霎時飛雨霎時晴

撫蠻臺

爲萬氏作

巡按姜思睿

平生恥讀和戎議今日响町見百蠻  
瀘水灘頭談舊事南人不反乞生還

系在及フリ示  
長鳴鷄

知州劉 儆

八月高秋畫院深和風和雨叫清音頻頻只管煩他去未必  
人人是舜心

開化寺桃花

廖楚良

空門着色費安排水自流時花自開多是兒孫曾面壁嵩山  
絳雪又飛來

其二

一簇朱霞繞徑排中山偏有笑顏開春風吹下人間世惹得  
漁郎問訊來

其三

層層錦浪是誰排  
綺樹新粧媚日開  
人在維摩獅子座  
晴霄天女散花來

其四

桐柏靈嘯面面排  
春風着意艷陽開  
寄言洞口人何笑  
前度山翁採藥來

雲龍精舍

張孔昌

是是非非任縱橫  
焚香戶內絕經營  
夜來試看窗前月  
惟有空山分外明

昆池竹枝辭

蕭大成

郎自上街儂守船  
停橈且補昨宵眠  
載得魚鰕都換酒  
小小

魚村不用錢

十八束裝嫁太華翁姑世業老魚鰕前年生兒今三歲也解乘流捉浪渣

三市街頭米如珠將軍有令罷度沽儂家種得波千頃也愁海澗沒漁租

詩餘

過東林寺百字令

章士元

東林蘭若論雅致頗稱郡中風物十里紅塵無避處須着此間幽僻白晝游絲黃昏清梵百慮應俱息多情傲吏故應來此成適 自槐菊徑成荒棠陰未滿歲月虛拋擲忙裏逢僧



聊一話閒得浮生半日山水之間醉翁幽意幾箇人知得凭  
欄一笑寄與後來佳客

遊異龍湖

軍衛屯所  
在萬年歡

陳封

畫舫西風喜湖光如練最宜殘雪蓬島樽前共對芙蓉時節  
六詔消磨尺鐵到此處峯巒橫絕休拋撇廢館荒臺一代淒  
涼人物鬢毛頰白料難放天昏地老歌聲莫闕兩岸青山  
多少英雄埋骨儘取金印銅符休換卻吟詩嘔血甘心署漫  
浪頭消受一溪明月

响町月節漁家傲十二首

郡人包其偉

正月响町春已透瓊樓碧樹烟光湊宮樣衣裳風滿袖香橘

柚椒杯占斷江南秀 士女嬉遊夜轉晝笙歌雜亂蓮花漏  
月下鞦韆疎柳扣燈節後佳期約在花朝又

二月响町花氣曉綠窗沉靜啼春鳥楚管秦箏彈未了思浩  
森碧桃紅杏迎芳沼 袖拂鸞箋情興杳尋春漸覺春腰裊  
侶燕儔鶯如意少歌窈窕紫駟嘶入梨花杪

三月响町無積雪南郊北社青相接露井新烟炊不歇烹玉  
屑墳頭祭掃清明節 插柳佳人光比月紅裙皺損榴花折  
芹藻蒲瓜香未絕杯言綴東風吹亂啼鵲舌

四月响町迎佛會蘭膏一沐千金費隨喜法筵無賤貴松雨  
吠通宵鼓鈸風翻貝齋能佛婆花底背蒲團趺坐談三昧往

有美人清婉倍貪拾翠行行帶落丁香佩

五月晌町無惡夏水邊林子開精舍往往仙人來稅駕碧雲  
誇至今留餐冰壺話 魚戀穀花儂下壩雕盤雪藕來花下  
長日圍碁清興乍詩酒罷荷風早放炎蒸假

六月晌町幸小築薰風亭館無煩燠竹簟方牀人倦讀開畫  
軸新詩寫得毫端禿 溽暑雨疏梅正熟松明火徧田家穀  
擊缶吹爾下平麓祈田叔煥文山下煙霞羸

七月晌町秋乍穎花香月煖如春景乞巧穿針池上問看煥  
嶺嵐翻翠疊千層影 令到梧桐渾未省煮蒿漸入中原境  
月下聽砧相對永銀漢耿邊城想自今宵冷

八月响町秋婉變長渠淺碧芙蓉倩狎鷺親鷗情未倦明月  
翫平分秋色來家宴 桂子娑婆和露薦水壺濯魄雲成片  
一曲霓裳鶯和燕醒酒面香風剪剪生團扇

九月响町秋意久景花開遍瀘江口村市揚幡朝北斗祈壽  
耆茱萸先浸重陽酒 明月蓼花同白首登高誰讓誰先手  
醉吟落水寒生肘霜降否一聲鴈鴻來衰柳

十月响町泉水凍浮梁又往看巖洞花爆燈毬烘石空春酒  
甕遊人似作遊仙夢 南北聲幸齊拍弄神魚躍得凡心動  
別有乾坤看翥鳳偕伯仲仙舟省失桃源衆

十一月溫泉如甌釜櫻桃未謝海棠吐北寺南山新卉譜遊

人虎簾間煖氣蒸鸚鵡 嵩祝既成歸祭祖和羹剪韭享童  
毀筒養微陽非小補逢九數空中鶴鶴飛寒羽

十二月响叮風解籜海棠初醒胭脂弱鳳曆新頒春又作相  
踴躍鬧廳鼓打年歡樂 開遍茶花紅灼灼村粧野豔綠城  
薄土鼓迎牛爭繡錯分歲酌千家爆竹驚寥廓

附閨咏

獨坐

希班  
任倣  
女

唧唧蛩聲遠迢迢更漏長獨居無箇伴明月上紗窗

咏梅寄夫

冰肌一樹梅蕊發心如豆獨占百花先反落羣英後

存存

存存姑州守劉儔女雅好詩詞  
值丁亥難縊於署中時年十六

寄堂姊

未必心同面亦同  
桃花另是一番紅  
回鄉有夢何人見  
盡付題詩不語中

咏白牡丹和韻

興弟

向儔孫女

謾道姚黃貴比金  
天香雪影夜來深  
玉欄杆外梅花伴  
一捻何曾動爾心

過異龍湖

搖曳空青盪小舟  
海邊突出化龍樓  
城連山色春圍住  
盡在雙眸一望收

詩

五言古

巖洞

吳鵬

雅志在山水臨眺興無倦  
竚望城東郊幽巖表南甸  
使君復愛客撫景開方宴  
解帶遡南風手掬水花片  
披榛得微路延瞰中巖偏  
結橋渡雲溪列炬散晴電  
怪石虬龍翔層臺玉芝炫  
旋轉尋丈間幻化千萬變  
勢凌天姥奇桃源名並擅  
自非神明護乾坤豈終見  
日來若塵縛勝引資遊衍  
薄暮下山椒心賞徒猶戀  
安得長公術移此中州奠  
依棲鍊五藥辟穀謝朝彥

半閒亭

章士元

昔賢理彭澤託迹東西林豈繫孰名教實寄方外心余質本  
樗散黽勉嬰紱簪西南繫二郡綿力苦不任微科與敲朴填  
此煩冤襟爰追昔人意佳境還招尋邂逅入精廬幽賞愜孤  
吟曇花爭永晝香靄散秋陰夷猶水成久瀟灑良猶深乘興  
數來往挈榼聊自斟同行盡窠服相歡各矢音如知會心處  
無間古與今倏忽歲云改庭柯鬱森森朱諧結廬願有懷春  
江潯悵此羈旅迹繾綣空蹄涔何當返初服一臥吳山岑

遊雲龍山

御史

佖

祺

建水人

靈麗橫地維巖巒鬱鬱佳景誰將兜率天超然置人境曠渺出



層霄躋攀實幽靜上覆林木陰下俯水天影清響振涼飈餘  
霞帶輕隕金碧樹杪懸鼓鐘聲炳炳雜以溪鳥喧但覺泉石  
冷疾雷破南山夕陽上高嶺幽壑斷復連羣峯散逾整白雲  
若流波明滅如龍騁自顧機事損况乃塵俗屏俯仰發長嘆  
遨遊慚不猛

冬入雲龍山

廖大亨

落葉滿香林人踏葉深厚積霜溼空谷高烟平霽岫山谷蒼  
且寒溪毛碧以瘦宛轉爲尋幽古徑聊相扣枯籐蘿帶垂澗  
咽松聲吼一僧啓荆關選置轉幽秀眼曠天地開萬物謝雕  
鏤高深淡心懷清暖變氣候殘絲掛衰楊霜蔓縈寒柚楓樹

澹山容草虫吟凍後丹葩引斷香殊覺春光漏藉草傾玉壺  
花間疑美媯孤坐看飛雲永矣忘晴晝

煥山

鄒應揚

青青煥文山塵淨山光燦陰晴各殊容昕夕能互煥草木敷  
新榮秀色浸几案上有五老峯峯峯插天半鬱葱氣可餐倒  
影曾入泮蒼紫峙若屏卓然自崖岸筆鐸蹶山腰形勢不相  
亂雲霞時往來散作諸峯冠枕石吞翠微松風答吹萬猶憶  
明月中子期或出玩

七言古

瀘江靜釣

王景常

長江西來幾千里，白浪飛流拍天起。中有修鱗長比人，不入  
先生釣竿裏。先生襟度足與娛，直釣在意不在魚。要將清流  
捫星斗，不與怒濤同卷舒。昨夜一絲蘸寒月，今夜一絲拂飛  
雪。舉頭傲睨天地裂，白光夜射蛟龍窟。先生釣竿幾許長，先  
生經綸千丈強。子陵桐江遇文叔，尙父渭水逢周昌。江山回  
首應非故世事，茫茫難縷數。赤壁天空雁不來，采石月明鯨  
已去。乾坤上下清絕塵，天潢水白結水銀。先生有意投竿起，  
歲月無情那待人。

曲江溫泉

巡按 瞿 俊 常熟人

我初按節來南滇，與觀地志開溫泉。寤懷淨浴洗身垢，此心

溫想常懸迤東一路走千里九月荒炎如暑天金風不解  
送涼信鬱蒸反劇如熬煎行逢曲江古名勝解衣浴罷仍留  
連靜思物理怪幽妙有口欲語心難宣初疑堯時有十日射  
落一箇溟池邊火輪落地凝不散珠光耀出重淵泉又疑太  
古女媧氏補天鍊石憂天穿熒熒宿火未消滅太冶煮火埋  
炎烟又云浴此可祛疾奔走羸老爭趨先我身無疾底須浴  
好事豈必分愚賢此泉有買本無價一日可值千金錢若教  
亦被西子污棄置更有誰相憐環流入澗注澄碧青鏡照耀  
分強妍行人過此須憩息肝膽瑩徹心醒然餘波出澗溉田  
畝普濟旱曠成豐年我民世世被餘澤稽首莫報神功玄詩

成長歎下山去乘風快著青驄鞭

游雲津洞

巡按李本固

汝南人

丈夫義氣凌高秋飛行八極隘齊州匹馬西南天際頭貪奇  
到處爲冥搜昆明之左巖山陬中有仙窟結巖樓神藏鬼呵  
誰敢求我來始得撮其幽洞口倒涵丹水流長橋天橋偃蒼  
虬振衣前渡恣犇猶森森石笋排戈矛側身一罅偃而僂手  
闢洪濛觸不周別有天地非人謀列炬大詫爭先投奇奇怪  
怪爛不收萬頃芙蓉翔鷺鷗百寶流蘇控玉鈎千絲纓絡懸  
燈毬琪花瑤草紛相摻石髓天漿旨且柔瓊瑋陸離眩人眸  
烟光繚繞紫雲浮髣髴洪崖拍浮丘驂駕白鹿與青牛鸞廻

鳳舞彈箜篌步虛歌來音韻適恍疑凌風到十洲俯看塵世  
如蜉蝣洞天深處水悠悠欲往從之道阻脩恨無太乙蓮葉  
舟四顧蕭然不可留卻尋歸路吟且謳此日眞成汗漫遊散  
髮箕踞倒玉甌劃然長嘯山鬼愁神仙本是英雄儔蓬萊清  
淺不盈杯齷齪富貴安足籌棄之於我如浮漚向平婚嫁幾  
時休松風萬壑來颼颼

雪津洞

僉事鄧原岳  
閩縣人

西南洞壑三十六名山往往隸仙籙雪津古洞稱最奇銀峯  
瑤島紛相屬洞門石乳斷復連盤拏綽約浮青烟玉笋停停  
作人立玲瓏詰曲皆中穿寬者若廣野窄者如斗門列炬照

之不測頂綠厓捫壁愁攀援初疑鬼斧鑿定匪人工作縹緲  
眞同麟鳳洲微茫宛在蓬萊閣灑灑溪流清且寒四時不漲  
亦不乾昏黑不知深幾許但聞中有蛟龍蟠編竹爲橋危可  
渡嵐翠淋漓濕如雨灘聲喧作萬壑雷水氣蒸爲九里霧平  
生眼境無此奇黔中碧雲差似之踞地大叫嘆殊絕摻羅歷  
覽眞忘疲乃知仙源去人亦不遠採藥尋眞亦非晚試繫漁  
舟溪水頭花開倘有胡麻飯

登天馬山

主事 葉 瑞 建水人

玉筍高標千仞起峻崢直向青天裏神工削出翠芙蓉羅列  
千峰皆巖旆山林深密飛霞寒薜蘿襄往出城端挾雨遙看

龍氣肅秋毫可數有鴻盤五雲高踞仙人掌飄飄欲作凌虛  
想青蓮句詔雁峰奇少陵西岳猶神往徒倚岡頭一振衣九  
煙之外弄晴暉巢許風高今已邈江湖廊廟思依依

煥山翫月歌

王景常

煥山山上秋月明煥山山下秋水清道人持盃待明月氣壓  
秦華吞滄溟姮娥靚粧倚碧井照見琉璃幾千頃興來吸盡  
金叵羅舞袖徘徊弄枝影

巖洞遊

郡人譚繼統

丹巖插天天路欽清溪穿地肺深海山空處非人林小有  
洞天白日陰鬼斧何年劈雲根劃然一柱撐洞門春鎖白波



翻晶瑩青霞紫氣蟠網縵美人邀我訪蓬瀛縹緲飛虹星渚  
橫踏沙穿石青鞋輕玄洲象罔捧珠迎麟幢螭駕鬪繽紛燭  
龍石火互憐憐銀界三千色相陳中天倒插玉璘珣真有芙  
容十二城藥宮貝闕勢崢嶸蛟室蜃樓疑削成蹲獅踞象走  
鼉鼈四時常滴簾雨新玉禾珠樹自彬彬奇恣怪態紛相親  
不信環中別有春天花散亂似流星空同掣電轟雷霆驚走  
排關虎豹醒忽聞廣樂張洞庭塵心不覺灑然清冷冷兩袖  
天風生狂來欲恣汗漫情乘槎竟到白瑤京中道俄逢太乙  
君手拄青藜向我云箇裏津津杳無垠玄之又玄那可聞一  
拳打破崑崙局大地山河總幼形我聆此語倏惺惺恍疑身

世在滄溟回首明霞已染巾  
玉芝瑤草拾來真洞口緋桃敢  
笑人臨流掃石坐雲茵  
細煮白石餐青精起向山頭騎鹿行  
憑巖試問山之英何日容顏一抹青  
此土惜在西南陲未得  
遊仙盡吐神爲我移置大江汾  
武陵鴈蕩何足論

臨安春社行

楊慎

臨安二月天氣暄滿城靚粧春服妍  
花簇旗亭錦圍巷佛遊人嬉車馬闐  
少年社火燃燈寺埒材角妙紛紛至  
公孫舞劍駭張筵宜僚弄丸驚楚市  
楊柳藏鴉白門晚梅梁栖燕紅樓  
遠青山白日感羈遊翠擘清樽詎消遣  
宛落風光似夢中故園兄弟復西東  
醉歌茗芋月中去請君莫唱思悲翁

夏水謠

楊慎

階簷下雨戴帽龍女嫁天公  
笑日反燒水淹竈巖洞青  
鼃樹上叫

卻金行

蕭崇業

中山宴罷贈兼金遠人不諒四知心  
義利分明難可昧敢信金多交始深  
金函開詔出殊方讎讎皇華衆所望  
薏苡還招犀玉謗黃金媿入陸生裝  
帝子憐嬌貯金屋我易好懷買書  
讀書中道義原自貴孰識豪富悲金谷  
白晝攫金亦何迷金甌絡馬遭傾覆  
燦爛金丸韓嫣侈婦賢且解遺金辱君  
不見燕王好客築金臺高士掉首去不  
回天生我才原有用散盡

千金還復來又不見鮑叔讓金交誼篤仲翁分金樂宗族不  
疑償金同舍子幼安鋤金如草木祖榮一錢猶爲多清獻琴  
鶴良自足趙軌飲水范甌塵羊續懸魚苗留犢余誠不能比  
德於諸子區區竊慕古人之芳躅

瀘江橋

郡人趙節

歸墟遠洩龍湖口襟帶响町東向走蚺埭虛懷受百川沙堤  
戟列千株柳阜安門外薰風阜歌館酒樓在樹杪人煙遙與  
水氣連迷離莫辨山城曉合郡無如此地佳黃鸝舌破春難  
老騷人斗酒佐雙柑愛聽枝頭談說好西通瘴國檳榔樹東  
是五金所出處輪蹄雜沓樸塵來到此徘徊不忍去河消十

里瀉銀沙河盈多觸老龍怒自古此間萬命關增修宜保苞  
桑固但願橋邊詩酒遊莫教阡陌操舟渡

古體

鵲警

曾旭

鵲鳴佞鴉鳴忠佞快心忠逆耳鵲剛戢羽人超候氣鴉未發  
聲人走掩耳異哉鍾不欲挺鼓不欲捶天以柱支地以鰲維  
凡以諫聖智以諍愚柱折天驚鰲馳地掩嗟我小子迺無其  
砥敢如岳峙

五言律

普庵寺

知州劉 儔

漠漠荒烟裏天緣剩普庵小林斜背郭曲室暗通壇花果留  
生計風烟幻正觀袈裟休便着一看始知難

曲江驛

開化丞姚文燮

舊縣栽歸驛殘衙借客輶材荒留古瓦廟冷鎮長橋夙火新  
畦蔗濃陰夾徑蕉只緣屯戍少天幸與漁樵

將至建水

姚文燮

近城山盡伏倦眼豁新秋暮紫明村火環青展郡樓稻香編  
棘護蒲影雜蓮稠十里紛來騎天涯續舊遊

寄東林寺

郡人馬之騮

久飲東林趣悠然寓此間心隨琴鶴遠身借水雲閒混俗非

同俗遊山不礙山虛空形影寂無生自無還

雲龍寺

郡人楊中原

鳥道入雲林亭臺坐碧岑苔封幽徑滑竹擁翠屏深菊圃含  
秋氣蘿軒澹夕陰此中山水韻料得少人尋

其二

絕頂青天近千峯一望收閒雲當戶入野鳥傍人幽嵐氣晴  
疑雨松聲夜帶秋僧房分半榻高枕聽泉流

南莊

郡人榮 淶

村釀留鄉味園蔬小摘寬塵非衝馬倦水遠幸鳧安前後青  
楓歇星辰碧落寒盡謗馳驛好不道僕夫難

雲龍山三元宮漫興

葉 涑

翠嶂湧彫楹，瑤宮入太清。  
山茱紛鶴唳，樹杪出經聲。  
學道殊相近，爲儒苦未成。  
頻遊非浪跡，泉石預相盟。

將臺

趙 節

巖磔流荒址，當時舊築臺。  
月寒茄吹蕭，風捲陣雲開。  
定遠軍麾集，南州羽扇來。  
升壇惟夙望，戡亂仗雄才。

其二

斷戟浮沙土，青燐出草萊。  
半撐廢塚北，全圯鶴泉隈。  
壁壘銷耕隴，烽煙洗宿霾。  
古人不可見，憑眺意悠哉。

遊雲龍山

郡人吳之銘



下馬尋山徑萬松擁寺青階前花色色檻外竹亭亭雨霽雲  
移岫談深月滿櫺禪房幽興發汲水試茶經

香林寺

一峯藏古寺地僻少人遊寶樹籠香閣天花散石樓白雲飛  
片片流水自悠悠何必逢僧話山光爲客留

行春

曾旭

我愛春行好石橋寒水澗桃天烘日麗柳弱倩烟籠蝟斗行  
行變魚兒隊隊同田家纔飯罷門外晚涼風  
我愛春行好花香散滿垆柴門開燕浦竹屋轉新屏鵝戲沒  
深碧馬斜窺遠青無妨樹影淡就此泛紅醺

我愛春行好芳茵印軟車書空松筆健擲地榆錢奢樵擋出  
山果牧養綴野花輕雲東過嶺虹飲一川霞  
我愛春行好環峯下晚嵐月虛汀草動雲臥石羊酣梨影浸  
沙路松香渡野龕隔津答守吏幽意不嗔貪

萬明寺

知縣

邢世瞻

建水人

寺古人來少臺高望月低晴開千畝綠平揖萬山齊曲磴通  
幽徑危欄掛彩霓村村砧杵動耳畔唱天鷄

禱黑龍潭歸次乾離仙洞

夏治源

旱魃將爲虐抒誠禱黑龍路紆經古洞泉響落高峯野竹風  
凌翠闌花日映穠神功如可濟盃水看雲從

七言律

曲江春

郭梧庭

十年宦海苦飄蓬  
天際觀風西又東  
王事駢駢淹四牧  
客懷日日見孤鴻  
江梅帶雨紅新岸  
路草知春綠舊叢  
收拾椒盤隨馬去  
誰家把酒醉仙翁

曲江元旦

莫把支離笑此身  
春光又是一番新  
江城鼓角隨風曉  
客邸屠蘇酌斗頻  
敢謂春萱盱菜子  
有懷蒼赤望王遵  
登樓漫道閒今古  
且喜東方日上賓

曲江元宵

金吾弛禁馬蹄駐風送茄聲八院饒日斷銀橋家萬里影搖  
朱戶燭叢燒王孫匝路分柑食甲士披星競斗刁強醉座來  
聽夜半誰傳羣醜遁今宵

曲江

沐昂

曲江新漲水痕收野色和煙古渡頭林外漸看來宿鳥沙邊  
還見浴輕鷗漁翁舉棹論歸舫旅客亭驂問去舟款乃一聲  
何處發夕陽芳草自悠悠

煥文山

判山高聳鬱嵯峨萬疊峯巒朗翠螺雨霽青猿啼木杪雲深  
蕭寺傍巖阿鈎簾每助詩懷壯拄笏應添逸興多覽結從知

仁者壽謾裁新句自吟哦

灑江

王景常

郡城北向古城南一脈靈源漾碧潭  
夜月澄波拖素練春風吹浪皺晴藍  
柳陰綽約高低合山色模糊遠近含  
卻意舊時濯纓處幾人嘯咏暫亭驂

煥山

郡人王來賢

名山繚繞向城東秀色蒼蒼聳碧空  
霧暗碧紗籠翡翠月明秋水漫芙蓉  
層崖有路何人到古樹無枝少鶴踪  
鎮日相看渾不厭丹青寫入畫圖中

桂香樓

韓宜可

文昌宮裏桂香樓傳是神君舊所遊幾樹穠華依月窟滿天  
清馥遍瀛洲碧窻日暖樓丹鳳金榜雲深護玉虬便欲焚香  
看桂籍姓名今復爲誰收

海門夕照

韓宜可

江寒鳧雁集汀沙半掩柴門夕照斜洞口烟嵐連野燒城頭  
鼓角雜寒笳猿聲長嘯林間月鴉背輕翻樹杪霞幾度扶筇  
翹首望青山隱隱隔天涯

白馬停驂

山連吳楚路東南誰駐銀鞍柳外驂白馬勢高吞日月蒼龍  
氣散作烟嵐似呼茆店人沽酒疑訪柴門女盍簪欲折花枝

相贈去海棠春睡雨初酣

螺峯白雲

突元峯巒出翠微白雲如練久相依未爲仙子裁春服堪與  
君王補袞衣風動卷舒還有態眼前聚散本無機一經眠抱  
山頭石何日從龍萬里飛

鳳亭花雨

幽亭小構近丹山花雨繽紛景漸殘一夢繁華春滿地五音  
節奏夜鳴鑾恍疑膏澤滋南畝空有金鈴繫曲欄自別武陵  
人去遠九苞文彩共誰看

洞口晴嵐

陰陰洞口小壺天嵐氣晴分紫氣巔日照佛頭排玉筍霞明  
仙掌捧金蓮江村漁舍春天樹茅匡人家日午烟指點帝京  
何處是九重金闕五雲邊

溫泉

天作方塘洗俗氛自然春意藹氤氳一泓地脉溶真火半夜  
神丁煑白雲靈竅暗通元氣窟溫濤輕泛浪花紋金池浴罷  
驪山冷卻笑當年萬乘君

煥文山

郡人郭鏞

巍巍重鎮對孤城一帶青屏畫不成絕頂尙存仙隱跡寒巖  
不斷鶴鳴聲烟消螺髻青猶濕雲斂蛾眉黛欲橫莫怪登臨



攜謝屐憑檻極目自心清

巖洞

方沆

古洞穹窿閱歲年  
褰蘿拄杖共夤緣  
穿崖流水疑無地  
削壁歸雲別有天  
崑窳虛看玄鶴舞  
微茫翻訝獨龍眠  
何人一曲清商起  
把酒臨風共欲仙

遊觀音寺

郡人王廷表

太平風物在南州  
鶴舞東郊與客遊  
氣象欲干青纒筆  
逍遙還聽白雲謳  
三乘古刹鳴仙鶴  
四照晴花繞石樓  
佳景正當頻結社  
明朝何處更凝眸

指林寺

敖和

城外青山秀插天城中佳寺景無邊  
寒潭雨歇蒼龍返幽谷雲深白鹿眠  
穿戶影重花外竹到池聲靜澗中泉  
老僧出定因無事坐看天花兩席前

香林寺

王來賢

邸邊蕭寺晝常靜野外閒僧夢不驚  
林鳥和鳴如誦偈曇花亂落似鋪英  
已將劫世溝中斷未了塵緣隴上耕  
守爾一能知自足從他萬物有誰撓

送友人結茆雲龍山

郡人楊應桂

卜築龍山第一峯雙峯晝日倩雲封  
初疑天竺三生石翻聽華陽萬壑松  
千嶂烟霞浮紫翠半空鷗鷺下芙蓉  
幾回欲喚

塵勞夢倚枕風來野寺鐘

北山華嚴寺

馬之騶

憶雲龍和前韻并縈刺史李公畫

釋行 鑑湖廣

東眺雲龍未得遊儼如太守筆端秋山光斷續烟生樹石逕  
縈迴翠逼樓長者停車松韻落老僧說偈鳥音休尋常不敢  
閒敲句盡在王維畫裏頭

狀元館

爲楊升庵建相傳今夏家亭是其舊址也

李春艷

諸陵烟雨變滄田太史祠堂尙在滇兩朝臣進三官號一路  
君恩萬里偏瘴嶺風霜留老戍錦城花月隔芳年北山多少  
麒麟塚盡傍先生臥閣邊

湖曉

鄒應揚

曙色空濛露未晞涼生水氣晨光微鳧鷗振翼出南浦鱗介  
相狎弄旭暉疊嶂腰嵐青未了平波面鏡翠欲飛漁翁初試  
輕舸去指點朝烟鼓棹歸

湖晚

斜照西歸影倒垂愁看暮雨一天低漁舟點點聚還散村火  
沉沉見復迷雲暗翻飛鴻嚮寂山高掩靄月明遲因思破浪  
乘風去擊楫中流唱晚時

湖雨

梵王宮倚北山開地僻人稀半是苔綠竹幾行森玉立遠峯

四面送青來雲寒石洞龍眠穩日暝松巢鶴未回清趣滿前  
因坐久灑然心地絕塵埃

朱竹

亦是涓川畝上枝卻緣殊色借胭脂清陰忽訝繁紅藉勁節  
難隨染絳移結實定爲丹鳳食騰空堪作赤龍騎多應血淚  
湘妃盡客賦梁園總未知

景賢祠

郡人張 繹

郡齋猶記列諸生小徑書臺南畔行舊屋改遷文廟路新祠  
重揭寄賢名二公餘韻叨聞久十載闕宮槐望輕徧覓遺文  
難盡得空瞻塑像獨含情

和韻

徐瀚

底事青蠅玉上三二公眞不愧南行山川有幸經題品忠義  
難通不著名去國可能忘寢食趨朝原不戀肥輕新祠更勒  
名公記喚起衣冠萬古情

和韻

濮宗達

久懷經濟在蒼生直道翻成戍遠行韓愈潮陽遺諫草蘇軾  
南海擅詩名人貧賸有經書富道重能將利祿輕獨瀉椒漿  
祠下拜黃鸝碧草不勝情

和韻

王嶽

自分公忠了此生天成豪傑在南行已看枯竹含生意還見

金甌覆姓名志薄寵榮窮困樂道隨用舍去留輕吾人遠徼  
知文學一畝祠堂未盡情

前題

何雄

二老同爲萬里行遐荒留得寄賢名人懷疏濬詩書澤祠寓  
尊崇道義情隔院杏花春雨潤閒亭竹影午風清儼然竝坐  
儒林處千載儀型我後生

臨安除夕

楊慎

去年除夕葉榆澤今年忽在臨安城斜看暮景飛騰意正念  
天涯流滯情寒梅判山我欲寄烟草瀘江誰喚生鄰牆兒女  
亦無睡歲火天燈喧五更

香林寺

知州劉 億

步入層雲日已斜沿溪曲折得僧家  
低迷路斷時穿水迴合  
峯開忽見花一線天中容淨土  
三生石上話恆沙  
行春太守多幽思  
愛聽鶡聲勝法華

東山龍泉寺

疎狂如許豈堪論  
紗帽場中別法門  
牛馬隨人呼輒應  
詩書由我自成尊  
寒冰兩眼千秋業  
絮位三年一代恩  
花鳥乘春供醉眼  
于今世事總昏昏

雲龍山舊寺

正月南方盡是春  
行邊小隊宰官身  
從他白雨敲油幕  
借爾



雄風上翠雲化國犬羊無量佛空山桃李可憐人晨鐘暮鼓  
臨安遠何用禪心重十分

挽劉僖死難

塗大恪

錦江洗濯玉冰姿早擬鴛鴦班立鳳池萬里薄遊今夢幻生平  
節義幾心知無家杜甫投荒日有恨賓王落髮時屏海雲龍  
歸去後忠魂應復繞峨眉

州守舒公國華

投老夷門感故恩思君暗復拭淚痕甘裳蔽後人誰翦蘭葢  
歲時羨獨存霜天應冷湘山骨夜雨難招楚客魂哀哀塞草  
連天沒怎向東橋奠一尊

戴祚字卜年丁亥死難

憐君善病復貪愁，脫穎文壇着意求。  
額點未隨龍子化，首邱惜伴兔羣遊。  
知我良朋今鮑叔，安貧佳士古黔婁。  
欲將斗酒招魂去，煥嶺雲橫雨變秋。

王非珩名所資丁亥死難

成虹劍氣躍平津，天妬英雄鬼忌人。  
八韻極工難乞巧，五車雖富不驅貧。  
青瑣忍見紅顏臥，白社愁看紫電淪。  
我欲直呼蒼老問，西山松倒石磷磷。

張孔昌死難

怕向荒城再一過，故人風韻逐頽波。  
文章節義寒烟滅，城郭

山河冷月多華表不來仙亦老桃源無去世如何子山此夜  
哀鄉國悵望蒼蒼發浩歌

王士興字敏修丁亥死難

君才軒翥彙思皇崑山俱焚倍可傷翰墨已知理宿草雲山  
何日掛垂廊青天不雨雲猶黑碧樹無風葉墜黃卜築江鄉  
空有約蓼花血淚點秋霜

鄒應文字君實丁亥死難

百年消息竟沉沉比湖潭幾倍深攜手青雲齊北斗分飛  
紫塞失南金鄒陽困殺談天日彌子寃含照四鄰諸阮歸來  
君不見高山誰與理瑤琴

憂宗璜字又黃丁亥死難

浚郊猶未下干旌不覺黃梁夢已成  
兩鳳一先悲斷影隻鸞仍復死  
吞聲傳家衣鉢終何寄博古文章竟不榮  
料得修文歸地下那無血奏爲時鳴

北山華嚴寺

劉信

十里松雲入北山野花啼鳥共僧閒  
浮生自古終成幻靈藥何人復駐顏  
流水聲隨鳥語去落花香襯馬蹄還  
九嶷卻憶巡遊後千古湘筠血淚斑

咏榆錢

郡人楊德培

不論貧家與富家堆堆積積總驕奢  
忽疑寶樹移中國更訝

几枝產異葩騷客不堪償酒債道人常用買烟霞阿姨可是  
眞豪俠不惜揮來委地

過雲龍準提閣

廖楚良

脫略紅塵坐翠微山桃爛熳趁春肥江頭掉月客來訪鹿苑  
封雲僧未歸藉草靜嫌溪聒耳入花晴亦雨沾衣采眞遲我  
十年約丹竈詩瓢願不違

侯家善白雲庵

王元翰 翰林

山空石磴足音無籟靜天空水自呼草蔓已封僧去處鳥聲  
旋避客來途塵心未淨鐘三杵秋色平分酒一壺起向嶺頭  
閒悵望白雲猶自挂蒼梧

詠雲龍雙松

郡人許申

風塵馳逐見雙松古幹稜稜欲化龍  
不借笙簧添鳥韻若煩蒼翠點晴峯  
參天不改長青色絕頂虛傳半夜鐘  
我亦歲寒能耐者與君聊且共窮冬

石壁泉聲

山石嶙峋轟萬重流泉到處聽淙淙  
懸崖人跨行雲渡曲徑樵尋鳥道逢  
樹匝迴巒藏睡鹿瀑飛隔崖響奔龍  
奇觀自是無今古烟火何年擬舊封

雲龍寺

馬晉

欲從天際瞰奇峯直上雲龍第一重  
陰地松撐紅日傘驚天

僧撞白雲鐘山禽窺戶禪初定木客吟詩興正濃三萬六千  
場裏夢何如此地話從容

萬明寺

劉世長

半日幽閒無處覓西來登眺意悠然捲簾碧水平鋪玉入坐  
青峯淡插烟僧伴花陰樓定席人從塵境得壺天當時興廢  
聊供酒莫待瀟江暮色連

登東樓

姚士珪 江南

巍巍畫棟逼重霄時有仙人弄玉簫四面好山青到郭千村  
深樹綠過橋胡牀月較南樓早斗柄星瞻北極遙刺史丹青  
雲外見豈容王粲賦蕭蕭

侯家箐石壁泉聲

張之松

浙江

南來咤入鏡湖陰夾道崇巖爽氣生勒馬應懷題柱意  
溪上有橋  
停鞭且聽壯流聲眠雲百折蛟龍起穿石千尋虎豹奔何用  
探奇追往蹟松風明月可行人

察院署中

巡按張泰

憲節巡行歲欲闌觀風今日到臨安萬山城郭威蠻部幾隊  
旌旗擁漢官充國屯田榆塞靖亞夫軍令柳營寒分明天作  
華彝限少隔蓮花淺水灘

演武場城外西北角

副使王忠

按部南來春已闌烽烟消盡遠人安承平不縱披堅卒閱實



仍勞執法官日麗江山旗影動霜飛牙纛  
光寒戰酣散作之元去目送可亦九曲灘

兵備道署

曲檻穿堂西署西宦情山意兩相宜雲來斷岫雨將至花落  
閒階人未知苦志敢忘吾汲汲公餘翻愛日遲遲偶然隨處  
開襟抱一酌清泉一賦詩

前題

僉事邵煉

隱隱疎鐘隔晚林一簾清景可人心鳥聲寂寂將依樹苔蘚  
青青欲上襟退食看花忙裏逸倦眠敲句靜中吟相思鄉國  
經年別惆悵斜陽落碧琴

曲江驛

僉事劉福

杏花開徧又桃花南國風光自一家  
虛室夜深喧蟋蟀溫泉水沸裊烟霞  
松杉盈野都城畫蚪蚪緣溪欲變蛙  
物異不堪人亦異等閒戈戟恕相加

萊玉峯

郡人曾倬

往歲尋幽到由阿青山一壁甚嵯峨  
人聆古洞馱清磬出望蒼天浸碧波  
好弄漁舟翻白浪不愁危石掛烟蘿  
巖棲野寄眞吾事彈指輕輕百歲過

寶秀蓮臺

郡人曾倬

山靈與我久相期責我來遲竟拙辭  
撫掌吟風猿嘯嶺擡頭

翫月鵲喧枝喜翻素卷開新匣笑汲天漿煮玉芝一點塵埃  
無着處雲封門外水流池

兩宿雲龍準提閣

程 封江夏

野鶴孤糜妬良遊一夕風雷古寺秋曉氣漸穿峯頂樹陰雲  
全覆石邊樓竹筒引水僧初出禪室敲棋客未休最是泉聲  
流不歇嘈嘈絲竹虎溪頭

前題

知州李 灝

爲愛林泉此共遊雲龍高聳半天秋譚經法雨三千界欹枕  
瑤臺十二樓靜裏時聞溪有舌夜深不詩話無休明朝更約  
登峯頂詩料還應在上頭

前題

郡人劉 彪

點點青峯過客遊到來風雨正新秋  
深林落葉排香徑疎竹  
寒花護石樓逸韻偶從清磬得  
閒心欲傍白雲休禪房一夕  
空山靜獨有溪聲屋角頭

前題

熊正鼎

山靈有約任君遊况直黃花滿目  
秋風雨半天寒擁樹崖溪  
幾處暗吞樓筇隨古徑雲窩滑  
梵響瑤宮客慮林自是塵心  
偏愛逸晚吟松下好科頭

前題

許 申

策馬披山紀勝遊蕭蕭原野盡深秋  
閒身直上孤峯頂青眼

時登百尺樓，雨色侵人天。  
欲暮磬聲驚夢客，難休塵勞暫借。  
上方寂臥聽松風，枕石頭。

前題

楊中原

蒼巖白石快同遊，一雨攜來萬壑秋。  
烟靄上方迷寶樹，雲橫紺殿聳層樓。  
好山何處尋支遁，佳句從前憶惠休。  
爲愛泉聲瀉碧落，不辭崎路到溪頭。

前題

黃世憲

拚向山中學臥遊，何妨蕭瑟動高秋。  
偷閒暫作雲龍客，了悟時登花雨樓。  
嶺帶寒光青到頂，風呼落葉靜都休。  
尋常村酒聊供醉，共聽松聲響樹頭。

前題

劉世長

二十餘年始再遊鳥啼深樹幾經秋撥開雲脚逢僧笠度盡  
松陰上佛樓門掩溪聲寥寂鐘敲人靜意休休山靈一夜  
催詩急時把空門寄筆頭

前題

劉三思 江南

曳屐尋山汗漫遊長空幾字雁橫秋高峯霧鎖雲堆樹峭壁  
松開客上樓抱膝挑燈情不厭飛觴說劍倦忘休興闌忽作  
非非想夜靜泉聲到枕頭

湖上堆雲雲潑墨羣峯塗抹失南北萬斛倒瀉水難量千頃  
迸開天不測似爾荷鋤卜有收阿誰舉網愁無得須臾又見

日中升大地山河重起色

湖霽

積陰一掃雨初晴水不揚波萬頃平洗出湖山眞面目放開  
雲物倍精神鏡光斜照魚龍舞練影長拖藻荇橫抖挾笠簑  
重整釣海天雲影共崢嶸

臨安懷古

提學吳自肅

煥文積翠傍樓開倚檻能令客思哀衰草離離侵義塚寒烟  
漠漠讀書臺烏麼地自元和闢建水名從苴剌來誰作當年  
三洞記臨風飛越幾徘徊

臨安懷古次吳克庵學使韻

丁燁

响叮舊國枕山開縱目憑高客思哀瘴草碧侵羣節墓野花  
紅暗撫蠻臺五邦地控交岡險三洞泉通瀘水來邊徼從前  
多謫宦景賢祠下幾徘徊

雲龍山眞武宮登閣

亂峯環抱氣氤氳飛閣憑虛最出羣鳥道松杉千歲老鶴壇  
鐘磬半空聞被襟涼愛南薰爽晞髮情看北戶雲

日南有北戶縣

便

擬抽簪從帝子驂虬同謁玉宸君

宿曲江

楊慎

曲江驛裏無燈燭殘月斜明覺夜深梁苑薄遊成滯迹并州  
客舍有歸音連營吹角鳴鳴起叩鼓持更統統沉三十從軍



今六十何時西隱蜀山岑

巖洞

提舉

何

惠

石屏人

萬壑逶迤天際來歸墟近在白雲隈  
波通漲海暗吹霧谷轉盤渦盡起雷  
珠窟夜光搖砥柱石幢寒影護仙臺  
風湍咫尺煙霞隔悵望碧桃花自開

秋夜宿樓上

寒巖高處宿深秋悵望遙空動客愁  
啼鳥按更山月缺殘燈映榻野螢流  
浮沉陸海雙蓬鬢咫尺銀河一釣舟  
便欲褰裳謝朋輩似聞笙鶴白雲頭

侯家筍白雲庵

王元翰

山空石磴足音無  
籟靜天空水自呼  
草蔓已封僧去處  
鳥聲旋避客來途  
塵心未淨鐘三杵  
秋色平分酒一壺  
起向嶺頭閒悵望  
白雲猶自挂蒼梧

國朝

日月合璧五星連珠賦

有序

臣鄂爾泰

雍正三年二月庚午司天氏奏稱日月合璧以同明五星連珠而共貫宿躔營室之次位當娠訾之宮爲從來未有之瑞諸王大臣請陞殿慶賀

上辭弗許惟念臨御二載遽覩此嘉祥皆由

聖祖仁皇帝所致爰遣各官祭告

景陵并付史館頒示中外與臣民共慶之臣乃聞而稽首颺言爲序其事曰日月五星者天之光華也人君德動天鑒則日月五星各効其靈傳曰至德之明日月若連璧

又曰至德之萌五星若貫珠五星所聚有德受慶四海  
昭理中外安寧子孫蕃昌此其占也而營室之宿其位  
在亥主乎宮廟星明則昌姬訾者則日月所會之辰在  
亥曰姬訾爾雅所謂姬訾之口營室東璧是也攷其分  
野則司馬遷以爲在冀并之域班固以爲在燕代之間  
今我

皇上聖德光輝瑞應所徵上之格乎

祖宗宮廟之地而下之周乎畿輔遠近之區臣謹博稽典籍  
凡經史所載以逮諸子百家天文讖緯之書衆矣其言  
歷代五星之瑞者蓋詳至若合璧連珠同聚一方雖知

其爲非常之應而三皇旣邈後世無聞惟宋書有之曰  
帝堯在位七十載景星若翼日月若合璧五星如連珠  
乃歸功於舜由此觀之豈非以二帝相繼光華所萃若  
合若連與天地同符之明驗哉顧其事不見於虞書而  
紀於二千餘年之後此必得之孔子刪書之餘信而可  
徵然後載之正史豈諸家雜說比乎我

皇上以聖繼聖正如舜之紹堯此重華復旦在見今茲矣  
聖祖仁皇帝在位六十餘年卽帝堯之七十載也我

皇上御極以來於今三載正舜之格於文祖之日也

聖祖仁皇帝神聖文武廣運無方成功文章巍煥已極是千

古以來又一堯也我

皇上明目達聰庶績咸凝光天之下及於海隅是千古以來又一舜也是以太和之氣上應天心而徵乎天象豈偶然者哉夫自古帝王雖明君賢主凡於祈祥符瑞之事苟獲一器一物如白麟寶鼎神雀五鳳甘露黃龍之屬方且登太山禪梁父大赦改元賜爵紀勳甚至作書以示瑞矧夫日月五星之光昭昭離離爲四海九州之所同照而共仰者乎我

皇上乃恬澹無爲謙謙弗居皆以功德上之

聖祖仁皇帝而已不與豈不巍巍乎大哉臣於是伏而思之

德動天鑒至誠也頌揚先烈至孝也

景陵告祥至敬也宣示史館至信也敷錫臣民至仁也慶賞不行至謙也登封不事至明也不矜不伐修德不怠至健也卽此一舉我

皇上深沉之德其足比美於舜者固已至矣况乎萬幾之勅其所以承天命而永天休者又將奚極也爲臣子者幸生堯舜之世得以依日月之光華觀星辰之爛漫其何以孜孜贊贊黼黻休明以覆冒於照臨之中也哉不揆膚陋敬援筆而爲之賦云

龍飛御極之三載鳳歷司春之初吉

二月朔爲初吉

用告瑞於今

宵遂呈休於翼日夜未半而鶉火之象方昭天將旦而  
姬訾之光忽霽

聖德上躡乎紫霄嘉祥畢聚於營室三曜同明而共麗宛  
如合璧之雙懸五緯共貫以偕躋儼似連珠之竝縶遡  
自三皇肇闢七政煥發雖符瑞之多端欲徵信而咸闕  
逮及顓頊之時爰有歷宗可核亦僅紀異於五星未聞  
効靈於日月稽諸正史惟一見於堯舜之迭興譜其休  
祥又豈獨爲漢唐之莫越若夫五星之瑞歷代先合或  
并婁之次同躔或奎璧之垣共踏上自殷周而徵驗多  
淆下迄宋元而傳聞亦雜欲如珠璧之共玄曾不能彷彿



佛其二三但若星宿之薦禧何難宗數其甘州爾乃

帝德誕敷

王心無斃紹

世祖之不基纘

仁皇之懿迹大業更美於

先朝鴻麻增光於在昔播膏澤於荒陬洋湛恩於遐僻無一

夫之顛連登九有於衽席思

王度而式玉式金規

聖學而如圭如璧比欽明於唐代洵莫測其高深擬精一

於虞廷無由窺其罅隙於是超帝邁王登三成五至德

協乎天心仁風翔乎下土瑞靄盎溢於層霄光輝照徹  
於寰宇金烏玉兔感二氣之華而同升太歲長庚率五  
行之精而駢聚見夫璇璣告吉儀象呈靈天樞啓其鑰  
清都闢其扃開祥光於閭闔觀瑞色於蒼冥九闕顯其  
昭灼萬彙仰其晶熒非僅兩可重輪之異遠勝三台五  
老之星映於萬川如珪璋之可握燭乎四岳似球琳之  
作屏誠以誠能感神德可動天以氤以氲非霧非煙萃  
光華於二五現氣象之萬千或離離而竝照或纍纍而  
如連挹其澄鮮溥天爲之加麗瞻彼璀璨大地於以生  
妍於戲非甚盛德曷至嘉符中天而外亘古所無方之

勳華而寧讓號曰雍熙而非誣賡颺莫罄其形容衢謠  
難喻其歡呼求諸千聖百玉而罕儔誰能媿美其巍煥  
垂之億齡萬禩而彌耀得上續夫典謨

系一ノ二ノ三

資料館  
PDG

建水州志卷之十三

新增藝文

北義倉碑記

知州祝宏

皇上御極初 詔天下郡邑各置社倉悉遵朱子舊有司奉行弗怠建水州先設有義倉每於東林寺散賑予蒞任始紳士卽以監賑請詢得所由往見老幼紛如各受所與以去竊羨此邦盛事誠足上佐朝廷愛養之仁而得朱子社倉之遺意也自是每冬夏輒一出郭監視以爲常今庚戌春郡紳捷公沈君等復以北義倉請記於予予曰義一而已何東與北之分乎沈君曰臨舊有義倉

五所前明鄉先達所置各貯田租備賑貧乏因丁亥兵燹田藉湮沒無查今在東關燃燈寺者賴故紳劉公請復於前牧李公餘田無考後於古壁得斷碑載有北義倉名而其事久廢今與鄒君龍門同其弟之松因里中舊積公田數畝各量捐已資倣前輩遺意更得同志轉相勸助合爲置田若干畝建倉於普庵堂歲儲田租亦冬夏二季出以賑散里中之衣食不給並婚喪難舉者已三載於茲矣雖爲惠弗廣願邀一言俾後有作者踵而擴行之余曰此仁人長者之行余固樂得而道之蓋士君子學古乘時靡不欲功施當世澤被羣生况鄰里

鄉黨之人爲我父老子弟其視斯世斯民不尤親且切  
耶有志者皆存此意以神明朱子社倉廣

皇上如天之仁豈不偉然盛事哉願與諸君共勉焉

漏澤園碑記

知府來謙鳴

余以激守兼篆臨陽於茲二載有關於民生利弊靡不悉心  
興革邇因疏通溝洫巡行沙河見河岸有隙地一區廣二十  
餘畝荒蕪不治余詢之紳士父老僉曰此漏澤園也臨郡名  
此園者有二一在北山寺左今現存一在北廠沙河岸卽此  
地也前明官紳捐資置此以給窮民埋葬立有碑記迄今纍  
纍數百塚歷二百年矣康熙癸巳歲郡遭大水沙泥泛漲塚

歷湮沒碑亦無存此時尙有高塚可稽文獻可考由斯以往倘河日擴沙日淤所云漏澤園者必致滄桑盡變獨非仁人義士之所悲乎余聞而傷之因念掩骼埋胔亦郡守之責會同新守李公州牧夏公各捐清俸培其塚土清其界址立碑以垂永久

紅衣女墓記

舉人楊德沛

紅衣女者不知爲誰氏女也前流寇陷城時同女奴投井事載在舊志聞長老云王福江陵人竄臨多年嘗與人言紅衣女事詢之則云井在倒城處楊家園內同往偵之福亦不能確識其處先是流寇逼臨用地雷攻城楊家園隔地垣僅數



武城破井圍爲壙以故迷失乾隆庚申居人林生在城壕左收石於土見一迷井偕衆掘之入土數尺得一鉢子蓋丁亥地雷物也又下二尺餘得枯骨一叢取出原泉條湧報官驗則一女骨又一小女骨儼然紅衣女與女奴無異可異者紅衣女之入井在五月二十二日出井亦在五月二十二日又聞此地夜中時有火光視之不見骨出後火光遂絕此其爲紅衣女之迷井無疑矣刺史夏具棺收骨葬於丁亥義塚之側以時從祀余考之志乘叅之舊聞證之時事集同人勒石以告來者

### 重修泮池臺亭記

副憲傅爲訢 郡人

吾臨名郡也學宮剏自元而明因之泮池則天順初郡守周公瑛始鑿之寬大二十餘畝下甃以石上乘以橋引泉水注之文瀾漾碧陰晴異狀復有煥山倒影其中雲烟動盪不定至萬歷莫郡守林公裕賜建釣鰲亭於波心今其基尙存我朝加意學校學宮時加修飭獨泮池之制不復舊矣左右居人日侵月削長猶是也而寬廣不足余每過此太息久之竊謂舊制不可卒復而唇短池長非制也兩學博士楊君元亨王君長春宗姪朝勳慨然有擴脩之舉商於余余曰素志也力贊成之並延吾鄉士大夫議之詢謀僉同無有齟齬於是鳩工庀材砌石實土不半載而臺成擴長計四丈許楊君邀

余觀之雖不及昔日周公林公之盛然已壯闊可觀矣是役之費得香火租錢一百八千有零紳士捐八十二千有零經始於乾隆十六年十一月落成於次年三月總理者學正楊君元亨監工者貢廩生田懋賢仇錫齡謝瓊郭寬鄔進之王臨高炳王繼何爲梁邵燾鄔騰霄周廷璐章嘉勳牟邦傑屬余爲記嗟乎泮池古制也修臺屨盛舉也士大夫登其臺者觀瀾之際其亦有復古之思乎清侵占完舊規以俟後有力之君子因記

遊雲津洞記

傅爲許

雲津洞者巖溪三洞之一也三洞皆奇而雲津洞尤奇憶康

熙癸巳年郡守王公往遊予從焉時隆冬水涸褰裳可渡遇潭深路絕則厲以浮橋長官前從者後入幽竇窮廼溪束火照耀若忘其爲洞中者爆聲喧震若雷霆入愈深景愈奇有屏有窓有堂室名曰雨花天宇下石如諸佛及異獸狀旁有石田其下泉聲激越如鳴環珮奏管絃此三十年前耳目之而心異者予宦京十載旋里後欲再往而莫由乾隆壬戌春二月吾友陳鏡菴嶠峨令辜公商於予予曰此素志也遂剋期携酒饌緣瀘溪東去二十餘里抵鄂公祠少焉二客亦至携杖攀援而登盤旋而上不里許而雲津洞呀焉則見泓渟澎湃波浪蹴空洞猶是而水實之矣或倚石立或席地坐徘徊

徊洞口杳冥恍惚穆然以靜悠然以虛若有會於心者分韻賦詩引觴滿酌頽然就醉予一一爲言洞中奇勝客曰某等神遊於耳矣南一里有萬象洞客請往觀予曰日西風獵獵不可久留姑俟之異日

整飭建水鄉會試田記

知府 張玉樹  
陝西人

余始至臨安則聞此邦士耆多敦本嗜義之爲而建水鄉會試田爲尤善有育才錫類之遺意焉稽其肇事之始以郡城良方巖洞依形家言議建石塔培土風以工鉅費細而未成也邑先達薛篋山刺史檢用存七十餘金與同志諸君子運籌積羨至乾隆甲申歲已得千五百金亦綦勤

矣其時祁莘民張樹亭兩刺史復議以謂塔之成非萬金不可豈且暮能致吾邑繼起英髦三年賓興與公車都下者每以力絀裏足曷量籌資助壯厥行色以翼甲第聯翩之盛乎於是購田科租慎擇司事併心壹志日增月廓此建水鄉會之田所以稱盛也昔范文正公置常稔之田畝畝贍濟族人擇屬之長而賢者主其計而時其出納仕而居官者能莫給蓋有深意焉今建水鄉會試田贍及闔邑之士而特於應舉待仕者潤膏秣而導之先路所賴諸君子之長而賢者司其計而出納之有道則凡積學以待用者孰不鼓舞奮興以應

國家楨幹之選乎今年春余偶諮詢其事因知前輩之長而賢者次第凋謝原置田租數爲佃氓乾沒存者租九十石僅足原數之半前輩美意良法漸至陵夷衰微爲可惜也余乃設格令稍爲別釐哀積俾復舊額囑此日之賢而次長者若而人疊主其計而別爲糾檢稽核之法條如左庶幾試田可以永存而益擴而譽髦斯世濟濟

皇路者且目見其增盛也歟時

乾隆五十七年壬子五月中澣

條規附

計開

一原存田租及本年添購田租各數目坐落村庄並各佃戶姓名每年各完糧若干均應挨順年月逐條詳細開在冊內其新舊文契簿籍亦應查明數目於冊內登記以便稽查不得遺漏舛錯

一每年收穫租穀若干完糧及雜支若干應令司事六人於每年正月齊集公所會同核算做照薛箕山原式分別管收除在挨年開載冊內另立出入流水草冊隨時登記免致遺漏以便於正月會同核算

一每年正月公同結賬之後現存羨餘如有成數卽公議添置租石不可延擱



一每遇鄉會試年酌量核計見存租銀多少及應試人數  
公同商定每人資斧數目不許動本於致送之後聲明  
年分科分數目登記總冊不可遺錯

一司事六人應以三年爲滿另議六人接辦此三年內每  
年各以二人輪司催收賬目倘遇贖買出納有宜公商  
者仍應六人會同商定不得以一二人專主

一前此司事之人每有親友借貸通融逋欠累累司事者  
礙於情面易致敗乃公事嗣後禁絕借貸通融違者稟  
官示罰隱默同咎

一鄉會田資助寒畯係闔邑義舉除應納正賦外一切雜

系...  
項如採買運糧派夫派馬之事概行免辦以示優崇

一鄉會試田向未資助武科推原其故緣就武科者多屬  
有力之戶應仍遵守成規無庸開端濫給以上八條惟  
司事諸君子同心實力遵行勿替共勳盛舉

### 修同緣橋碑記

黃鶴鳴

吾滇在天南萬里崇崗巖業激澗滌紆而臨安舊以沃壤名  
卽唐之烏麼蠻地元始拓而州焉城南之水曰瀘江滙衆流  
入巖洞北則有南庄馬家冲諸水歷八十餘里至宗所折入  
瀘江地當孔道非橋不濟舊架以木夏秋霖雨怒發萬壑爭  
趨奔騰澎湃水不能支時與波俱逝鄉之父老戚焉曰固不

敵石之牢且永願其費不貲爰乃盟心協力庀材鳩工累千金而不日告成噫嘻可以爲難矣父老曰猶未也由橋而南有周行焉乘者徒者負者戴者牛馬走者肩相摩趾相錯也塹确泥淖苦之久矣橋成而路不修緣雖善如未完何如砌以石平如砥量其費略與橋相當衆益勸不數月而復平我國家承平百年雖古所棄爲蠻陬荒徼如吾土之遠者而風氣蒸蒸不教而勸則觀於鄉而更知王化之隆無遠弗屆已余不佞少長鄉曲某水某邱釣遊歷歷父老之所苦者咸知苦之父老之所舉者亦願舉之願屢膺民牧常懼不克宣士德意而獨樂聞吾鄉父老之所爲故不敢以不文辭倘曰

是役也吾之素志且與有勞焉是伐人之功以自封也夫豈吾鄉長厚之風哉時州侯夏君治源先率作之而董其成者則封翁傅公大美也是爲記

讀禮略言

傅爲許

后本曰喪吾聞諸縣子曰夫喪不可不深長思也孔子曰三年之喪吾從其至者樂正子之母死五日而不食曰吾悔之自吾母而不得吾情吾惡乎用吾情有味哉是言也夫喪有本有末本者衣衾棺槨殯葬不寢內室不飲酒食肉哭泣之哀是也末者斬衰苴經杖屨帶營履之屬明器雲鬋功布方相之類以及款賓贈答是也今人居喪與古人絕異輕本重

未實有積習難返之勢或延僧道薦五七奏管樂娛死魂甚至借親喪以弋利記曰君子不家於喪其謂之何季康子之母死般請以機封公肩假曰以其母以嘗巧則病者乎今以其母以射利則忍者乎許不幸遭太公人變故不敢詭隨以悅時人耳目禮意所及則勉焉懼其未逮禮意所不及則缺焉以待質於有道君子謹就末俗所尚與家禮所載妄議之而妄襄之喪事之始也病革則遷居正寢換新衣既絕乃哭復主人易服不食備含襲殯殮之具遷尸沐浴襲於床飯含遂奠馮尸哭擗踊無數小斂大斂以至入棺務急詳審精密此爲送死當大事實際於焉馮哭盡哀成服制訃告於親戚

僚友設魂帛靈坐靈床布帳銘旌等器朝夕哭奠主人以下各歸喪次孝子始食粥哭無時此大段不可缺者至於佛事喪家稱爲薦拔明禮者知而不用溺俗者用而不知司馬溫公天堂地獄之辨甚悉許不忍以有罪待親一切禁絕喪事之終也禮三月而葬國子臯曰葬者藏也欲人之弗得見也厥既得卜則經營先期治事有相喪助喪之分有購奠錢帛之儀有賓客飲食之費有奉柩朝祖之文朱子喪禮一書會萃三禮精要可考而知可尊而行也不知禮者無論矣士大夫家鮮克由禮敝化奢靡有紀極所謂衾殮棺窆等事或苟且塞責專意外飾虛文甚而內寢飲酒食肉如故嗟嗟喪

禮衰戚之至也君子念始之者竟如是哉當其受弔也笙簫  
鼓樂喧填震盪不論有服無服弔者徧給以孝贈答禮物惟  
恐不豐每日肆筵設席多至五六百棹或二三百棹或百十  
棹至少亦數十棹所爲有肉如山有酒如河敗家破產曾不  
顧恤而賓中飲食之徒醉影翩翩呼笑戲謔主人借此以娛  
賓賓亦借此以恣醉飽相習成風恬不爲怪或有知禮者微  
議其非則羣然而駭排之攻之怒之詈之今日風俗之壞一  
至於此詩質慙學薄不諧於俗久矣苦次讀禮未敢顯悖聖  
經賢傳從委巷之陋習夫散孝者爲有服之親也無服給孝  
是以不祥之物加人也今擬孝給有服其餘則止按禮弔之


日不飲酒食肉况飲食於所弔之家乎朱子所定呂氏鄉約云凡喪主不可具酒肉以待賓客弔客亦不可受又曰喪葬之時只當以素食待客今擬謝奠儀亦不設席待弔至於陪送之賓與遠來之親友半葷半素止於五簋不敢戾古不敢違今亦未免遷就之思至於酒則禁絕不設程子居喪客有索酒者明道曰某不敢以非禮自處亦不敢陷人於非禮客赧然而退若當事吊客不在此論鼓樂者吉禮也按禮喪終無奏樂之儀但積習已久今擬喪堂則禁止樂音惟大門外用鼓吹一副迎賓之意以委曲從俗然究非心所安發引前一日因朝奠以遷柩告遂奉柩朝祖禮之正也然或轉動維



艱迫於狹隘今擬奉魂帛代柩亦禮之變而不戾者題主一事乃葬後之禮爲其既葬則神無所依而憑於主也今人於發引先期行之似覺無礙吾從衆左傳云公孫夏命其徒歌虞殯虞殯者送葬歌也今人用童子喪側歌哀哀父母之章亦卽此意雖家禮不載然音韻擢搶以之助哀思其亦可也考古人葬法必擇地而卜筮以決之乘生氣以安祖考之遺體蓋父祖子孫一氣貫注彼安則此安彼危則此危理有固然朱子與蔡季通預卜葬穴門人裹糗行紼六日始至蓋其慎也若貧富貴賤天定之矣今借塚中枯骨求子孫富貴豈上天之命反制於一坏之土乎合葬雖非古禮然詩曰穀則

異室死則同穴孔子曾合葬於防焉季武子曰周公蓋祔訖先君子葬寶山三十年矣今擬合葬以取同穴之意况母之遺命其故違乎卒哭而祔周禮也程子曰卒哭猶存朝夕哭無主在寢哭於何處須三年而祔訖則從程子之說至送主入祠堂始飲酒食肉復寢此天性人心之所不忍先儒謂爲人禽關頭之分界不可不謹也禮曰喪具稱家之有無又曰疾病必有草木肉食之滋焉又曰五十不成喪在人自量其力不危其身自盡其心而已至虞禘奠祭儀文及殮葬節目有家禮可稽不能備詳嗚呼無父何怙無母何依追思送終之慘莫甚於彌留屬纊之際飯含殮殯之時然猶得摩其手

足聽其喘息觀其面目而呼天搶地也至襲而含而殮而冒而殯面目又不可得見矣然柩在中堂寢食其側朝夕哭奠猶可撫棺而痛號也既葬矣卽欲寢側哭奠撫棺而擗踊一痛終不可得矣雖曰入門如見上堂入室如見究竟何所見乎此人子之所以終身悲愴而難已歟此王裒之所以讀蓼莪而不勝其哀歟



新刊 婦學  
PDG

募修臨安府

知府張鳳孫華亭

文廟引

臨部本多才之地郡庠尤毓秀之區學海淳泓時有珠光  
劍氣文山聳峙每看霞蔚雲蒸顧

廟堂之輪奐非復昔時歷代之創修亦有年所棖題在望不  
無風雨之飄搖馨鼓方興實藉衣冠之響應本府適蒞此  
土樂觀厥成瞻棟宇而徬徨進師生而咨度咸謂役夫千  
指經費不敷府縣兩庠捐輸難繼必廣募乎通郡庶克濟  
夫鉅工用是身爲之倡徧告所屬賢牧令政先學校宜有  
同心士大夫蔭托粉榆定能合志卽在力田逢年之子服

賈致腴之家孰非沐

聖澤之涵濡慕儒風之彬雅各隨願力共效仔肩期

集腋於千狐無功虧於一篑將見

官墻振采增南天金碧之輝芹藻流香比東魯絃歌之盛矣

義倉冊子序

傅爲訖

吾觀於鄉而歎事之可爲而不可爲也其可爲奈何羅念菴曰在一國必有益一國在一鄉必有益一鄉其不可爲奈何子朱子曰纔認真便有許多礙處其可爲而不可爲奈何今之義倉也其爲義倉奈何義倉創於明當時薦紳先生輩捐置以備吾臨荒凶而濟孤寡者甚盛舉也後值寇變義田遂廢國初劉煥山先生謀州牧李公疆理之亡者復存厥功鉅矣其經理出入錢糧倉房田畝坐落源流以及散米鹽多寡之數俱載碑記冊籍百年來諸先輩接踵經營或捐產或以費餘置田久足追配前賢然積久弊生有心者慨焉予謝簪

歸里素不問戶外事去冬孝廉龍起潛詣予曰事急矣請救  
正於先生不獲辭延吳靜能段元長田恭菴仇謹仲諸君分  
理其事予贊襄其間而數君協恭同力剔弊釐私節費約己  
人獲實惠斯亦勞矣然弊由此絕怨由此生無告者感不便  
者謗故曰可爲而不可爲也書云不虐無告不廢困窮朱子  
曰君子爲政且要主張這等人吾旣不能捐以濟人固已  
心愧坐觀焉若越人視秦人之肥瘠則天地之心病而人性  
絕用是自懼記散米時有窮生支一米帖夜夢神人欲鞭之  
且曰 技堪自活奈何奪一窮人分乎次窮生袖帖還自言  
其故夫一帖斗粟耳塊鹽耳又多乎哉而神猶察之惜之怒



之戒之則夫十之百之千之者不知神察之惜之怒之戒之否也吾臨多君子聞窮生夢中神語其亦憬然矣乎所謂知其不可爲而爲之者予與諸君共勉之矣乎元長屬文弁册首因序

見龍橋記

由臨安治而沿瀘江以遡上游舊有跨黃龍之渠而爲永安橋者前明成化時之所建也歷經歲年漸就傾圮行旅望洋而嘆居民緣岸而咨功用浩繁瞿瞿乎無能爲役也屢矣洎乎乾隆乙酉郡人圖壘石而新之而善士張翁勳臣首出白鏹五百爲之倡其時勇於從義如唐若梁葉春生者皆相率

以應顧惟河形寬衍慮比材之鉅以艱也因少徙於舊址之下流創某構造則又以堤虛岸削耗所蓄租日月侵尋具功不究詔舞者張翁之仲子也顧瞻崖畔於心怛怛乃糾約同人敬恢前緒而而衆亦感而競勸欣助以貲於是鳩工於甲寅之春以乙卯之三月竣事論其協力而既底於成則一年之工作也論其繩承而有基弗棄則三十年之經營也顧予竊於茲有感焉建石普元要衝斯在賭乎此者惻然念行人之病涉而輸囊集衆懋建崇功殆於克廣德心無愧仁人之博愛者耶而其不忘前人未逮之志以期要之於有終所由激發於孝子之思者愈益有足尙矣嗚呼一橋之成而仁人

孝子之行備匹夫爲善競於士大夫是以足以助教道之流而裨益於人心者甚鉅書以示勸守土者之所欣也至於更其名而曰見龍者以龍潭之水瞻之在前云爾必曲爲之說則鑿矣

建水張氏歲科試田碑記

郡守江

建治介在南服人文稱盛不異於中州論者謂光岳之靈磅礴鬱積而魁奇材德之士多挺生其間也顧竊嘗指事求之其咸能勉力向學交相鼓舞以至於成者則諸君子風勸培養之勤其功不爲細予昔初蒞臨安延問建邑紳耆知有所謂鄉會試田者每嘆此邦人才輩出爭自濯磨宜不藉是區

區然後興起而諸君子猶且偕率同志引掖股拳法甚良而誼甚美矣凡百寒峻寧不益感而競奮蒸蒸騰躍

昌時哉張生沛者亦向之經理鄉會試田者也一日復舉其父翁起祚之義事來諭於予曰方生父之逮存也念建水文生凡遇歲科之試備卷填冊其費用當亦有自取給焉曾陸續捐置租田積累以至今日通計三年穀石之入足供兩試卷冊之需業於上屆酌定規條無論新舊諸生概爲資送顧生父則既歿矣懼其久而不可爲常也敢丐一言勸之石予聞之而欣然動也曰是亦彷彿鄉會試田之遺義而行焉者乎然又思鄉會試田生與闔邑之善士會同而經理之則衆力

之易爲功也而歲科試田之設獨出一家一人之力耑任而不疑且惻惻焉以其上承先人之緒而求爲可繼俾垂示於將來則其欲恢廣懿德施及儒素載德無窮洵乎志之所存者厚所期者遠而積善之家之必食其報其亦不待揣稱而知矣予於事之無關勸戒者不敢妄爲之說也茲有遯於張生之言是爲序

重修見龍石橋碑記

縣尹

楊

鎬

滿洲人

予聞程子曰一命之士存心愛物於人必有所濟夫濟人之事何必他及卽道路橋梁以時修之無憂行旅亦一端也故夏令曰十月成梁然予意役以時興其事或易非若後世以

石爲橋工巨費廣必合衆人之力以圖之且竭一人之力以濟之者矣予於張子儀鸞造見龍石橋成其先人之志者以爲義而可書焉先是府治四十里距瀘江河上流跨黃龍渠之水有橋曰永安載於舊志昔以木其易以石也前無所聞今可據者自張君九錫字勳臣始君邑人好義樂施艱大不辭因橋圯行人覓路難捐金首倡同時慕義之侶多應之謀徙故趾下別造新橋工將畢暴水奪之不克成張君志弗移復謀所以成之者益力諸同事共贊之卒不遂而君歿矣其嗣儀鸞戚於心越數年遂與先同事者共成此橋而張子力爲多工竣更易其名曰見龍請記於 府憲江暨以白予予

慨夫俗之千古也如此義舉已爲罕覩問有爲之亦子輿氏所謂好名者耳今張子因先人之緒不惜財不惜力殫厥心成厥事過而問之忘其爲儀鸞也仍爲乃父功善則歸親固人子大義而斯橋之成則其人之孝於親愛於民亦可想見矣予以是而占臨俗之厚也樂爲書之以告世之好義而不私其力者

建聯珠橋題名說

傅爲許

莊子曰名者實之賓也又曰爲善無近名今之題名爲實乎爲名乎爲名而爲善則善虛善虛則心僞心僞則人非人非則鬼責名無益也誠於爲善者不至底績不止匪求聞達匪

翼獲報是謂實至實至者宜名不近名之名名乃久行者居者見之曰若者董事若者募化若者出納若者鳩工同力協志克襄厥成不騫不崩示我周行子若孫見之曰某某吾之祖若父也相與塵念太息無卽匪僻嗣前人恭明德則題名未必非勸善之一端也是橋也成於三年董事者王厥清吾弟爲譽孫啓揚募化者劉應周等出納者蕭聯捷鳩工者程王二人嗟乎名者鬼神所忌實至名歸猶恐遭其所忌况無實而名乎諸君其顧名思義益獵於善以質鬼神垂名於無窮也

趙公兩序

傅爲許



趙公者誰建水牧也牧者多矣獨曰趙公奈何賢也其賢之奈何蒞任未及期而政通人和百廢俱興故曰賢也其以雨繫之奈何自冬徂春迄四月不雨公憂甚齋戒積誠爲民請命步禱於城西二十里外之黃龍潭未幾大沛甘霖頻禱頻應是雨爲公而降宜爲公之所有公不自以爲有而吾臨人士咸歸功於公故以雨繫之也昔者蘇公軾有喜雨亭前牧楊公緒爵有霖雨堂今獨曰趙公雨似覺親切有味不更逾於蘇之亭楊之堂乎予閉門却掃久與戶外事間隔耳公之聲識公之誠因與同志歌咏其事爲後之牧民者取法焉公名焜號文炎山東人

時雨春風序

傅爲詩

玉樹衛先生臨郡名師也德器粹然邃於濂洛關閩之學其爲文也馳騁百家珠貫而絃組晝驗夜復蒐斷簡採異聞橫驚別驅而一貫以理學者宗之公舉孝廉方正先生以盛名難副辭夫紀之齷齪之瓚櫛而不讐而光氣欲納有識者皆知寶貴焉先生既淡於進取四方學者益雷動以從先生坐斗室潛引默導或嘘植之灌溉之量其材器宏加甄冶無弗沐其澤以去故成就者衆丙辰 恩科王公俊鍾公衡典試雲南所識拔士一榜四人皆出先生門爰欽道範獎勵再三顏其居曰時雨春風昔鄭康成教授生徒孔融深敬之廣其

門日通德門楊伯起明經博覽諸儒從之遊號爲關西夫子  
今觀王鍾二公所以顏先生之居古今人未始不相及也許  
匏繫一官久踈請業追憶先生風雨之化益溯洄不能忘云

### 改建九司大石橋記

知縣孟廷對

山東人

聞之十一月徒杠成十二月與梁成橋之所以廣利濟  
關政治也而於附近城郭者爲尤要郡西五里許新建  
石橋舊名九司蓋郡屬九土司往來之要道也橋跨瀘  
江江之水發源於石屏之寶秀異龍兩湖而曠野諸山  
之水皆滙焉橋之初但架以木既不耐久且遇雨集水  
漲往往漂沒人多望洋之嘆紳耆等爲堅久計遂棄其

木而易以石此石橋之始基也方其既成行者咸歌利  
涉未幾而水壅川決橋復傾圯人幾謂木石無分矣殊  
不知河形本曲而水性迅駛建橋於曲乃順河之形而  
逆水之性也逆之則水多紆迴而沙易停易停則水溢  
水溢則堤潰堤潰則橋不固是水之決固有所激而成  
橋之圯亦相連而及者也首事者知其故咨諏相度幾  
費經營乃順水之性而自北移南以南陌沙淤之田而  
疏爲河卽以舊橋之地而培爲田田固猶是也而河則  
大順矣河亦猶是也而橋乃永固矣橋固而行旅安水  
治而狂瀾息不禁有感夫舊基之有治人無治法也茲

橋既成堤工亦竣紳耆等請予丈舊河之地以還南陌之田因索予爲記予乃躋橋之巔遠眺近矚山光水色秀麗宜人沃野田疇綺分繡錯資灌溉於是河者初不知其幾千頃而城市樓臺山村院落比戶相居而與橋相向者更不知其幾萬家耳環顧四野竹樹參差山鳥水鳧鳴聲上下樂目前之佳景思致此之有由因慶

聖天子德被八埏澤及百蠻海晏河清年豐人壽諸君子優游闌暇乃得以始終成此勝事而漢夷共樂此康衢也豈易言哉詢其始建之年則在乙酉始成之年則在丁亥其河決則在戊子又歷七年乃圖此舉至戊戌而橋

復成嗚呼諸君子竭盡心力自始至終蓋已十有三年  
於茲矣豈易言哉予欲後之往來於斯者知所由來故  
爲之記

重修靈官廟復興橋路記

教授李廷柏邑人

郡城西南五里許襟西湖帶草海一堤中峙有餘杭之概說  
者謂臨安之命名以此然不可考矣堤爲納樓諸司赴府之  
大道任贊車牛日以千計堤上建有石梁不知始自何時創  
自何人然以下疏流水上利行人甚要也堤盡鎮以靈官廟  
一楹爲休憩之所往來者咸便之第夏秋雨水時行流潦泛  
溢人廟者且數尺而所爲橋與路者俱淹沒而不可識及春

冬水涸則又礪确崎嶇滯輪礙蹄而艱於行近村善士吳士琳目擊其艱惻然憫之不惜捐貲脩葺既有白君珣者與白來朝相爲勸勉厥兄璽及姪廷弼等各捐貲謀建橋會原任衡水縣劉君士玉葬其先人道經於此捐助若干納樓司捐助若干益以募化橋遂成名曰復興更以其餘啓靈官廟而軒朗之而數十年崎嶇之路遂成康莊矣夫倖於福以爲善希冀之私君子有所不取而卽此徒不病涉車不濡軌則固已無負於王道之正矣况當此夷夏之交示以蕩平正直之路諸善士之功詎不偉與予先人慕道亦經此歲時省視恆病險阻旣而履此坦途心甚踴焉時學友白廷颺爲予道其

事因書以記之

兄弟傳

知縣蕭大成郡人

臨安鄉賢劉煥山孝子賈雲龍二先生同胞兄弟也其先贈公獻廷以劉出繼百歲鄉大賓賈玉吾爲嗣及煥山先生秉憲西蜀陳情復劉姓以弟雲龍繼賈遂分兩姓叫季流竄屠臨城贈公盡難煥山兄弟二人被執以善言化賊得脫歸侍孀母曹太宜人煥山支身入川有功初就總戎職迨

王師進蜀率流民投誠授整飭四川分巡遵義兵備道其在任安輯流民復農桑業重脩義學以興教化旣因裁



缺歸里屢

召補不赴後吳逆據滇能堅守臣節不受僞職當道贈清節名臣額居鄉四十餘年爲邦領袖舉鄉大賓好行善事設立義倉封義塚置祭田載在志乘弟雲龍亦倡設義會施棺木掩骨骸建義宅脩橋平路諸善事悉如兄之所爲祇奉伯兄如嚴父七十餘年刻未嘗離二難之稱徧鄉黨及歿月日時皆同予輓章有劫火慘崑岡憶當年瑣尾流離展矣一脉兄及弟花萼聯晝錦知此日家聲克振最哉兩姓子若孫之句煥山孫瓚庚戌進士出宰北流雲龍孫掄從吾遊妻以其子合郡紳衿公舉

煥山入鄉賢雲龍入忠義孝子祠兄弟合享禮祀

五言古

雲龍山題明州牧劉武功拜北處

公諱偉靖節此山

蕭大成

停停山上雲勞勞山上路炎蒸六月天送客山前去微風蕩  
層雲驀然山對晤策馬叩天門披蓊啓石戶圓相陶穴前武  
公拜北處凜凜生氣存脈脈鬼神護不有千古人名山空盤  
踞我欲伐山石題此忠義字叶鎮畫剖鴻蒙永作山天柱

龍貞女哀詞

傅爲詩

奇節不可爲誰居盛名下賢哉龍氏女刻苦植風化生爲女  
中傑死重連城價當其字淡夫准擬鹿車駕淡夫擢第回捐  
瘦續膠能

淡夫爲同鄉周公相請纂修膠州志

貞女得聞之舍生投水瀨父母救

復蘇鏤心誓不嫁奔走半千里淚痕漬羅帕異事駭童叟里  
門集姻婭相與釀金錢衛生給寶稼一燈分課讀書荻辯誠  
詐明月照西樓清風滿書架經吏堆胞朽研究少閒暇冤遭  
同室入往往詬百罵拘麻心莫舒香退投巖麝冥冥含苦愁  
鬱鬱八春夏木葉啼風雨鶯花助悲咤淚落鮫人珠心血日  
嘔瀉愁生怨命薄得死如噉蔗老母哭無聲孤兒嗥不暇路  
人總蹇妯况近隣曲舍隱似魚中鈞詠言發嗟訝鴟梟妬鸞  
鳳惡音吁可帕膏以明自煎皮以文來射壽名古難並莫怨  
蘭凋謝九原偕淡夫琴瑟鼓長夜小招慰貞魂芳名日月跨

雲龍八景

傅爲訄

谷口桃花

此非武陵源誰種桃千樹開謝古今春牽引漁樵去時清異  
狂秦逃空乃大誤予心有桃源杳然迷出處

石壁藤蘿

奇唱發

千仞削危壁攀緣不得到空際垂藤蘿狙公扳叫嘯翠影搖  
風來緣絲牽月照枝枝掛吟心奇唱發高妙

虹橋鎖翠

峯藏路轉曲一水穿雲瀉萬山積翠流石梁當澗跨碧色壓  
迴波巒顏日高雅閑坐橋邊身或逢負荅者

文中子有  
負荅者傳

雲峯夕照

系在... 卷之... 少...  
奇峯時太古縹緲烟霞外雲出遙蔽虧返照燭幽昧松聲走  
晴空暝色沉杳靄全闕聳其巔夜燈吐光怪

天池印月

石溪無靜流轉愛靈淵定閑波孕明珠樹影得相映吞浪月  
入心鑒形月在鏡止水發天光虛明得我性

溪水流馨

緣源吐雲窩渾沸穿林樾鳥散春花飛風吹錦浪薛山光鎖  
烟虹香片流古月此是功德水臨流洗詩骨

靜夜松濤

虛壑淡容與青葱隨嶺闊日出林鳥喧夜靜松濤咽鍾磬入

餘聲虎豹藏深窟中有忘機人高歌萬籟歇

梵音遺響

晝掩碧雲關羣僧坐齋閣焚香出珠林擊磬散烟壑松風雜  
經聲逸韻半空落誰知念佛鳥時傍堦前鶴

七言古

題黃隱君百朋集

尙書 韓 炎 長洲人

安豐董生孝且慈隱君行義人莫知昌黎作詩記其事至今  
名與詩具垂臨安黃生性純孝母氏苦節世所希採蘭南陔  
奉晨夕譽聞藉藉瀘江湄他時母病瀕阨危割股進藥病始  
治天生純孝報苦節此語萬里傳京師郡人盧君爲傳記餘

事叙次無瑕疵人生孝稱百行首吾詳其大細則遺表彰潛  
德見哲嗣報施益信天無私生於董生洵相類吾詩遠愧吾  
昌黎

趙公雨

彰潛貯

通政司  
經歷

李鳳彩

邑人

丈夫胸貯泰山雲膚寸而合週無垠丈夫手傾滄溟波  
運之掌上飛滂沱用作霖雨

天子命那許炎蒸毒萬姓肥蠶旱魃紛爭逃潛虬臥龍趨號  
令君不見癸酉响町火雲熱我侯風雷中心結天漿盆  
翻隨禱求叱咤屏翳麾列缺南畝東阡齊灌注崇朝頓  
起澗轍鮒三祈三雨農騰歡誰知至誠通甘澍我聞決



獄致雨顏魯公御史嘉名播蒼穹省畊降雨百里嵩隨  
車芳譽噪域中人天符應今猶古浩歌譜作趙公雨

前題

學正楊銘敬邑人

响叮四月風披猖响叮婦子愁驕陽三河塵起千郊赤一望  
高低似龜圻賢哉召父爲民憂要將一念迓天休靈湫步禱  
淚珠落赤子何辜膏不流一䟽通神神感格鞭起伏龍眠不  
得玉虎晨鳴金蛇舞山雲油油膚寸吐乍看松叙噴高簷旋  
驚銀竹注遠浦高簷遠浦相貫輸千村穰稔翠平鋪兒童拍  
手老農慶我公顧之笑捋鬚賢哉我公一寸心化作巴甸三  
日霖膏澤平分十萬戶誰知雨粟勝雨金君不見淮陰守甘

雨滂沱隨車後又不見西華令積薪自焚民歌咏天道有心  
非渺茫我公足與昔賢並

歌行

五老峯歌

傅爲訥

潯陽有五老峯町有五老八千里外遙相望不知幾萬億年  
無人考憶昔停舟彭蠡東琵琶高矚五老峯歸臥瀘江望不  
見乃見瀘江之南五老立天中是時清和雨乍歇返照鬚眉  
白於雪峯峯濃綠生雲外朝望暮望總奇絕左手拍馬鞍山名  
幾時騎馬下西山右手持銀甕偷兒日夜巧搬弄是時銀廠興盛五  
老五老勸汝酒一斗能制頽齡益汝壽黃精之液調天漿好

飲劉伶不到口五老五老吾與汝爲友今人相知不忠厚長  
嘯一聲汝聞否明朝携我九節杖與汝唱酬甘白首世上勳  
名吾何有清風明月共消受煩翁寄與潯陽叟

燕子洞

神禹不到處誰鑿此靈洞鬼神滅盡斧斤迹造物好奇爲巧  
弄燕子何年來點綴玲瓏競喧闐胡不去王謝堂中巢畫棟  
而乃深藏遠引學丹鳳似得靜者意不與隴西慧鳥爭入貢  
下有一條雲浪吼門入怒走雷霆地軸動虎蛟水咒紛潛逃  
潭底老龍蟠石甕古樹雲根相逗生普陀一巖巧補空滿壁  
惡詩憎山靈誰爲削除 沈宋昨者招邀茂先來

月槎  
太史

上下

相羊惟我共興酣落筆燕驚迴句句飛鳴帶雲縱搜奇抉怪  
山精泣虎嘯泉立風雨從樵奴提壺斟復斟醉中酒覆紅蠶  
重名人古洞兩相值詞賦一時遍傳誦從此遊人如鳥多巖  
雲山月厭迎送借問藏書禹穴仇池洞天靈異與之誰伯仲

五言律

普雄曉歸

知縣沈聯元邑人

花村憐欲別谷鳥故依依松逐吟鞭曉歸鞍野色圍遠山支  
日上落葉帶雲飛過客炊烟早人家尙掩扉

憶村居四首

黃鶴鳴郡人

天道往能迴溪窮境又開湖花澄碧靜山勢送青來昔陋三

椽屋今高駟馬臺居然臨綠塹朱戶映佳槐  
春水碧縈帶秋山翠列屏陰藏官柳路雲壓野梅亭漁唱朝  
來發農醒晚未醒喜聞疎雨後荷伴午風馨

楊柳三年別茨菇幾度秋湖山雲外夢鬚鬢鏡中羞腐鼠知  
何味醯鷄只自尤輸他蒼舊笑若個是封侯

鑑亭誰作主曾共素心盟一自風塵隔空餘山水情幽棲懷  
往昔事業憶平生寄約諸同社十年踐耦耕

龍貞女詩 並序

知府王文治 江南

貞女姓龍氏滇之昆明人建水進士劉君恬聘爲繼室合  
卺牽蘿將有日矣而乃公明才雋福遜庸人叔寶神清相

非壽者貞女將投身於瀨水抗跡於泊灘上天鑒佑絕惡  
復甦鄰里代爲之悲父母莫移其志先是劉君元配貌有  
遺孤賴巾幗之程嬰爲家門之周勃茹荼畫荻八歷寒暄  
卒以憂能損人才不偶數年未三十嘔血而終蓋卷施之  
草心本易傷共命之禽理無獨活矣貞女幼通經史善屬  
文內言不出世罕聞知孤子平矜頗能口誦摹曹娥之碑  
版每動傷悲聽女匭之站聲無非激楚嗚呼崩城哭市或  
無飛絮之才習禮明詩或乏貞松之節以文兼行自古爲  
難考厥遺徽有裨風化也乃表以詩

重門苔跡厚一徑閉蒼蒼里合名全節詩曾譜斷腸玉因含

璞貴蘭以被煎芳寄語貞松質無須怨雪霜

夏集南山寺小引

傅爲詩

不到南山寺閱年矣丙子端陽次日文社諸子攝飲晏予並拉上人可重同往坐臥樹石間抗言在昔觀雲霞變幻驚風而驟馳聽遠近清歌追張韓文飲因成

四韻

排雲忽長嘯又聚南山巔倚樹吟莊子味杯對的然風吹西岫兩人醉夕陽天歸詠誰狂點而先祖遯鞭

登眞武樓

遂爾登龍首遙天入絳樓飄緲空中立孤高象外遊吟詩黃葉落把酒紫雲浮不盡登臨興猿啼薄暮愁

宿興聖寺

分栖淡公榻，叩寂說心經。靜夜諸天合，空山五慮惺。風高梳骨冷，霜重逼燈青。想作梨花夢，疎鐘響不停。

宿龍家寨二首

南來開別墅，好在白雲間。百丈青峯峻，一潭秋水閒。愛奇惟選石，遣興獨登山。租稅年年減，端知稼穡艱。

獨坐荒村夜，迢迢覺漏長。松梢斜掛月，屋角暗飛霜。候火煨新芋，尋爐試妙香。心清端不寐，蟋蟀細鳴床。

七言律

白鶴泉

葉 涑

白鶴東飛飲啄清，尋源似向九臯行。一泓玉露清秋水，三壘



金砂擁化城芝草結時看墮羽雲光動處想遺聲難將消渴  
支肥重安得臨流煉石烹

雲龍雜咏

黃肇曾

聳翠含蒼萬象懸纖塵不到碧雲邊誅茆地近雙林寺紀歲  
人稱萬歷年烟裏市城圍蟻國中明月老壺天悟來五味  
皆支語怪底詩思漸入禪

不斷奇花四序春香秋香氣點踈筠清霄客到談仙佛別院  
僧來迭主賓偷菓雲中猿繞樹啄桃停下鼠窺人唱酬世外  
支公似無着天親許卜隣

龍氣蒼茫過雨時居然天半擁峩眉連朝霧隱巖邊寺一幅

系作及フリ示  
烟含畫裏詩忍草靈芽新歲月禪堂青篔古威儀相羊信步  
穿林去坐聽經聲出院遲

層巒絕頂覆招提曲徑潛通路不迷萬頃蒼濤天上一溪  
烟靄寺東西觀棋樵去凌鰲背送客僧忘過虎谿白石青泉  
非浪語結廬有意傍幽棲

學海觀炬

御史

張

漢

石屏人

煥文峰影泮池中幾點遙窺野炬紅陸地已成星宿海靈槎  
欲貫斗牛宮平生每愛尋幽僻消息眞如問卜翁待得明年  
今夕見科名有數信先通

萬明寺觀炬

走取傳燈徹萬明，坐看列炬亂縱橫。  
非花誤引長春苑，無月能窺不夜城。  
滿地平鋪星倒，下初秋欲趁火西行。  
焚膏繼晷連床近，借與儒生耀矩檠。

遊北山寺

傅爲許

羣峯積翠擁招提，絕頂憑臨望不迷。  
瀘水遙從巖洞落，城樓高與玉屏齊。  
笙歌多在紅泉北，風雨飛來大閣西。  
今日木蘭王播在，碧紗新罩舊時題。

南山寺讌集

踏破秋風上古堤，小停叱撥畫橋西。  
三川水落招提靜，一徑雲深野鳥啼。  
玉練搥香人盡醉，白銅鞮唱日初低。  
鞭絲帽影

歸途晚回首南山月影迷

雲龍弔劉武功州侯

傷心社稷化浮烟萬里孤城大地年詩魄往來吟水石忠魂  
縹緲在雲天猿啼巫峽無歸日鵑哭龍山弔往賢地下有靈  
應識我小招新賦拜臺前

弔楊升庵

李蘇謫後到先生天縱川才駿厥聲哭闕三朝櫻虎怒入滇

七子割雞盟

張半谷楊宏山王鈍菴胡在軒孕中溪唐池南吳高河公所謂七子文藻皆在滇南一時盛事

洱蒼韻寫

峨眉月金碧心懸白玉京故館荒烟文藻散懷賢如夢鳥空

鳴

七歲詩成銅雀臺，荷戈白首亦堪哀。竟同屈賈含冤死，不及

韓王得詔回。

法武年間韓宜可王奎二公以奏事謫臨安後皆詔還官至顯位

巴甸巷名傳太史葉

公韻語托仙才。

葉瑞與先生爲文字知交

每尋故趾瀘江畔，彷彿先生杖策

來。

弔王侍御白雲菴讀書處並次韻

讀書樓在片雲無，山自青青鳥自呼。能肅霜威飛白簡，肯勞

湯札媚當途。

或勸公以一札揚湯君公不應後爲所陷湯君者賓尹也

旅魂如絮傳凝翠。

先生卒於江南

著有凝翠集

佳句煩敦擊睡壺，百五十年憑弔處。滿天風雨落秋

梧。

邀月槎張太史遊燕子洞

系仙苑ノリニ  
奇哉造物弄瓊瑤幻出玲瓏半月橋百萬燕呼肥水戰一條  
浪吼浙江潮洞房湯酒邀靈運石壁題詩待孝標飛鳥驚蛇  
明落日松風隔水奏雲韶

春集燕子洞

何年神斧劈崆峒穿破山腰九曲通桃浪吐吞聞霹靂黎雲  
婉轉入玲瓏蓮花臺古工延月燕子巖深巧度風碧瓦朱欄  
高照耀好携衾枕宿仙宮

攝飲齊登玉女扉洞天深處踏芳菲魚驚倒樹當筵躍燕帶  
行雲繞座飛花鳥入詩流逸響笙歌催酒醉餘暉山川風月  
誰爲主虎嘯猿啼送客歸

春日南山喜雨

知縣包瓚邑人

南山遠眺興悠然飛下催詩雨一天始信社翁嫌舊水應教  
蘇老續新篇陌頭奚自來高鳳門外分明掛輞川爲問龍池  
深色柳風流可許似當年

佛手柑

教授曾綰邑人

祇園綺樹燦朝暉看到霜柑妙入微西證佛因成勝果南邀  
橘伴試金衣携來滿袖香初泛擎出一天露正肥若使聽鶯  
陪斗酒清芬繞座應忘歸

燕子洞

學正包晉邑人

勝傳名不是天工混沌乾坤一竅通石慢橫遮星宿海銀河

系仙及ノ少三  
直貫斗牛宮窩雲深處堪巢燕滾浪平時如走虹起上廬山  
尋古道親人花鳥帶春風

辭歸

是誰憶鱸不驚秋十二年來薄宦遊苜蓿盤中真味足趨踰  
隊裏壯懷休改容慙令人青眼窺影幾忘我白頭檢點歸橈  
吾道在扶鳩仍上讀書樓

茶花

俚

蛻  
松江人

曾記珊瑚碎石崇誰教幻出此花紅軟枝弄影嬌堪對細舌  
含香語欲通休問鶴丹千載上竟分猩血一鞭中還憐絕色  
沉蠻微零落胭脂泣曉風



王奎煥文山韻

知縣謝奉璋邑人

銀屏斜照海之東，點綴雲霞萬象空。  
影掛波心紅芍藥，峯回水面碧芙蓉。  
名人自許留佳句，好客還須續舊踪。  
若把孤山移此地，更多梅雪繪圖中。

再次瀘江韻

瀘水西來又指南，長堤渺渺護沙潭。  
千條密柳還垂綠，十里繁花好謝藍。  
濯足濯纓湖上取，就深就淺鏡中含。  
盈眸無數冠裳客，對此清流應息驂。

五言排律

檳榔無柯

李廷柏邑人

嶺南傳異種滇徼產栝榔獨幹亭亭秀孤枝特特芳盤根無  
別杪錯節自成行點碧非凝露渥丹詎惹霜香生花滿蒂珠  
綴子盈房不爲勤芟刈寧關剪斧牋嶧桐高百尺漢柏蠹千  
章應附包茅貢馨聞達帝鄉

响町三洞

响町多名勝巖巖洞石支嵌空飛王屑拔地溶金池露鎖瀟  
江岸烟橫喚嶺陞高崖懸罉角峭壁對參差曲折三層透晶  
瑩萬象移泉聲琴冷冷浪穀翠漪漪不假人工巧寧非造化  
奇風雷轟炮火應自起蛟螭

七言絕句

香林寺

葉 涑

山影遙遙隔幾層月中取路昔遊曾市朝酷暑銷何處比似  
蒼山一壑冰

放鶴呼猿事已非空山寂寞有神威欲尋騎虎當年跡明月  
中天正吐輝

古木寒潭漏夕陽山林經濟幾人當惜陰擾擾成何事不及  
山中日月長

爲愛逃禪載酒遲偶然說偈與雲知山中若解禪中趣莫訝  
揮毫輒咏詩

佳山挂笏雲中見岩岫今橫几案前便可住山君住否結廬

不用買山銀

當年鐘鼓久銷沉野鳥窺園自法音偶檢蓮華將隱几樵歌  
何處出林深

樹影參雲鬱不開有時風雨暗樓臺安禪莫向空潭曲恐有  
神龍聽法來

入谷逶迤一徑斜溶溶流水映桃花莫嗟容易滄田改尙說  
青山屬謝家

山路微微夕照紅隔溪指點是樵翁莫嫌眼界無寬處攬取  
雲光入鏡中

出山寒水便成溪偶作流觴似會稽遊客偏饒茶癖在遙通

竹筧過林西

一枕栖雲萬慮間，偶敲清磬激流泉。  
深林不是人間世，也有雞聲叫午天。

野蒼花開樹樹香，林中有鹿自成行。  
來遊誰是聞香者，逐鹿尋香過幾莊。

一佛宮雜詠

傅爲許

雲林花蝶鬧春風，一鶴飛來一佛宮。  
紫閣青松誰管領，百年興廢鳥聲中。

枝頭彷彿走魚龍，大海迴瀾鬧衆峯。  
絕似平山堂下路，松濤

萬頃一聲鐘

楊州平山堂  
有萬松亭

危坐樓雲嘯月廬六塵幻有不關予誰知無本來潛聽落日  
空山夜讀書

琉璃窗外越雲翹人步丹墀漫寂寥欲引栖鸞排紫竹爲聽  
鳴雨種紅蕉

東嶺雲飛薜荔墻樓頭曉望覺春涼雷聲昨夜飄紅雨添得  
桃溪幾寸長

田太史妻王氏節孝

臨安府教授  
楊廷棟  
馬龍州人

腸斷木天人永辭册年廢讀髮髻詩堅操可對松筠老孝  
德無須娣姒知亥二如身荼苦在甲三慮後母儀垂於今  
門楣光

朝典義重金閨畫荻時

遊香林寺

生員李 垣

古刹依林麓南來結伴遊  
亂峯千疊拱曲水一灣流  
悟寂禪心靜吟懷客興幽  
尋源真得所恨未浹尋留

偶成

草木山川色星辰日月光  
無窮昭宇宙天地大文章

補遺

羣節墓

貢生馬天柱 邑人

青雲橋邊白鶴浦羣賢大節存  
古墓年年三月子規啼  
衰草斜陽迷客路憶昔元氏亂  
天紀紛紛盜賊如蜂起  
四十一人

刺魯丁清修共棲岩谷裏一旦羣賊脇之從拔刀注朱向人  
胞寧膏英雄三尺缺百折不回孤介踪分明身首異其處經  
宿昭合仍如故葺宏化碧事非誣張順僵立真不數郡人見  
之柏錯愕累土築墳起高閣凌霜老柏常青青永夜孤月共  
焯焯君不見長平一坑四十萬冤魂怨魄何時散中無一個  
是男兒解甲乞哀身仍喪又不見田橫有客五百人甘心一  
時屬波臣歷漢及唐幾何載凜凜生氣塞蒼旻吁嗟自古誰  
無死奴顏婢膝誠可恥志士不忘在溝壑千年僅見諸君子



建水州志卷十五

藝文記

重修臨安府學廟碑記

大學  
劉健

睢陽李公孟陔弘治壬子秋自貴州按察僉事遷雲南副使奉勅整飭兵備駐節臨安府視事之初謁顧瞻興歎以爲敝陋弗稱卽有重修之志未果越五年丙辰政行民悅境內無事歲且熟乃進郡守烏程王君濟議協遂以是冬之孟聚材庀工撤而新之不數月告成自大成殿明倫堂而下以楹計凡若干有奇宏麗有加祭器樂舞歲久亦敝以修葺餘力咸一新焉李公馳書請余爲記

余惟雲南古徼外彝地去京師萬里三代以前聲教未及臨安屬在西南蓋又遠焉民有椎髻編髮以爲飾佩弓刀戰鬪採獵以爲生者固不知文字也秦漢以下漸列郡縣自唐至宋復爲彝酋蒙段二氏所據始置臨安路我皇明混一疆宇乃易名爲府洪武初立學校聚生徒設官教之文化之被視內郡焉百餘年來漸涵既久庠序之士咸知誦法孔孟崇尚文雅由科第以取仕進者往往有之先正所謂仲尼之道與王化遠邇其信然哉李公中州偉人抱負素正駐節其地者八年每公暇輒引見諸生開以孔子義理之正學多所造就又嘗以所屬長子弟八庠序與諸

生聚處講習李公今遷陝西按察使內江王公一言以監察御史往繼其任亦卓然有識士其加意學校表正士風與李公有不約而同者臨安之士自茲裒然出爲世用以建功立業將彬彬然而益盛其所宜書不但學廟之增新而已故因其請特著之俾諸生之後進者有考焉

臨安府重修廟學碑記

郡人曾鼎

孔子之道上承伏羲神農黃帝堯舜禹湯文武周公之緒六經之教所以繼往聖開來學爲天地立心爲生民立命故其道與天地相爲悠久自昔有天下國家者皆師尊之凡國都以至郡縣莫不建學以崇其教學必有廟所以嚴

釋奠之典無非重其道也聖朝有天下於建學立廟之意視前代有加雖窮鄉下邑莫不有學有廟禮樂之備比隆三代臨安在滇南爲極邊郡學校之設自洪武平定之初歲久圯壞弗稱國家所以化民成俗之意正統八年春知府徐公慨然欲撤而新之顧力有未及遂謀於郡僚衛帥相與捐俸購材鳩工重修工未備適雲南按察司憲副姜公巡歷至郡亦捐俸益之明年明倫堂四齋大成殿又兩廡戟門櫺星門杏壇泮池皆以次繕葺之規模煥然聿新於是請爲記刻石以示方來於戲聖人之道在天下不可一日而違君臣父子夫婦長幼朋友之倫人所共由不以

文武而有異故雖在衛帥猶知所重焉矧爲士子朝廷之所作養而期其有以致用於時者乎爲師者以斯道爲教爲弟子者以斯道爲學則不負朝廷建學之意而聖人之道豈有不明也哉

儒學新修杏壇碑記

知府王佐

汝州進士

天地之道高明博厚至誠無息孔子天下之大聖人也其道卽堯舜禹湯文武周公之道其神化與天地上下同流故曰夫子之不可及也猶天之不可階而升也然其動靜語默無非至教粵若遊詠洙泗之間坐於杏壇之上弟子侍側聖人絃歌天下後世至今傳誦之仰止杏壇猶可想

見聖人渾然天地氣象於千載之上臨安爲滇大郡學宮  
煥然甲於他郡數年來人材彬彬輩出與中州齒獨杏壇  
故址歲久益圯未有能復修之者蓋有待也辛巳春適僉  
憲平溪張公按臨浩然有創修意旣而紹興羅公至顧瞻  
其地慨然卽欲成功時有尙義若柴庸者聞而樂助之貲  
佐與指揮使萬公暨諸寮案相與協心殫慮捐俸贊襄乃  
命諸生董其事不日鳩工踰月壇成佐間得聖人絃誦遺  
像用劉於龐牲之石以啓後人之瞻仰他日臨安士子有  
自學而登庸者著聲四方則杏壇不爲徒設矣而於望朝  
作養之恩亦不負矣幸其勉之於是立碑以記歲月凡有

功是役者姓名具列諸碑陰再拜而獻頌曰

於維聖人

聰明仁智

祖述憲章

先後一揆

於維聖道

大如天地

無時不有

無遠不至

聖人之心

化育無二

坐於杏壇

羣賢列侍

鼓瑟而歌

道德漸漬

金聲玉振

垂教萬世

皇明啓運

列聖臨御

道學日明

道統日著

維此臨安

軍民所止

彝風旣殄

民知禮義

學有杏壇

未獲修理

不有達材

孰克承志

有賢僉憲

臨學顧視

俾弘其規

俾廓其址

佐也小生

惟道是企

謀及僚屬

贊襄厥美

乃築乃斲

棟梁聿舉

僦用工材

民不知費

大功告成

歲月斯紀

後有作者

是承是繼

尊經閣碑記

邵玉

閣以尊經名崇聖道也道具前聖一心著之於經必有後  
聖者作兼君師之位當制作之任闡明宣朗然後經益以  
尊道益以著足以扶世導民歸於皇極肆惟皇明撫運列  
聖代作御製大誥三編及五經四書性理大全爲善陰隲  
孝順事實五倫書要皆所以尊經崇道而大有補於世教  
故以雲南六詔荒服之外亦必創學立師頒布書籍作新  
士類千載斯文之大幸也臨安在邊迤東地大形勝不振



士風廟學之建蓋亦有年宣德間前監察御史賴公瑛出守茲郡於明倫堂後始建一閣扁曰尊經貯書於上意亦勤矣歷年茲久風雨震凌始莫可支天順癸未秋貴陽周公瑛由名進士歷秋官副郎拜命來知府事首先詣學謁廟周覽寰視慨此閣之傾圮勢弗容緩亟捐俸貲爲倡諸在官者和而應之鳩工庀材卜日興作撤舊繼新擴隘爲宏前接以楹旁夾以室閣之四壁復圖繪前賢刻苦好學之跡勵厥後進落成之日同知雲中劉公文疏其事求文勒諸石於戲仰體聖朝崇道尊經之意修閣諸書長編巨冊插架堆案襲芸香於四座藹絃誦於一區興學勸士如

此郡守之職盡矣遊茲學者寧不知所以然則於經愈尊於道愈崇於國家建學立師之恩庶不負矣歷書此以俟復修寄賢祠碑記

歐陽重

臨安郡學有祠曰寄賢以祀王太原韓五雲兩先生也洪武中用法嚴峻二公皆以諫得罪而太原以山西叅政謫五雲以山西布政謫並戍臨安衛一時樂居絕徼相與講道於學廟東北隅若將終身焉當是時雲南始定臨因元學重修之兩先生雖在軍旅實爲文學倡若文翁之在蜀也若韓子之在潮也師表於茲益十有六年矣於是士習始變人文始著臨安子弟殆無有不學焉者矣既而五雲

起爲都御史大原尋起爲翰林侍講而臨士之第進士者自茲始仕者相望於朝兩先生之功何可誣哉成化中訓導趙君子禧於其講道處構亭曰讀書臺以繫思也分巡僉憲劉君福因爲祠亭東北以昭祀也副憲包君裕爰肖厥像題其祠曰寄賢以示範也分守叅政陳君宣爲祠記詳書其事不沒其實也至是兩先生之功庶幾不泯焉爾其後兵備副憲王君一言拓修

文廟以祠爲偏移諸廟門左屋雖增飾臺因以燕臨人士過其故處若不忍兩先生之跡淪於變遷嗟咨久之嘉靖丙戌副憲戴君魯溪奉制命來鎮是邦武備文事聿舉顧瞻

祠宇以其地臨街喧隘而弗靜亡以稱祀典人士迺亦以非其舊爲言者遂謀修復之披志圖求遺址卽廟東北仍其故處撤祠爲新遺容有儼形迹若存而於所謂讀書臺者亦不失其舊於祠前易廣其地作前後講堂者二環以書房總四十間嗚呼蜀學始文翁故祠石室潮學始韓子故祠後堂然卒移之儕爲四公孰若兩先生之祠得附學廟雖移之而卒復之而祀且專耶抑二公皆守郡有教人之責兩先生皆謫戍重以遠方立教之初非誠有得於己欲彊人我從不可能也而謂能使人景慕以至於今不忘邪夫以蜀潮之教自二公以往鮮能繼之者而兩先生百

餘歲後又得魯溪修復其祠增築其學舍以終其教俾臨子弟藏修於茲宛然如當日侍几席若兩先生今日之在茲也讀書臺下吾伊琅琅殆將由其道於無替極其功於悠久配兩先生而俎豆其間非魯溪誰歸哉祠曰寄賢仍舊名也講堂曰聚奎曰麗澤門曰寄賢書院新題也太原諱景常字景彰五雲諱宜可字伯時俱浙人魯溪諱書字天錫崇陽人辱余爲記故喜廁名其後焉

### 崇正書院記

郡人張 繹

臨安之有書院憲副王公之所作也古黨庠術序之外闕巷有塾至唐每鄉闕各令置學書院蓋沿此遺制宋初郡

縣之學未立因卽前賢遊宦過化讀書講學之地增立學舍後人於其先世聚書淑鄉族處亦皆承修而書院寢多矣我國朝學校徧天下一教之以聖賢正學士雖未免科舉之習然不但於其文詞而已當道君子每爲書院拔秀異特處其中以培養實德固相成之道也嘉靖癸未公以分巡監督學兵備來駐臨安視學雖已弘廠而肄習號舍獨缺將圖廣之得西郭外僧寺一區地高亢陽處置有方宜在亟成於時盜訟衰鮮憲務餘閒公躬畫條規擇任能官撤寺而更置焉遂鐫崇正爲名蓋以聖賢正學端習尙也聖賢之學原於天命具於人心見於綱常倫理日用事

物達於政治卽經書所載之道先儒之所發明而書院之所講求者也宋四書院白鹿洞得文公朱子之修而獨盛於今教條講義具在彼其次第於五教之目爲學之序修身處事接物之要致審於君子小人義利之辨不惑於似是而非近理亂真之說遏欲存理明善誠身言動好惡一於公正德業文詞一於純實而師心慎獨求以不離乎道凡皆正學之所有事也乃若心術幾微邪正之未判名利之牽引矯拂欺僞其爲行詖淫邪遁其爲言自是而非彼美已而惡人援上陵下由徑入室而滄訛詭秘有畔於道凡皆正學之所深戒也習尙端心行正而爲正人處則以

正家出則以正國守其正於居常而不失於應變聖賢立體達用之道所謂正學實德庶幾近之若惟剽竊浮華逐時好以捷科名取容悅而苟利祿則非所以培養之意奚以特拔異處爲哉昔者楚之豪傑常歷江漢北學閩蜀賢儒不遠千里聚講衡湘道非止於聖賢生長之邦也天地正氣之發不以遠而有間滇人先亦嘗有宦學節義名志籍者矣吾鄉諸士固不得以遠而自諉况被聖化百五十餘年之久學校舉額益增乃今復有斯院不出閭里而得聚居講學又安可無所自振哉祠從鄉人之頌慕功德圃爲息遊之士觀德而肄習且將擇及武弁之秀一敦崇正



學一事正人君子之興起必有超乎前者出焉院之方作齒材明舊鬼速老王諸寨遠彝夙染禦人之習久負固者重譯自數百里外望東羅拜願自新乞貸公慰而定集之殆又文德修遠人來之義歟公名忠蜀瀘人以繹在蜀舊知命爲之記

重修城隍廟碑記

知府章士元

我聖祖平一海宇令諸郡邑廟祀城隍而廟制亦視諸司之式期以右民斯褒異之也既又以勝國所定封號爲不經釐之以從今稱官是土者尸祝有體誓誠有文祇敬日嚴昭貺靡忒致理成化之助焉可誣也臨安吉彝燹之地

洪武中始拓郡郡所控御亡慮數千里率多獐獠附山跳梁者恆十五焉其最鉅者西南隅直抵交阯之墟地獐而鄰邊若是爰有保障安危豈特一郡計哉崇墉言言深溝活活將全演是毗焉耳神之尸於是者揆厥精爽顧不於他郡加神異乎郡故有廟國初時郡人楊姓者捐地以成於時百務草創制從樸簡又乏紀勒以稽歲月歲久傾圮頑民僣寓漸至蕪穢嘉靖壬子春士元來守是郡謁神之日顧瞻咨嗟意將新之而時方議兵憚於舉羸閱明年癸丑春郡民祝崇者請曰郡之士民固將樂輸以從事矣亡何過之則傾者起敝者葺丹堊者爛然矣再過之則廟之

前加二室焉左曰奏榘右曰承休以竭虔也齋宿有所庖  
湏有室皆昔無而今有者也三過之則廟門之前有渠跨  
以石梁石梁之南爲衢易石以甃矣潔齊嚴闔遠邇瞻竦  
崇於是役專且勤也司諫晴山李君遇元以士若民之意  
屬士元爲之記夫城郭之設以擇禦寇攘奠麗民居厥功  
鉅矣廟祀爲稱然特司諸幽者也爲民牧者號有專城之  
寄則必有務民義者在焉豈曰悉聽於神抑亦不專恃於  
溝池樓櫓之間而已矣是故以固扁鑄以嚴鉅析以謹容  
築以時練閱莫非我責也而猶爲未也率民以業本導民  
以和親寬其力鼓其義氣而又將之以誠信則赳赳武夫

咸爲千城人和旣至山谿失險由是寇攘無畏民居永安  
斯無愧於食土之毛而有答於神之昭貺者矣苟不是務  
而殘民以逞則覆隍之禍行將自及神其怨恫又何所感  
格以徼惠於民哉凡我有位盍相與自警焉

忠孝堂記

王奎

董氏居臨安世多顯人其以忠孝顯名於元者則莊愍公  
父子其人焉公諱文彥大曆間爲威楚路知事時鎮將敗  
狐叛遭兵劫威楚迫公以從公正色叱之曰我家世累受  
國恩寧肯從爾賊反耶賊怒拔劍截兩耳內口中流血被  
面公嚼唾賊滿面了無匝色賊知不可強遂見害朝廷憫

其死制諡莊愍表其門曰勇節忠義公之子茂春字良卿  
仕爲通海學官痛其父死於賊毀瘠哀痛幾絕者數里巷  
聞知亦皆爲之泣下其事母至孝飲食寒燠之候未嘗去  
其側一日遇有疾至忘寢食輒顛天願以自代宗族鄉黨  
稱之無間言是時賦詩誦美之者有父子一門忠孝備簡  
編千載姓名香之語董氏遂以忠孝名其堂洪武初良卿  
之子思平爲邵甸縣主簿有才識譽峩土曾祿佑反側思  
平以忠義諭之曾感其言卽率衆來歸朝廷嘉其有勞以  
官帶寵之命世襲其郡把事卒於官其子士美事詩書謹  
禮節襲其父官爲邑人所畏服蓋嘗慨思祖父之遺風欲

其暴白於世也屬僧錄覺義雲山請爲忠孝堂記予惟忠  
孝臣子之大節也文彥盡其忠於君良卿盡其孝於親可  
以無愧於爲人臣子矣宜其子孫之衆仕者之多至於久  
而益顯也今世美承繼其先振起於後當知忠孝爲臣子  
之節况以之世其家哉斯堂也朝夕覽觀乃祖乃父之所  
卓立如此其忠孝之心寧不油然而興乎詩曰夙夜匪懈  
以事一人又曰永言孝思孝思維則董氏有焉董氏後人  
於祖父忠孝之節善繼善述天佑其家又豈有窮哉覺義  
董氏之甥也因其請於是乎記之斯堂將永有曜也

科甲題名碑記

陳宣

聖人啓運統一宇宙光天之下至於海隅蒼生罔不臣服雲南雖古荒服外三年大比登進賢良與中州埒蓋由列聖相承聲教覃被如雨露潛敷而萬物無不化臨安又居雲南之極邊而賓興之士掇巍科者有一榜半臨陽之稱然於立石題名尙闕如也茲值欽敕提督雲貴二藩學校僉憲四明邵公按臨考校問宣進告曰科目題名匪僅誌盛凡以昭勸義不可闕敢請公曰諾因命生徒鳩工礪石樹之儀門右介備書進士舉人姓氏於其上庶幾已備是列者益思砥礪名節不安於庸碌自處必欲追配古名臣在泮未出者益皆勉修德業不容以柔懦自甘必欲齊馳

諸先進則石碑不徒爲文具正以彰國家一統無外之盛  
於悠久故復系之以箴云

天生四民	莫先乎士	士參兩間	莫大乎志
志立功崇	志儻業圮	所志伊何	曰學而已
誦詩讀書	居仁由義	不屈不移	丈夫是企
養吾浩然	充塞天地	矧值文明	出由科第
鹿鳴旣歌	令其偕計	大較春官	羣英畢萃
清問臨軒	鞠躬數對	量能任官	度德授位
所治天民	所職天事	尙慎厥心	精白無二
視古名臣	四休媲美	忠佞廉汙	公論攸繫



在泮後生

宜加惕勵

自滿則驕

自狹則壘

自是則欺

自畫則退

井須及泉

山無止簣

所積既深

所發必沛

彼何人哉

吾何畏彼

帝德如天

聖道如砥

篤信力行

後先一義

北山華嚴寺八蜡祠記

郡人馮桂芳

稽古帝堯始爲大蜡八嗣夏商周因之行於列國歷漢晉宋皆有其禮所祀八神先嗇一司嗇二農三皆人之有功於農者郵表畷四貓虎五坊六水庸七昆虫八皆物之有功於農者歲十二月合聚萬物而索饗之蓋報農事之成云我國朝釐正祀典令郡邑春秋祀社稷以社爲土尊稷

爲穀長統具祈報之義第未有蜡之名至丘瓊山先生乃謂蜡祭宜與耜田之禮對舉於冬以報先農然亦自上之典禮言耳今他省他郡顧多祠蜡也者古人祭川先河孔子蔬食菜羹必祭其不忘本如此惟茲八神固農之本而食之本也義起之禮非斯民之情與記曰祭坊水庸事也然則舉八蜡於社稷之外又非農事之備哉臨安故無蜡祠歲萬曆辛卯鄉人醵貲修北山華嚴寺鄉達大叅萬先生文彩謂曰北山爲昔年郡公省耕之所寺左隙地盍祠八蜡爲農禋乎先生又首倡捐貲而鄉士大夫及善士之衆皆喜從樂施時請於攝郡郡丞南海李侯侯曰美哉乎

斯舉也哉母亦本業是務者乎於是起正祠三楹中祠三楹前大門中坊牌露臺皆甃以磚石繚以土垣神位主先嗇居正中從容塑像使人瞻以思其餘木主司嗇居左旁之上農居左旁之次列郵表啜貓虎坊水庸昆虫所以別貴賤也祠制略倣他省而神位則考諸郊特性既成適兵憲河東喬公郡伯南昌齊公蒞任以扁額請而立焉萬先生屬桂芳紀其事桂弗嫻於文奚能爲役然叨聞剏造初末故不敢辭竊惟古之蜡歲終記四方年不順成八蜡不通以節民也順成之方其蜡乃通以移民也於此有恤民重農之意而其禮操之自上茲祠既起於民情則惟春祈

冬報以徵靈貺於順成爾要之農之事幽贊者神也力耕者民也而所以使民得盡力於農者又在上而不在祠哉

遊雲津洞記

提學楊師孔

乙丑歲冬仲校士東迤遡昆明池入江川達撫仙湖出通海沿水週遭紅葉蘆花澄波石逕酷似江南暮秋佳景全收水石淒清之勝月終旬抵臨安嘉平望日竣試事闌中夜燭曉雞文焰筆花與詩懷相濬發知有雲津洞天之奇雖意興勃勃未敢必此遊聞水漲雲深非飛仙不可渡也郡大守徐君淪盈別駕顧君綸堂州守周君廢太業已預爲排當差官潘倅回云歲盡水落雲海橋成喬舌悚肩若

有不能名其奇之狀蓋潘倅爲虎林官裔頗解遊道者遂以既望之卯刻出闈廓外易野服可十五里易肩輿度嶺循澗委蛇盤轉爲闔郡衆水歸墟此邦文獻冠六詔水口奇秘如此勿謂青鳥家不足信也行里許鳥道篆蒼烟中聽水聲泐泐肩輿軟穩兩腋欲飛山淨水鮮漸覺非人間色相須臾回度山椒望石門百尺下接水雲中當門巨石如屋屏轉水勢分流澌澌入海門如灑瀆之砥三峽殺其欲歸之怒造化非無意也雲門顏高若障廻望不窮什七爲顏什三爲門巖畔古藤一株纓絡下垂將及洞門翠葉斑斑不能名隨風裊娜於浪花之上神仙點綴稍露一斑

余顏曰雲門蓋洞中雲浪屢伏屢見俱由此問津也由雲門折而左一逕入雲盤旋石亘橫開小嶺而上平野周回四山懸翥巖巒映帶曲曲有情行三里許如桃花源中桑麻丘塍但少雞犬數聲耳又里許折而左望石壁千尋亂雲中渺渺一隙小有棹楔蘚菜生秀一材官領健兒兩隊旌麾燦燦迳道左金鼓喧闐蓮界中却有六花雲鳥然雲裏修羅護法致頗不俗知是洞天門戶矣躡躡攘攘長嘯入洞門左盤而下雲級千層一望石華潭影與天光相蕩目閃灼不能定兩守別駕材官候吏千人簇擁笙樂齊鳴躡躡若佛界仙班隔水連震三銃如霹靂遶地底翻騰時

許不散何啻韓淮陰戰廣武時瓦屋皆震得此可壯遊膽  
一潭橫映沿岸而左突出層臺障以彩棚雲霞繽紛華纓  
回絡如海上新結奇蜃三軍禮畢各易野人服酒三酌進  
午飯庖廚音樂俱自巖隙各據一竅奔走趨踰不知從何  
而來大非人世所見隔水望雲壑中似屋似戶或廊或榭  
深廣無際暗中各位置蓮燈松火燦爛若星宿海聲傳樂  
奏渺渺雲濤余意觀且止太守笑應曰此入洞第一門戶  
仰視懸巖垂乳燕壘蜂房對面橫開百丈雲榜余題曰雲  
藏七十二天自晒爲門外人也向雲門所歸之水自此初  
見左轉而入玉柱千章琳瑯入水平沙沉靜滌衍淡漠絕

不見怒濤奔放之勢水性至此亦降且化矣臺下臥彩虹  
百尺對岸棹楔如畫楫欄步薦紅紫繡錯王淑明山水苑  
中間以飛櫟朱檻自非仙都何能有此可稱點綴名手音  
樂前導余與太守輩信步度飛橋飄飄若仙過橋行平沙  
上深軟如茵縵屈梁闌檻一派天成門戶從火光中一望  
玉筍株株華燈點點委迤婉轉杳不可際若五都三市上  
元燿燦但少人世車馬塵踪耳沙窮雲津水再見余題曰  
牛渚問津清溪蕩漾較初津闊三之二橋長倍之飛欄婉  
轉步數百不能盡星火中隱約波蕩如履長虹春步步生  
動但恐飛去兩岸雲頭霞級輪茵拳奇虬龍櫻舞不可名



狀橋盡涉東岸淺沙循峭壁而進羅列紛繽旌幢排導空中一片衲衣緒摺雲生針痕世界想初祖入定後頓念收去余題曰掛衲再行數十武則爲玉平天矣洞天自此開極太平障仰視玉板一片數十頃琉璃懸蓋四角參差柱以鏤刻玉樹珠絲玉板一如虛樞豎楯掩映迴環隔岸一望無際人聲動處漁火星星恍疑似鮫人窟宅水至此平偃汪洋有浩渺澄靜之勢中湧小巒僅與水齊白衣大士趺坐如生前立小善財似拜似舞蓮燄中閃灼不定不知南海一幅畫圖何年移置於此余題曰普陀彼岸與太守輩定席開樽盃中浮白與玉光相盪水面白毫向青眼搖

曳豈惟逃醉中之禪亦且登槽丘天上矣左折而上數十  
武高坪長偃不但可建十丈雄旗火光徹處蓮開雲涌霧  
轉星迴懸簷百尺累累若珠絡諦視萬象俱備第深廣高  
遠目窮於火火窮於象惟有鼓掌蹈躍低徊歎息而已中  
一峯突起十數丈萬朵青蓮攢攢而上勢若鰲山壁立又  
若蜃氣葳蕤列菌小坐令火人以高火射之搖搖不窮又  
以花火自峯頂向下噴吐如萬斛明珠瀾翻峽倒巖巖奧  
窔中傾濺跌宕俱成天花生平火樹之觀無奇於此余題  
曰象森天向下對過卽普陀岩下流少爲深廣兩守謂成  
橋之難深惜民力又恐余遊廢半遂大爲憇惠余題曰興

道卽行無勞過計也光中見彼岸懸岩下盤石嵯峨可棋  
可釣可臥可醉亟呼與人上肩輿揭厲而拱手謝三守不  
必勉進但得一尊一果兩侍人相隨足矣鼓勇前進到岸  
捫蘿選石向所見磐石雲蓋如龕清流繞膝不覺鼓掌大  
叫三守亦蹴蹴褰裳從之矣開樽趺跏環坐酒三行笑問  
曰直釣之釣古爲美談今我輩坐此石上人我渾化心手  
相忘卽直釣何在題曰無影釣向三守鼓余恐不前茲隨  
余恐不止不覺游興益猛不問主人毅然拂衣前進行平  
沙數畝空闊若原野千火齊明火光盡處俱無邊際至此  
愈覺靜奧百步外偶語俱聞微笑成響大非人世氣候平

沙盡處河邊有物十數雌雄反覆相耦層屢而上首足蠢蠢欲動蒼翠闊濕如初出水態明火近視的爲活龜敲之則鏗然石也雲津至此爲第三見成橋更難想飛仙自不禁足題曰弱流叱鼓樂明炬而前三守亦冉冉漸集過水兩岸峭拔稍費登涉中端涌一蓮座高可丈餘大士文殊普賢位置停勻相向鏤塑不能眞天巧也再上地勢高敞另開一洞天較象森稍爲謹祕而峻峭過之仰視圭璧琳琅霞蔚雲蒸莫能悉狀題曰鬱林天少下當門一柱大可十圍上挂天下抵地首尾適均有巖巖挺峙之狀行者左避題曰擎天再進有仙人一足自雲中注下膝與雲齊豈

崑崙失足誤墮塵中耶稍上遍地石田縱橫如畝塍遂俱  
備仙家亦自力作從來無素餐神仙也歷田而上雲壁間  
忽開數小龕方平如榻間尺數丈許各開一門中婉轉相  
通絕類人間洞房秘密命各懸一燈余與三守各據一榻  
且坐且臥酒行數十觴幾栩栩化爲蝴蝶矣題曰無夢榻  
下榻左進數十武有巨柱筋骨輪輪大十數圍上下生成  
齒齒印合中橫空寸許隔火相向面面朗徹天巧至此不  
可思議題曰乾坤蟻磨試問於中不知有幾許南柯國土  
左旋俱行石乳硃研中或蹈雲頭或履菡萏與人走卒步  
步生蓮我輩何異登仙再轉更開一洞天四壁峭起圓蓋

高懸簇簇垂垂俱成幢幡寶絡壁上華纓下墜萬縷千絲  
纏纏欲滴豈當時說法此中天花點點而成題曰雨花天  
過此層雲渺渺遠望莫窮左爲削壁上覆天蓬歸雲宿霧  
鱗砌而成宛然一響屐廊也右石路平坦唇稍展宛然函  
蓋之狀視虛無處俱不可窮但人氣火光結成虛空中一  
片白珩如雞鳴黎黎天色向三守咤曰昔人柯爛今不知  
曙欲旦矣題曰複雲廊路長里許各上肩輿石盡更有沙  
堤平偃燦然新築下輿信步平軟且酌且行有淡漠靜虛  
無名無相之致函輒酒再進數觴題曰恆沙堤堤盡興殷  
殷其餘勇輿人告以水深莫測從來遊客足跡未曾至此

亦謂天機神秘不可令人洩盡當留有餘以還造化可也  
土人相傳此去上有水七渡未漸通明原非經目不過意  
摹之詞自郡城至此洞有三一南明一萬象此爲土呼巖  
洞奇包二洞餘不足觀矣各登肩輿乘輿而返一步一戀  
燈火澄澄簫鼓闐闐真是仙人掌上碧落初回出洞月已  
過午影掛松陰雲棲石骨下嶺易肩輿入署雞聲嗚嗚伏  
枕就夢猶是石香雲潤不知東方白矣是日車馬在門匆  
匆就道激江試事歲暮入省復理西試閣筆幾一載偶於  
直指臺白岳翁處見別駕圖成如在七十二天或亦此洞  
之遺文責逋也小春晴霽墨和筆潤勉就小記以助別駕

烘染

新建曲江橋記

巡按沈正隆

昔杜元凱建河橋於富平之津論者謂周所都經賢聖莫作衆口紛角如聚訟乃卒排羣議而梁之橋成帝從百官臨會其上舉杯屬預曰非君橋不立也乃知非常之舉黎民懼焉非一世矣國家方興延袤原隰阜壤沉湮沮洳錯焉如繡而水居其七山陵谿谷之地百不當一川澤陂池之地十不當一江淮吳越三江五湖表裏襟帶民生其間揭厲便習長年闕於刺舟牙檣錦纜綠鷁駑駛若鷺鳥乃雁齒龜浮虹垂星應壤接而鱗比焉豈顧高高下下以



罷其民夫亦河厲漠梁之是賴以免於褰裳濡軌不然陽  
侯怒而天吳震飛鳥危而帆檣絕民安得不胥而魚鼈耶  
西南之國滇爲大鎮固非澤國也度索尋樅不講於刳木  
航葦之利乃昆明池水藩屏身毒漢武寫之以習水戰思  
蠶食焉固非拂埃揚榼安得廢達沮而不梁也响町之陽  
有曲江去郡九十里而遙其源出青蛉弄棟由嶠倪而入  
盤江匯爲巨浸夏秋雨集山泉會之騰涌澎湃瀾灩浩浩  
溟漲無端白鷺寒飛雪濤山立行者輒假艖楫以濟榜人  
不戒於水中流而膠而波之込之風伯鼓颺孟漶擗雪民  
隨波流葬於魚腹死者若蕉余奉命按滇蒞其境問民所

疾苦父老以告曰苦墊河之厲民無如河矣坐視懷襄莫  
救如吏何會鄉大夫王公恩民包公見捷從愚之捐其橐  
以助固非若羣喙之紛角也余亦捐庾廩之半鳩工紀材  
伐石斂土畚鍤齊興森舉雲集經始於大荒落之歲閱敦  
牂而告成凡爲星者幾爲柱者幾傍琢石爲斜闌曲曲十  
二望之若渴虹下飲玉池固不敢比於玉樑金柱然得醜  
嶮潔而從平燦或可拯民於魚鼈耳橋之陽祠漢壽亭侯  
以鎮侯於濱固未涉也其子興從武侯濟師瀘之役死者  
河爲不流武侯裒其骨而祀之則墊溺之患固侯所戚矣  
戚之其不拯之乎蘭津之濱有鐵橋焉懸梯織鐵勢如飛

虹其上祠武侯以鎮著侯績也關於武侯心契神合陰相  
往來安知其鐘鼓不式靈之余固昉蘭津而祠侯從民志  
也輪宇炳奕粉楹復結物物而爲之備令民歲得以牲醴  
祈福庶幾豸歌烏拜侯之靈其默相之俾海若不驚馮夷  
安堵蒼蛟白獺歸於其穴牽牛飲馬於萬斯年矣夫沉玉  
瘞牲波臣助順鑄牛燃鐵玄冥效靈以侯之精忠貫日而  
永奠之其不比於鞭石豎梁哉廟貌鼎新設醴張樂乃爲  
之歌以侑之其辭曰

河湯湯兮激潺湲瀾浩浩兮懷陵山馮夷怒兮洪濤翻野  
渡迂兮溯流難溯流難兮薄白日舟如刀兮衝波出泛中

流兮榜人溺沉重淵兮蛟龍窟川無梁兮波無人民之墊  
兮丁此辰乃駕梁兮河之濱通波陵兮車麟龜浮兮  
斷航續祠靈神兮梁之麓神之靈兮亶覆育長虹塔兮螭  
龍宿廟貌肅兮燕樂康振金交鼓兮酬蘭漿神之來兮繽  
紛揚擁長劔兮珮鏘鏘雲馮馮兮陰肅肅神之鑒兮朱顏  
頤哀下土兮殫爲戮庇吾民兮祭受福千秋萬歲兮奠陵  
陸

選兵靖寇碑記

郡人萬文彩

臨屬建屏迷蒙通轡之間有猗雞濮喇獬等種丁苴白  
改栗灣蓋甸等寨雜居散處不事耕織劫以爲利禁馭稍

池卽滋蔓爲患所在被刦莫敢誰何釀成鳴張之勢隆慶  
戊辰年至刦印殺官直薄城下如入無人之境而地方官  
且微文巧請以苟幸目前卒未有曲突樹防振陽威武以  
少挫狐豕之鋒而綏逋播之衆者國家何賴焉辛未秋七  
月巡臺侍御安肅許公按部臨安嚴持六察外尤留心民  
瘼進文武屬諭之曰諸兇犷獫固以我將士爲怯今不  
預爲之計仍蹈故習坐視民患莫之恤縱自愛惜如百姓  
何且諸彝與他寇異憑依險阻去來無期是必扼其要地  
禦以精兵修其武備遏其出而截其歸庶地方或可稍靖  
於是僉憲蹇公請於撫臺曹公乃奉璽書檄下州縣召募

精壯五百名官軍土軍二千餘名用搗巢穴器械餼糧郡  
守侯公任之兵憲西充張公毅然以弭盜爲己任首執縱  
賊窩賊土賊百餘人戮之揚聲進勦攻其堅寨數處且晚  
反覆數回出其不意犇寇以爲自天降也聞者不寒而慄  
受撫恐後至於罰賞申明調度周密忠誠任事前未之見  
旬月之間民皆安堵賊知畏懷後司馬鄒公繼之與侍御  
公同志至今蒙利所謂馭犇有要匪徒撫之亦貴威之治  
盜有方不在勝之而在靖之也咸願勒石以詔來茲

重修文廟碑記

知府丁序琨

學之興廢世之隆污係之古者家有塾黨有庠術有序諸

侯之國自二十五家以上則有學天子入太學則齒當爲師者弗臣誠以化民成俗必繇於學故干戈羽籥禮樂詩書無非學之事春夏秋冬無非學之時司樂司成教於國仕焉而已者歸教於閭里其養之也豫其訓之也備是以藏焉修焉游焉息焉不見異物而遷焉相觀以善相摩以化而不知誰之爲也然其時至聖未起記所謂合樂祭其先師者蓋各祭其所宗若唐虞之夔伯彝周之周公也自孔子歿後之學者莫不宗焉而先師之名始一廟而祀之者自古迄今無遠邇疆界一也道德之盛至矣降及後世異端蠶起正學榛蕪於是琳宮梵宇金碧輝煌而至聖妥

系  
神之所諸生講習之地或反闕焉不修教術裂而風俗衰  
矣臨安滇南望郡絃誦比鄒魯勝國時已有學國初更置  
府治之西二百年來遞加修葺規制嚴整足聳觀瞻崇禎  
初年郡經兵燹避難者棲止其間稍見損闕郡之諸縉紳  
先生聚而謀曰古者建國教學爲先兵戈既定肄業是圖  
可使頽然無鼎象虛堂殿門廡敞者飾之師館吏舍缺者  
備之坊亭樓垣未有者創之費不帑請工不民勞煥然其  
大成也將竣事適序琨承乏來守是邦諸縉紳先生偕諸  
弟子員見屬以記琨於是服諸先輩之能淑人而又知人  
性之無不可以善也近見士大夫或剪公隸弱豐屋蔀家



操其贏餘歌樓舞榭以鳴得意又或崇佛老之宮以導愚  
味竊以爲學聖人之道何見之左右若此而此鄉先輩汲  
汲宮牆之黼黻若其家事然於以開示來茲甚盛心也古  
之所謂鄉三老者庶幾在是而修廢之議一倡士人罔起  
應之出鏹獻勤惟恐不及豈其怵於勢誘於利誠慕聖而  
趨學心之嚮往不自己耳則諸士入廟俯八門伏塔而謁  
思昔日洙泗環堵之宮杏壇舞雩之下曾無安居何至今  
而萬世爲王當必有爽然喪其狗俗之念而勃然動其不  
朽之思者矣繇此以往言思可道行思可法毋誘於榮利  
毋雜以偏曲而學術正學術正而治化無難推之正國正

天下三代之隆可使在今日也豈但侈山川之掛秀誇棟  
宇之雄麗哉其用材幾何役若干歷幾歲時而成董役助  
貲之功別駕劉君之蘭司李熊君啓宇建守劉君僖爲多  
例書碑陰以答紳士之囑

藝文四

賦

萬象洞賦

明王廷表

其辭曰楮村西址豁有洞天叢芳迥蘩觥石攢延掣鳴簪  
杳碣築畧駢閑閑幽徑降帝榻僊鄰高人之丘壑時睇見  
其磅姘乃建標以雲護或盭燐而芊眠瞰雉肱以凝佇覽  
穀穢而欲翻襲岑芬於灑澗啓幽函而莫捐癸丑杪秋穀  
穀旣收官有餘暇民無纖愁芟遠構戶奔臺庀羞黃代巡  
倡其朔將兵憲繼其休晤會眺望縱綰綢繆南明是謐儼  
譽條流嗣疊嘉牘瞞我劣儔於是遯園迺發棠嶺未留衢

亭三五翫觀好迷有才以德如春如璆懷辰宇而寧域  
煦嫗而益謳者非主乎文旆映日笛聲倚樓坐瑤花於冬  
霽飛逸興於芳洲者非客乎吾則老鬢飄風傲骨度歲持  
蓮觴而酌醪赭莽面以昭契於是入洞而遊伏洞而睨瑤  
瑯玕而泐泐綴不可劑也錦纈舖而秋溜曠不可曠也虎  
豹蹲而山鹿齊不可觸也珉墀聯而鴉蝠憩不可枿也竇  
旭麗而藤祿闕不可劇也華蓋敞而龍伯隸不可儷也清  
虛明虛者與隱玄上玉者與金壇丹霞者與天網浮滂埒  
坵幻開委輸窳燧熒炭螻舫豈陂潢浚泱之後寶靈境而  
扞埃文藻焗頰之日地顯昇以培村者與盤都盧躍朱鬢

鳴箏簫振鼓鐸，焄炤瓊弈，鄙覓橘饒，啖臙噓唱香囊，  
陀海蛤主與客，權洞與人樂，整冠謝歸，崩影斜暉，杯茗相簪，  
百僣忘飢，趁趨羸輿，騰馬飛響，擷椽以遙，迓照松花於  
萬屏，相環壞以再往，恆多露之濕衣，感情悰之稱篤，聊染  
翰以寄微。

煥山明月賦

廖大亨

山流蒼於漢表，月凝素於樓東，柝聲寒而側側，蛙鼓亂其  
逢逢，乃有幽人欣此良夜，踞瘦亮之胡牀，當襄王之快風，  
翠煙藏山兮，見畫屏之隱現，青輝耀海兮，驚七寶之瓊瓏，  
卷珍珠而徐徐，入戶推雲母而宛宛，依權野客方吹乎，鐵

鏡美人欲理其絲桐爾乃嫦娥轉馭而望舒止行列黛閣  
之幽曲向煥山之崢嶸山則遙開芙蓉之嶂月則漸離白  
玉之京四天一色萬籟無聲紫霧盪而不凝表裏若冰壺  
之玉碧雲合而仍散遠近若珠盤之晶誰云夏燠實類秋  
清於是揜瓊樓閉瑤闕桂華低萬古之枝霜兔躲長生之  
窟娥眉麗人畏輕颺之透紗襦凌波仙子愁荷露之濕羅  
襪蕩紅愁以如波亂琴心而若雪亦有謫仙狂飲把酒問  
青天小謝鴻詞人間驚獨絕飛華藻以停雲寄風流於唾  
月若夫霜淒金屋之人貂敝隴頭之客玉臺倦展凌波璃  
牀還來濯魄素影流衣而寸寸腸迴冷光入夢而雙雙淚

滴顧良會以何年撫芳辰而歎息樓中銷螺髻之青帳裏  
留蟾蜍之白吾願夫黃姑織女恆連合浦之珠月姊東君  
夜合荆山之璧遂臨風有相酬敬永佩以無斁

航海賦

蕭崇業

响叮癡人奉命中山之役戒艘於閩有鏡機子儼然造曰  
蓋聞甯兪竭身事主艱險不避人謂之愚汲黯數好直諫  
難惑以非史稱其慤吾觀若貌愉而和行通而慤匪愚匪  
慤何故名癡豈有說耶癡人良久不言乃筦爾而笑曰僕  
鄙野之人僻陋無心胡敢當二賢也顧卽之時事驗乎無  
情名亦有自來矣且夫乘人鬪捷智者相傾而任理直前

則愚之所以優於械也隨俗脂韋愚者相和而秉德持閑  
則慙之所以不爲佞也茲者徼寵靈而航異域其孰敢違  
彼此者避猶桎梏矇矓者坦若康莊詭蔓飾隙遠脫冥  
翔見機之作我則未違是以觀者訝其辯之不早衆故譏  
其癡而無量耳鏡機子爽然自失曰若可謂安義命而篤  
於自守者也癡曷足病哉書云若濟巨川用汝作舟楫又  
獨不聞犯斗之奇耶第今時世日益澆已顧安所得槎也  
者而乘之若惟殫精畢力以造萬斛之舟意者其有濟乎  
於是癡人唯唯遂命工師求大木程之以有司督之以當  
路閱彼閩山礮倂黝羃蓊蒨輸菌連抱後蟲天矯閑砢蔚



若鄧林彌高麗阜蔭谷蟠岑攢鬱叢駢朗晝盱暝葶磊磊  
其上覆森落落而刺雲爾其考刺掄材凌巒超壑移兵走  
檄滌藪摧鬪松樟採於劍之精鐵力貿於嶺之表鉅不厭  
脩細罔遺小是斷是遷載堅載好凡既備矣大工斯肇於  
是覽易爻思象旨儀工倅法虞姁考日力之程較費務之  
紀問軼事於故游鳩黎人以經始离朱督繩班輪削墨硃  
材潤之失宜概稽考於往牒定豐約以執中酌文質以立  
則雕土豈效之務相窾木用擴乎古哲爲梁遠陋夫絳襜  
涉川無取於淫穢扛懸參桅交種合藥穴牖梯艚副柁重  
底飛廬翟室望之如宇其上則有彤宮鏤像藻櫺華櫨琤

函綺櫝容製瓊章錫衣命服皮弁纁裳元冠盤綬玉珮鏘鏘犀金麟紫芾烏斯皇繁總水紈緯羅束帛連烟之文獨繭之色凡夫取竭天產發輸人迹爲九賦之所歛九式之所節者是用傳宣乎會極之門遠頒乎來王之國其次則有文梳莞翦毛蓆毳毼餅缶匕匙壽光水器蘭膏朱火賁燭金羊炊釜篋緘彝鹵屏面甌甌陶素裊繡編連監酌鼓薪唾壺獸子綢杠絳縵組帷流蘇蒨旆旒悠以容裔羽旌騷殺其粉如材官畜用利械兼儲脩鍛延縱鈇戈刺戈佛郎鳥嘴陽夷勃盧大屈之弓綦受之矢谿子之弩越女之劍龜蛇之旒鳥隼之旗軍容翼翼豫戒不虞若乃私舸巨

艦非常可模抗指南之曄曄崇五樓之崢嶸運貨狄其鼓  
之巧既盡變化乎其中是故外闢內虛大人之度也陽行  
陰翕方壺之境也畫鶴琢雲等威異也虬螭蠓蜿橈櫓擊  
也鷹麟梟闕力士從也嶠萃峯攢檠戟列也鳶翔鵠逸摩  
蓋張也蔽天翳日帆揚而幔移也流霞掣電銀黃飾而赭  
漆光也雷霆轟輦鉦音革響也舞鸞律鸞韻鳥部蛙鈞天  
角抵繽紛錯集者侏儸薄枝散襟期也若乃推驗天人審  
測風日星醫卜算羽祝庖丁匠氏縱工調人司牧象胥掌  
牙篆鏤丹青與夫吳歛蔡謳阮詭孫唵曹詩劉飲秋弈嵇  
琴陶泓毛穎陳元楮生儼然數客述古刪今以至解難之

丸杯時之射棘猿之術雕龍之英靡不廣詢博取競爽據  
能爾其丈雖謝於馳馬制實邁於采菱庶幾御長風以利  
往責千里於寸陰乃若梁篋晉舶越舳蜀舫沙棠木蘭之  
稱青翰三翼之名方斯覆矣於是選長年齊三老命先期  
以諏辰輒開舟而出塢士庶佇眙觀者如導堵冠裳雜選  
紛餞於祖導魚須負矢弩會侯亭循舊矩割戲蠶羞膳脯  
酌醴酬觴鳴金代鼓揮廝絲競肉移宮換羽歡溢廝輿禮  
殷客主僕馬輻輳譬風行雨散留穆於南臺之滸爾乃揖  
讓辭筵慷慨升車祀天妃於广石初縱葦於梅花臨萬頃  
之膠瀉杳莫窺其津涯覘五兩以爲表指六合以爲家伏

皇風之遠庇託靈胥而自誇遂竦節而結旅忽輕舉以征  
遐高宇淡乎其若寂大塊恬然其不譁映流光以霽色照  
落景而俱佳窮區沒渚而不見萬里藏岸其何遮泓澳信  
難測之於蠡淼茫無足語之於龜爾乃順颺鼓帆凌波驟  
舳不行而罔不至不疾而罔不速問然若翔雲絕嶺之翼  
倏乎如馳隙遺風之足陋登仙以矜榮擬乘槎而彷彿此  
非海外之壯遊人世之奇矚也耶若乃陽侯磅礴以跳沫  
天吳激搏而鼓濤飛滂澗澗以相澗洪瀾智谷而互湑轉  
天輪而頽戾迴地軸而爭撓駮駮乎嵩衡抗嵒磳錯乎雷  
澗叫號濼濼法則星河似覆漑漑凜凜則日月如搖篙

工於是乎謹柁楫師於是乎弛綯當此之際未可如何雖  
馮虛以御風兮境非赤壁縱遺世而獨立兮心異東坡有  
時乎悚慄戰怖無日乎爽曠婆娑悅千態以萬狀怵談笑  
而起戈須臾久於年歲瞬息慮乎風波有車馬行公無渡  
河由斯以談則知郭景純之所賦者特泊泊之見未習夫  
江漢之委輸也木玄虛之所云者乃想像之言猶未覩未  
灑滌之實際也故嘗嗟徐衍之負石怪精衛之塞溟壯荆  
飛擒蛟而成氣賢夏禹眎龍其弗驚若乃陳茂拔劍事偶  
然耳海童邀路其誰忘情夫是以抑舟中主敬之程子快  
過風思過之管寧坐而待旦動與俱并行無轍迹心無所

憑鬱鬱墨墨兮衆心恹恹搖搖惺惺兮我頭岑岑逡巡數  
日乃始達於其境於是世子率領文武臣駕彫輅驂驢  
坐組甲建旂常扈烏號翹千將羽騎飛鋌金戈耀鉞旌結  
左言之渠鏤膺鑽髮之行鱗鱗驚捷舞蹈趨踰前驅騁路  
盱眙自旁觀漢官之士儀咸戰戰哈以振躄慶千載之嘉會  
愈色澤而神竦亦有靡聞不來無見不拱周環羅列盤辟  
舉踵於是盛禮興樂供帳設乎皇華之庭夙戒具而贊典  
紛呼嵩以祝齡傑侏尨離於焉俱集四夷迭奏昭德之馨  
爾其尚之以金章加之以元服戴纒垂纓拖綏鳴玉變左  
社之陋風襲中華之芳躅御纂組於公庭告先公於祠屋

追養之禮殫受終之儀肅齊虎拜於部夷稱霞觴於宗族  
然後捧綸章留琳牘奎翰輝煌寶書靈煜爾乃稽首頓首  
颺言曰明明天子萬壽無疆者也於是命膳夫以大饗爰  
致敬亦使臣滌濯孔加禮儀振振載之以醪酏設之以豆  
登豐之以饗餼介之以芳芬館舍之所問候緝御之所類  
仍佳勝之所賞玩筐篚之所錯陳淹藻景於二肘篤鄰好  
而常新郤褻蹠之厚餽堅不辱於遠人爾其鉅典既畢涉  
冬始歸瀆混浮空旋所如之傷心極目裹望僂迫風帷兮  
寒削月帳兮淒嚴驀玄英兮換節迅金素兮迎年狂瀾迴  
兮漸以遠駕飛航兮俄還安危值於所遇變幻殊乎目前



而出坎履順殆有鼓歡聲而振天者矣緬維鄉之所謂神  
藥形茹股弁背芒惴惴然而莫知其所營者果虛耶實耶  
抑虛者舟耶實者我耶誰虛誰實誰我誰舟益譬猶空中  
之態夢中之境物物皆遊物物皆觀耳彼有認水爲海認  
陸爲岸乃至認我爲我宰相角逐而巳者得無陪乎於  
是閩之耆老士大夫縉紳先生之徒罔不掀顏慰勞深嘉  
其獲終王命以爲邦國重也是時鏡機子亦在賀中顧獨  
出席吁衡而詰曰猗歟偉哉癡人固能蹈海哉昔者子路  
喜浮海之從聖人抑其好勇廣德執乘船之諫賢主嘉其  
直言禍福所倚幾希之間此招賈之文誦者悚焉若幸免

於風波之危而克如期以竣事也。詎非有相之道歟。第嘗聞之。識治體者有脩文德以服遠。尊中國者不割齊民以附夷。茲緣蕞爾之小邦而乃奉先人遺體。翼倖魚龍之牙。吻徒取彼重蒙竊惑焉。癡人憊然有問曰。客故習夫欲議乎。倘若所踰適足以明其闇於前而撥乎瑣膠拘剪之忌。而未覩其詼諧者矣。何則。忘九隩之藩屏而不以邊陲爲襟帶者。乃曲士之井闌也。偷持祿之苟安而齷齪以避險崎者。非達士之壯觀也。古之帝王陋偏據而規小恆宅中。而圖大掩略八極。靡國弗營。既尊居乎神州之卓犖。尤勤焉於鳥獸之外氓。北出名師南馳信使。輶車朱軒絡繹不

絕樓船戈舫紛沓旁午然皆弗克遺顯號於後世傳土地  
於子孫方今聖明在宥威德旁皇九域密如四封不聳遼  
絕之黨冠帶之倫樂貢効贄者蓋以億計琉球霑需浸潤  
歷年滋多其奮濯泥滓比埒箕子之邦豈猶夫烏滸狼臙  
屠婆縛婦奇肱反漆之鄉交脛長臂之種可同年而語哉  
客倘願聞若說請爲左右揚擢而陳之夫琉球者上古所  
不能化秦漢所不能從考之四隩則大荒之外測其封界  
則閩粵之東遠望蓬桑則隴靈晰逸蜃霧晦蒙琴高影響  
而幻化犢配綽容以昌容旁睇島夷則朝鮮網絡越裳蔓  
引浮泥迢遞以乖闕蘇綠牢羅以互亘其苑囿則傀峰幽

嶼秀起特出嵯峨降屈中州所慕其草木則石帆鳳尾紫  
絳綸組抗莖敷藁布護臯丘其魚則有吞舟吐浪擁劔琵琶  
蜂目豺口狸斑雉軀奇形殊類胡可勝圖其重獸則雄  
螭龜鼈王珧海月繡螺綺貝土肉石華詭桀出錄環異無  
書其禽鳥則爰居避風大鵬垂天英眸縹翠瀑漢灑珠往  
來喧聒集若霞鋪其宮室則木無雕鏤土僅白盛重闌連  
闌去太去甚歡會作門漏刻聽政殿曰奉神名義斯正乃  
設官僚授之以柄察度司刑耳目司問玉親是崇亦府賜  
姓通事長史爰以將命茫茫羣醜此焉則勝海濱之風茲  
亦等競是故賦倣井田歷遵正朔橫盜無斬關之慘墨吏

免椎膚之虐攘雞何有於軻書捕蛇不聞於柳說則閭閻樂業有餘嬉也醇醴馴致憲度漸陳教亦崇乎釋氏詩頗效乎唐人羨聲名而遣學精奕數而絕倫歲時無須於視草觸體豈聚於王城則傳誌綿邈自覆瓿也物貢所產器貢刀鉤胡椒蘇木硫磺怪石降香權子豐苞重驛望日而趨閒載而至則尉佗倨傲不足云也邇者東鯤卽序西傾順軌交南懷化漠北跂指織路駢衢梯山楫水獻名琛於殊鄰出瑰琰於宜壘冀積壤崇廡赴忿舉而稱臣入侍之輩相與充斥乎藁街之邸天子於是弘王者之無外撫胡越之一家命鞮鞻以掌音設鞞任之舞曲以娛五戎之君

以睦八荒之狄駕長策於芻爽廣博施於疏逖常武緝擘  
擘之旅小戎埋麟麟之迹三五爲之跨躐八九爲之韜軼  
禎符之所偉兆鴻鉅之所烏奔今在於此矣然則琉球雖  
遠豈其得而棄之四牡雖勞又惡可以已之且夫兼容并  
包者英辟之弘略也布德宣舉者臣子之急務也故漢皇  
馳域外之議博望不辭勤於月氏隋帝採殊方之俗朱寬  
久銜使於海國值斯之勤農夫輟輟紅女寢機士馬創吮  
鋌而癡耆老弱傷嚴鏃而蹂踐遐氓爲之震悚黔首蒙彼  
其難而邪行橫作侵犯邊境者猶不可殫紀矧朝廷純茂  
夷夏熙恬游原於邇陬泳沫於迴闊寰海之外有不喁喁

嚮慕中國者則鮫人竊嗤之爲士而不稱引帝德如之何其不叫呼於芸夫且僕以汎剽之弱幹荷郅隆之倬典方謂無異螳螂之臂客奈何獨以宗元之招賈者懼懼然相恐也於是鏡機子柔氣汗辭而謝曰斯事體大固膚淺所不能備者也降階捧手欲讓而行癡人曰復位僕授而以航海之詩其辭

於皇帝德

暨四方兮

中山請命

厥惟常兮

天子曰兪

爾宜王兮

錫以弁冕

黼及裳兮

赫赫詔勅

使臣將兮

布帆無恙

神所襄兮

一人有慶

率土康兮

本支百世

熾而昌兮

石巖三洞賦

葉 涑

縈川巖之名勝表西南之奧區峙神臯以立極列天市以分隅黎州則於唐瓊响町剖於漢符中台光映東井占書絡東迤之襟帶洩九派之尾閭羌高舉以尋契陋捷徑之荒廬綠花林以夾岸指柳砦以戒途薙荆榛之窒導山澤之癰鎮以金蕉之華表疊以琳紺之浮屠快奇踪之隱見敞神界以凌虛陟雲門之開闔爲巨靈之掌削樺映麗盤梁支略約初杳靄以迷津乃泝洄於懸沟徒倚乎繁葭攀



援乎脆葛烟嵐縹緲水石擊搏颺谷口之清音矯質簞之  
翠籜別有天地豁然以開空青萬仞紫翠千堆凍凝古雪  
曙啓春臺俯碧峰之翠嶺森綠玉之澗洞暘睽晰於轟掣  
甸訇駭而喧騰起承天之一柱象緯宿於三階敬靈竒以  
闕秘結元氣之根萋菲起葛陂之策鷗浮滄嶼之杯鼓長  
鯨而逆上蹴怒浪於崔嵬津涯莫測何自攀躋爾乃窺鶻  
穴陟猿梯蹻跚山春不于江湄路鬱紆以凹凸林奄靄以  
迷離引九微之寶燄啓重翳於金鏡括倚天以飛鏃匡負  
丁以聯枿子午通伏流之谷宮商叶水樂之谿華蓋籠而  
旋蟻磨扶桑曉而叫天鷄拂星岡而隕燕昭秋渚以燃犀

網金鱗而入饌差丙穴之堪齊拾菖蒲之九節撥瑤草以  
連畦蜚仙蝠之丹雪濯鸚鵡之蒼鰲摘鍾乳合青泥琅玕  
作簞礪礪爲蠶披雲氣以沾濡喜仙靈之見迺開閭闔以  
高敞窮奧窔以策駕芙蓉之秀可餐飛節之脂欲化林屋  
之景長春小有之天不夜璧月流景以相銜石星當牖而  
相研通地肺以咽噓輓天河而飛瀉饑蛟攫而陵頽怒貌  
蹲而石鏹雲濕而蜿蜒吹腥月冷而嘯吟學掛伏山魃於  
砢礪泊水仙之臺樹玉礎砥柱於中流丹井噴珠於長壩  
礪礪摩戛而轉金輪涓滴凝成而陶玉罍錦屏列障翡翠  
相鮮玉田可耕剛塍相亞凭空仙籟如竽飄袂微香似麝

花轉菡萏挹露長妍草長金光苑莎可藉赤鯉 蠶以相  
持燭龍吹光而遠射天風散雨霞氣成虹星辰晃朗其下  
日月出沒其中跨飛梁而偃蹇嵌危閣之玲瓏澄澈仙人  
之寶鏡彷彿禪定之遺踪則有補陀之寶鬢彼岸之危峯  
供蓮華以爲座縮曼陀以爲權兜羅炫耀羽葆橫縱又有  
紺髮猗猗儼少室之面壁肌膚綽約羨孤射之凌風十斛  
灑鮫人之淚萬寶呈海若之宮曼衍魚龍之戲瑯屑虫鳥  
之容鳴球戛石砮確館瞻靡不極妍盡狀繪莫能窮及乎  
沙明水淨地絕天通津迷回谷景晷高春引滄溟以東注  
鼓餘勁而益崇仰秦華之巉峭限弱水以空濛則有望岸

心折漱石神融雖橐籥之鼓一氣而咫尺之隔千里昔人  
冥搜未暢水阻雲封豈濟勝之或未逮謂留不盡以還化  
工抑圭者之秘其所奧待今日之啓其鴻濛指村落以鱗  
次臨猗而訊漁翁隔盈盈之一水射紅紫於瞳矇悵引山  
陰之棹或懸圃之在巖嵒此水石具區旣因山而表姓而  
仙源記略抗作者以稱雄也

昔遊巖洞者過恆沙隄便返謂溪深不可渡尙有奇勝未搜也憶丁巳春

予與諸友刈茅作炬各持十餘策鼓勇前進凡更數渡褰裳可涉直穿洞後  
河水從此洩前有巨石如峯俯而橫截之水紆回去東岸則爲山嵒路矣有  
漁人置罾於河予問可渡否曰水甚深不可過時當申刻日光映水上霞蔚  
雲蒸紅紫萬丈真奇觀也同遊者恐火盡促之乃返人咸詫曰自有此洞以  
來無能竟其源委者子勝情而兼濟勝亦出水之緣兩相值以呈其奇奧乎  
按巖洞一日閤洞以閤閉嘗遊此故云又曰水雲又曰雲津從此洞東去里

許爲南明洞上有兩竅陽光射入從南明洞南去里許爲萬象洞山更峻絕  
躋石磴數十級隱隱聞風雷聲是爲响町三洞其略載建水州誌阿迷僉憲  
王公諱廷表

有萬象洞賦

若其層巒回互是啓南明深入叢薄高峙太清

蔽虧屢屢疎豁窓牖虛白生乎元竅磅礴萃其精英丸泥  
莫塞籠鳥長征其氣葱葱鬱鬱其光熊熊魂魂凌青丘之  
月表升暘谷之朝曦既鰲擎而蜃息復散綺以飄瓔垂雲  
瀾漫異彩繽紛似彤雲之擁絳闕若丹霞之起赤城漱元  
和之津潤鋪屈胸以晶熒覓舟砂而可就掬石髓以長烹  
冲舉遺神膏之鼎泛海尋煮芋之鎗挂流蘇之百寶引絳  
節之雙旌鼓湘妃之瑤瑟誤樵斧於仙坪豈神功之所刻  
畫非藝匠之所經營更有懸燈百層別開生面萬象森羅

豁如善卷卓月冉冉而升御風冷冷而善熾太乙之神爐  
投五金而遷變或輪囷如舟車或蓬勃如釜斝或擁導如  
飛幢或輕颺如羽扇或如重棧之飛懸或如由庚之曠衍  
或如止水之澄泓或似驚濤之飛濺或如九夏之奇雲或  
似寒冬之飛霰或如樓觀之嵯峨或似亭館之葱蒨或如  
雨花之繽紛或似幻人之迷眩蜚廉鼓舞以搖風列缺翻  
騰而掣電虺虺方來殷殷若戰倘空谷之傳聲倏風雷之  
鼓扇是則漿流沆瀣韻叶滄浪仙靈此爲真宅焯爍耿於  
天光揮塵而巖花瀟潤拂衣而澗草生香異嫺嬛于福地  
編蒲柳于石倉一潭蝌蚪萬帙縹緗仙經秘典芝室藥房

摹岫嶮之古篆出津逮之秘藏時則春和景明風暄澤藪  
吹萬卉以如醒染中林而若嘯乳燕流鶯語花鶉柳蘭在  
谷以彌芳石嵌空而益壽初試春衣旁探雪竇迨乎萃垂  
薜荔蒼脊蘿藤聞石困之雒誦採靈藥以攜明餌濯濯之  
玉蜜領謾謾之濤聲挹方諸於皎月坐玉壺之寒冰浮沉  
爪李舒卷雲猶借問蓬萊之清淺焉知塵界之鬱蒸至若  
節應素秋巖阿如滌兩岸楓林一江蘆荻落木蕭森驚波  
湍激人攜彭澤之樽客弄桓伊之笛涼颺發而爽散林臯  
素魄升而輝流沙磧明河天放而高地籟霜吹而寂孤山  
之鶴方回蘇門之嘯正適已而高天寒洄策蹇蕭蕭遊衝

水雪踏碎瓊瑤探梅英于洞口謄詩興于灞橋望玉峯之  
皎潔聳琪樹之華茗巖枯木落朔吹調刁石骨巉巖而瘦  
削崖根剝落而高標熊經闔館重藝營巢獨丸丸之松柏  
經寒歲而後彫於是子子于旌皇皇使節掬芳藥於漁津  
訪青童之五穴息倥偬以行春望嶙峋而引轍彩仗鴻羽  
飛橋霓結驚砲山鳴流觴泉冽源探九曲之逶迤與渡七  
遊之曲折驢駘蓋歌吹闐咽賓從雲從軒車錦綴轍耕  
野燒詢耨火于嶮巖飲羽洞穿試射生于飛瞥伐靈鼓以  
閑戎從神鉦而應籟磨峭壁以掃莓苔志名山而悵羈縲  
爰有高士韻流選勝岑丘履樵人之仄徑招漁父於方舟



謀茅作炬躡屩沿流契林央之勝賞信岩壑之冥搜偏饒  
濟勝之具浩乎逍遙之遊結想則寰中五嶽洞溟則海外  
九州靡奇不剔靡勝不收紀歲月而名昭琬琰灑翰墨而  
妙擅虞歐更有移家雲際飲犢溪頭水赴墟以鞢鞢鳥出  
谷而輟輟丁丁伐木落落垂釣領略溪山之趣相將鹿豕  
之儔樵歌向晚牧笛橫秋靜極渾如太古澹兮於世何求  
洵南荒之奇絕恣物外之優遊若其凭眺山椒振衣而上  
雲海盪胞星羅在掌東連八桂之林南圻交州之壤豐社  
西涵撫仙北爽徑入翠微川平蒼莽遙遙而天闕可捫歷  
歷而春陰倍朗谷應沈寥山虛答嚮斥八極以相羊眎九

烟于尋丈若疊巘與連峯羅列兒孫而俯仰招黃鶴以遊  
仙拾元珠于罔象嗟乎方輿塊圮瀛海焉經緯兩戒摺拄  
坤乾簡栖福地度越洞天崆峒來軒轅之駕之畧遺漢帝  
之鑄吹笙控緱山仙馭南華開天竺宗禪匡廬白鹿之洞  
濂溪明月之巔嵩陽則伊川洛汭建安則雲谷寒泉眞儒  
蔚起相望後先以奎章之燦爛長應山水而鮮妍至若西  
南遠徼勝莫殫誌漓江一柱伏波試劍之踪勾漏三室稚  
川合舟之地武鄉紅崖之壘宋刻靈岩之記玉山識晴雨  
之占武陸詔風霆之至棲霞則競秀黔陽華藏則總眞演  
洱白沙七寶之飛流辰山三巖之疊萃草不譜入詠歌風

輪遠寄要以造設之靈奇則茲巖爲尤異亥步之所未經

穆駿之所未蒞是以斧劃渡河光靈荒裔昔玉堂仙史

楊升

庵先生諱慎諡文憲四川新都人

華省名卿

郡人主政葉公諱瑞

招邀興洽唱和鏗鳴鴻

華揮爲雲雨仙舟望若蓬瀛句以奇而互賞境無妙而不

呈足貽眞鑒肇錫嘉名續南皮之勝會集西園之妙英臨

清則諫垣讜直

給諫閣公諱闕山東臨清人

肅庵則憲節崢嶸

郡人給事楊公諱傑

吉

水文衡妙墨與鴻篇並峙

學憲楊公諱師孔江西吉水人

洛河太守高懷與

往哲相賡

郡守程公諱應熊北直廣平人

貞珉勒而石花吐萼與圖載而汗

簡流馨矧今岩穴旁搜隱流甄錄恣石渠之討論噴徵書

於邁軸載頌卷阿言辭幽谷器車澤馬偕來寶甕醴泉並

出埃息烽驚莽無戎伏

近山夷受撫

嘉禾秀以雙岐含譽輝而

貫瑒卿雲累見照回鶉火之南杲日初升適屆履端之祝

今歲元日日出時五色雲見於建水凡八日

賡復且於糾紛頌嘉祥於份或蓋岳瀆

之懷柔慶兆民之綏福三河底績告神禹之成功萬壽無疆邁天皇之膺籙胞中丘壑挾藻壺天上國輪軒陳詩采錄敢矜石室之藏庶傲清風之穆

曲江賦

尤有爲

繫牂牁之上閩鍾明秀於山川賤煥文而高掌指樂榮以媚妍作梯航於聖世景仁智於前賢乃學山而未至徒觀水而冷然遡宗生之破浪愧祖子之先鞭嗟河漢之無極

幸洙泗之有傳於是別派昆明長流响叮曲江以名異龍  
莫並搗練西含巴盤北洞緬燹遐乖交番絕冥嵐瘴獨多  
風烟特迴磬石影沙漬陶沸鼎則見溟馬洶洶潮汐隱馬  
礚礚春秋澗灑箭馳兮泃泃汪泃電激兮悠悠宛長虹之  
一帶濯新月以如鈎百雉巍巍而縈繞千村落落以環周  
儼黃河之屈蠖紆武夷之歆浮居然灑灑九迴而八折的  
爾蓬瀛三島而十洲控清兮載神女詭波兮揖陽侯既集  
往乎鯨介亦淵數乎蟠蚪上泛漱乎鸚鵡中混淪乎信鷗  
或磬鳴而哢躍或吐璣而孕璆矧狎濤而戲瀨有鵠侶與  
鴻儔爾乃築篔簹茄莖蒼溢王膏湛芝房碧桐蔭杜蘅於

鏡畫睂滌詩腸澌溫耐引曲觴吟宛在嘯未央溯洞雲谿  
下上天光歸鳧沅沚奮阜瀟湘青熒礧礧綵緻琳瑯穎垂  
苗菖棻舖篠篁其時芊蕙疏風葱蘢競漱夏穉冬蒨無夜  
無晝萬筭爲霑足千畦盡黃茂象耕兮匪未烏耘兮匪耨  
霜來則穆不先露往則重不後是以眺青疇之錯綺齊星  
畢之霽霽耳歡聲於魚鼈緝緝錦於芰荷鼓江妃之寶瑟  
叶海童之活歌蛟成擒於千遂龍曳尾於仰訶泣珠來於  
鮮客飲木拜乎浪滌滌坤乾兮東井撼烏兔兮洪波至於  
檣榜榻棹漁佃商農晨征忘夕竭南窮東岑凌片帆壑趣  
孤蓬或則衣芻或則飯筒雞骨占年於馮夷鵝毛禦臘於

螭宮雖俄頃而千里，懸舳艫以蘊隆，乃沐浴於日月，增扇爽於徐風。若夫幽人逸士，美景良辰，攜琴載酒，問諸水濱。萍實悲難，再見靈夔，訪亦無真，晒子羽兮。投璧叱季膺兮，思尊丙穴，嘉其烝油，文筆借以垂綸，摘藻麗兮。元虛揚葩，極兮景純，赤鷁莫隨，而戢翼丹魚，采爆而竦鱗，山得之而映發，人得之而廉貞，且也酣興漂飛，遙情颺舉，嗽石枕流，陋今榮古，結想濠濮之間，遊神膠葛之寓，泳涵乎藝圃，漸漬乎書圃，何脩阻於郭舟，竟望洋而自憮，蔚長卿之典型，願閩仙而爲伍，脫不擇於細流，起中池於化雨，亂曰：

德之靈長襟六詔兮，駕霓迴雲觀極妙兮，汲引東偏達

煥瀘兮傲足可尋  
涖八隅兮混萬於一疇  
管窺兮包奧括區  
中外綏兮紀綱炎景  
王斧界兮激濁揚清  
無隘險兮陸龍水慄  
金湯永兮皇歡浹洽  
珍效總兮沂淵河洛  
符和祥兮向風隨流  
倬天章兮